

# قاضيون رو ڪتاب

## ڪتاب رو نوم

يشوع را موت ڪيڙ اسرائيلي قوم ۾ پادشاهي دور شروع ٿيا ٿي پهرين جيئڻه پڻ اسرائيلي قوم رئي آڳوڻي ڪري اُو قاضي ڪيوراوڻا. قاضيون رو ڪوم اي هتو جي اُو آيون منڪون رئي آڳوڻي ڪرڻه ان قانون پرموڻه اُوئون ري ڏوروئون ڪتم ڪرڻه، ان آيري قوم هارو جنگ وڊوا پڻ زاتا. تيا ري ڪري ايئا ڪتاب رو نوم قاضيون رو ڪتاب راکيو.

## ڪتاب لکيا وازو ان لکيا رو ٿوئون

يهودي هزم پرموڻه قاضيون رو ڪتاب لکيا وازو سنت سموئيل سڻه، پڻ هايا را پارام صاف نٿي ڪي هيڪتا.

ڪئينڪ زوڻو منڪ قُضات 18: 30 پرموڻه اي اندازو لڳاوڻه ان اُوئون رو اي مونوو سڻه جي 30 آيت رو آڪري حصو بابل رو اسرائيل مانھ قوضو ڪريا رئي وات سڻه. تيام اُوئون رو اي ڪيال سڻه جي قُضات رو ڪتاب 732 ق، م ۾ لکئي هوشي.

تيا شيوا قُضات 1: 21 پرموڻه اي پڻ هزمڻه جي اي ڪتاب 11 صدي ق، م دائود رون ڏيئون ۾ لکئي هوشي ڪم تون ييوسي پهرين يروشلم ۾ ريتا پڻ تيا ڪيڙ دائود يروشلم مانھ قوضو ڪرين اُوئون نڻه اُوئون ڪاڊيا پرا.

## کتاب لکيا رو مقصد

قُضات رو کتاب اسرائيلي قوم رئي پڳاوت ڏيکارڻ، جيئي اُوي ايشور رڻه کلاف کرئي ٿي. ان اي کتاب اي پڻ ڏيکارڻه جي اسرائيلي قوم ننه پادشا رئي ضرورت سڻه قُضات 17: 6 ”اوتون ڏيئون ۾ اسرائيل رو کوئي پادشا نتو جيا ننه جيئن وٽتو اُو ڪرتو.“

## خاص واتون

پورا کتاب ۾ وار وار اسرائيلي قوم را ڏوه، سزا، قريادا ان مڱي را پارام همپراوڻه.

کتاب ۾ 12 قاضيون را پارام لکل سڻه. اوتون موئين ٿي ڪئينڪ مشور نوم اي سڻه، دبور، جَدعون، سمسون ان افتتاح.

## کتاب را خاص حصا

اسرائيلي قوم رون مسلون رئي شروعات 1: 1-3: 6

اسرائيلي قوم رئي پڳاوت 3: 7-16: 31

اسرائيلي قوم را ڏوه وڌي زاو 17: 1-21: 25

## اسرائيلي قوم واڙا ياقِي ريل ڪنعاني قومون ٿي جنڳ ڪرڻه

يهوداه ان شمعون رون قبيلون رئي پادشا ادوني بزق ٿي جنڳ

**1** يشوع رڻه ڳڏاريا ڪيڙ اسرائيلئي پرميشور ننه پونسيو: ”ڪنعاني قوم واڙون ٿي

جنڳ ڪريا هارو امون موئين ٿي پيرهين ڪوڻ حملو ڪرڻه؟“<sup>2</sup> پرميشور جواب

ڏيڏو: ”يهوداه را قبيلو واڙا حملو ڪرڻه. زوئو! مئين اي ملڪ اوتون رڻه حواله ڪريو

پرو-<sup>3</sup> "تئین یهوداه را قبیلا وازی آپرون پایون شمعون را قبیلا وازون نئه کیدو: "تمی امون پیژا اماري وراست را حصا م هالو، زم آپی کنعانیون ټی جنگ کرون ان همروم امی پټ تمون پیژا تماری وراست را حصا م هالشون- "تیام شمعون را قبیلا وازا اوئون پیژا گیا-<sup>4</sup> یهوداه را قبیلا ری منکی حملو کریو ان پرمیشور کنعانی ان فرزی قوم رون منکون نئه اوئون رون هاتون موئن ډیدا پرا ان اوئی بزق شهر کن اوئون را ده هزار آدمی ماریا پرا-<sup>5</sup> اوئنه یادشا ادونی بزق نئه یازین اسرائیلی اوتا ټی جنگ کرئی ان کنعانی ان فرزی قوم رون منکون نئه هرایا-<sup>6</sup> پټ ادونی بزق پاکو ان او اوتا وونهز گیا ان اوتا نئه زهالین اوتا رون هاتون پگون را انگونا وادیا پرا-<sup>7</sup> تئین ادونی بزق کیدو: "هاتون پگون را انگونا وادل ستر یادشا مارئه پوئنه پینا را ماگ ټی روتیون را تکرا ویتتا- تیام جیوو مئین کریو، تیوو ایشور مون نئه ډدلو ډیدو- "پسئه اوتا نئه یروشلم شهر موئن لی آیا ان او اوئنه مری گیو-"

### یروشلم ان حبرون رون شهرون مانه قوضو

<sup>8</sup> یهوداه را قبیلا وازی یروشلم ټی جنگ کرین اوتا مانه قوضو کریو پرو ان اوتا رون منکون نئه ترورار ټی ماریا ان شهر نئه بازو پرو-<sup>9</sup> اوتا کیژ یهوداه را قبیلا وازا اوئون کنعانیون ټی جنگ کریا هارو گیا جیا ډونگر را علاقا م، ډونگر را پوئون م ان نجب را رټ موئن ریتا-

<sup>10</sup> پیرهین یهوداه را قبیلا وازا اوئون کنعانیون ټی جنگ کروا گیا جیا حبرون شهر م ریتا- کالب اوئون عناق رون ترټ قبیلون نئه کادیا پرا مطلب سیسی، اخیمان ان تلمی ری پیډی وازون نئه ماریا، جیا راکه جیوا بزوون هتا- حبرون رو نوم پیرهین قریت اربع هتو-

## عُتْنِي ايل دبیر شهر مانھ قَوْضو ڪرھ

<sup>11</sup> پسئہ اُوئون اُو دبیر را شهر واژون ٿي جنگ ڪروا ڳيا. دبیر رو نوم پيرھين قريت سفر هتو. <sup>12</sup> ان ڪالب ڪيڏو: ”جيو ڪوئي قريت سفر شهر مانھ حملو ڪرين اُوئا مانھ قَوْضو ڪرشي اُوئا نئہ هُون آپريي ڏيڪريي عڪسہ پرتاويھ.“ <sup>13</sup> تئيون ڪالب رءُ نونئہ پائي قنز رءُ ڏيڪرئہ عُتْنِي ايل اُوئا مانھ قَوْضو ڪريو پرو. تيام ڪالب آپريي ڏيڪريي عڪسہ اُوئا نئہ پرتاويي. <sup>14</sup> اُوئا را ويوا رءُ توئئہ اُوئہ آپرا آڏمي ٿي وات ڪريي جي اُو ايئا را ٻاپ ڪالب ٿي ڪيتر مونڳئہ. اُو آپرا ڳڏيڙا ٿي اوترئي. تئيون ڪالب اُوئا نئہ پُونسيو: تُون نئہ ڪي ڪيئہ؟“ <sup>15</sup> اُوئہ ڪالب نئہ ڪيڏو: ”مُون مانھ ميريوني ڪرو! ڪم تون تمِي مُون نئہ نجب را رڻ ۾ زمئي ڏيڏيئہ تيام مُون نئہ پوڻي را نيرا پڻ ڏيو.“ تئيون ڪالب اُوئا نئہ ماڻليون ڪيترون را نيرا ان نيسليون ڪيترون را نيرا ڏيڏا.

## يهوداه را قبيلا واڙا پيزون علاقون مانھ قَوْضو ڪرھ

<sup>16</sup> قيني قوم را ڪئينڪ منڪ، جيا موسيٰ را هاھرا ري پيڊي را هتا، اي يھوداه را قبيلا رون منڪون پيڙا ڪجيون را شهر يريخو ٿي يھوداه را رڻ هوما ڳيا پرا، اُوئئہ زائين عراد شهر را ڏڪناڏليا پاھئہ نجب را رڻ ۾ اوت رون منڪون پيڙا ريو مڏيا. <sup>17</sup> يھوداه را قبيلا را منڪ آپرون پايون شمعُون را قبيلا رون منڪون پيڙا ڳيا ان اُوئي اُوئون ڪنعانيون نئہ ماريا جيا صفت شهر موئين ريتا. اُوئي شهر نئہ هاو تپاه ڪريو پرو. تيام اُوئا شهر رو نوم حُرمہ ڪيوروئو، جيا رو مطلب سئہ تپائي. <sup>18</sup> تيا ڪيڙ يھوداه را قبيلا ري منڪي، غزه، اسقلون ان عقرُون شھرون مانھ ان اُوئون را علاقا مانھ قَوْضو ڪريو پرو. <sup>19</sup> پرميشور يھوداه را قبيلا رون منڪون پيڙو هتو تيام اُوئي ڏونگر را علاقا موئين ربا واژون نئہ ڪاڍيا پرا پڻ زھوڙ موئين ربا واژون نئہ ڪاڍي نہ هيڪيو ڪم تون اُوئون ڪن لوهي رت هتا.

<sup>20</sup> مُوسِي را کيدا پرموئنه خبرون شهر کالب ننه زږيو ان اوئه اوئون عناق رون ترڼ ډيکرون ري پيډي واژون ننه کايډا پرا، جيا راکنه جيوون پږوون هتا.

<sup>21</sup> پڼ بنيامين را قبيلا ري منکي اوئون يوسِي قوم واژون ننه نه کايډا جيا يروشلم م ريتا. تيام يوسِي بنيامين را قبيلا واژون پيرا آز هوډي<sup>e</sup> يروشلم م ره.

يوسف ري پيډي واژا بيت ايل شهر مانه قوضو کره

<sup>22</sup> يوسف ري پيډي واژي مطلب افرائيم ان منسي ري منکي پڼ بيت ايل شهر مانه حملو کړيو ان پرميشور اوئون پيرو هتو. <sup>23</sup> يوسف ري پيډي واژي بيت ايل هوما جاسوس ميليا. پيرهين اوئا شهر رو نوم لوز هتو. <sup>24</sup> اوئي جاسوسي هیکا منک ننه اوئا شهر تي بارو نيهرتون پاږيو ان اوئا ننه کيدو: "جي تون امون ننه شهر موئين زايا رو کوي رستو ډيکار تون امي تون مانه ځيا کرشون." <sup>25</sup> پسنه اوئه شهر موئين زايا رو رستو اوئون ننه ډيکارو.

يوسف ري پيډي واژي شهر ننه تپاه کړيو پږو پڼ اوئا منک ننه ان اوئا ربي ټډي اکايي ننه ساډي ډيډي. <sup>26</sup> او منک جتي قوم را ملک موئين گيو ان اوئنه اوئه هیک شهر نايو جيا رو نوم لوز راکيو ان آز هوډي هيا رو نوم هائي سته.

قومون جيا ننه اسرائيليي نتي کايډي

<sup>27</sup> منسي را قبيلا ري منکي بيت شان ان تعناک شهرون ان اوئون رون آها پاها رون گومون مانه قوضو نه کړيو، ان دور، ايليعام ان مجدو رون شهرون ان آها پاها رون گومون م ربا واژون ننه نه کايډا ان او کنعاني اوئا علاقا موئين پينا ربا. <sup>28</sup> زئيون اسرائيلي ځاډا تيا تئيون اوئه کنعانيون تي ويگار رو کوم ليدو پڼ اوئون ننه هاو نه کايډا.

<sup>29</sup> همروم افرائيم را قبيلا واژي اوئون کنعانيون ننه نه کايډا جيا جزر شهر موئين

ریتا. تيام کنعاني اوئون پيرا جزر شهر موئين پينا ربا.

<sup>a</sup> 21:1 آز هوډي وين آز هوډي رو مطلب سته زئيون اي کتاب لکي گهي.

<sup>30</sup> زبُولُون را قَبِيلَا وَاڙِي قَطْرُونَ شَهر رُون رِيا وَاڙُون اَن نَهلال شَهر رُون رِيا وَاڙُون نَئِه  
نَه ڪاڊيا. تيام ڪنعاني اِيئون پيڙا رِيا اَن ويڳار رو ڪوم ڪريو.

<sup>31</sup> آشر را قَبِيلَا وَاڙِي عڪو شَهر رُون رِيا وَاڙُون، صيدا شَهر رُون رِيا وَاڙُون اَن احلاب،  
اَكْزيب، حلبه، افيق اَن رَحوب شَهر رُون منڪون نَئِه نَه ڪاڊيا. <sup>32</sup> تيام آشر را قَبِيلَا وَاڙَا  
اَوْتا مُلڪ موئين رِيا وَاڙُون ڪنعانيون پيڙا وسي ڳيا ڪم تون اُوئي اُوئون نَئِه نَئِه ڪاڊيا.  
<sup>33</sup> نفتالي را قَبِيلَا وَاڙِي بَيْت شمس اَن بَيْت عَنات رُون شَهرُون رُون رِيا وَاڙُون نَئِه نَئِه  
ڪاڊيا. تيام اُو اَوْتا مُلڪ موئين رِيا وَاڙُون ڪنعانيون پيڙا ربوا مڌيا پڻ بَيْت شمس اَن عَنات  
را رِيا وَاڙَا اُوئون هَارُو ويڳار ۾ ڪوم ڪرتا.

<sup>34</sup> اُمُورِي قُوم وَاڙِي دَان را قَبِيلَا وَاڙُون نَئِه دُونڳرون وَاڙَا علاقا ۾ پڳڙايا پرا. اَن اُوئون  
نَئِه زهوڙون موئين آوا نَه ڏيڏا. <sup>35</sup> اُمُورِي حَرَس دُونڳر مانھ اَن اِيالون اَن سعلِيم رُون  
شَهرُون موئين ٻينا رِيا توئي پڻ زئيون يُونسَف رِيا پيڊي وَاڙَا وڌارَئِه بڙوڪا ٿيا تئيون اُوئون  
ٿي ويڳار ۾ ڪوم ڪرايو.

<sup>36</sup> اُمُورِي قُوم رو ڌنڳ عَقْرِيْم چڙهائي ٿي مطلب سِلْع ٿي ٿين اُونسا هومو هتو.

## ايشور رو دُوت اسرائيلون نَئِه ڪپرڌار ڪرڻ

**2** پرميشور رو دُوت جَلجال ٿي ماثلِيا پاهڻه بوڪيم نومي ماڳ ۾ آيو اَن پرميشور رو اي  
نياپو ڏيوا مڌيو: ”هُون تمون نَئِه مِصر مُلڪ ٿي ڪاڊين اِيئا مُلڪ ۾ لي آيو جيا را  
پارام مئين تمارون ٻاپ ڏاڏون ٿي هُون ڪائين وائڏو ڪريو تو جي اي مُلڪ تماري وستار  
نَئِه ڏيهه. اَن مئين ڪيڏو تو، ’هُون ڪيڏي پڻ تمون ٿي ٻونڌل وسَن نئين توڙون. <sup>2</sup> تمارئِه  
ام ڪروو جي، اِيئا مُلڪ موئين رِيا وَاڙُون ٿي ڪوئي وسَن مت ٻونڌيا، تمِي اُوئون رِيا مال  
ساڙيا رِيا ويڏي ڍاهيا پري‘. پڻ تمِي مارئي وات نَه مونئي. تمِي هم ڪم ڪريو؟ <sup>3</sup> تيام  
مئين پڻ ام ڪيڏو جي، ’هُوئِه، هُون تمون وسا ٿي اُوئون نَئِه نئين ڪاڊون. اُو تمون هَارُو

کونتا ان اوتون را ديو ديوټونا تمون هارو قاهي را زم هوشي. " 4 زئيون پرميشور رټ دوت اسرائيلی قوم رون پتون منکون ټي اي واتون کري ليدي تئيون او منک اونسې هادي رووا مډيا. 5 اوتا ماگ رو نوم اوټي بوکيم راکيو، جيا رو مطلب سټه رويا واځا. پسته اوټه اوټي پرميشور را نوم مانه مال سټايو.

## اسرائيلي قوم پرميشور نټه پولي زائو

6 جټه توټه يشوع اسرائيليون نټه روونا کريا تون پډائي منک اوتا ملک مانه قوضو کريا هارو آپري آپري وراست را علاقا مړ گيا پرا. 7 اسرائيلی پرميشور رټي شيوا يشوع رټه حياتي هوتون ان اوتون موتون رټه حياتي هوتون کرتا ربا، جيا يشوع کيټ حياتي ربا ان جيټي پرميشور را پډائي موتا کوم ډيکيا تا جيا اوټه اسرائيليون هارو کريا تا. 8 پرميشور رو شيواډاري نون رو ډيکرو يشوع هيک هو ډه سال ري عمر مړ سرگواسي ټيو. 9 منکي اوتا نټه اوتا ري وراست را ډنگ مړ تمنت حرس شهر کن زاکيو جيو افرائيم را قبېلا را ډونگر واځا علاقا مړ جعس ډونگر رټه اوتراډليټه پاهنه سټه.

10 او پډي نسل اپرون باپ ډاډون پيرټي زائي ټي ان اوتون کيټ هيک پيرټي نسل ټي. او نکو پرميشور نټه زوتټي ان نکو اوتون کومون نټه جيا اوټه اسرائيليون هارو کريا تا. 11 اسرائيلی پرميشور رو ډوه کريو ان بل ديو ان ديو ديوټونون رټي شيوا کري. 12 اوټي پرميشور اپرا باپ ډاډون را ايشور نټه ساډيو پرو جيو اوتون نټه مصر ملک ټي کاډين لي آيو تو. او ديو ديوټونون لار ويوا مډيا ان اوتون نټه نموا مډيا، جيا اوتون رټه آهټه پاهنه ري قومون رو ډيوون موئين ټي هتا ان پرميشور نټه کاوټ ډيور اوټي. 13 اسرائيلی پرميشور نټه ساډين بل ديو ان عستارات ډيوې رټي شيوا کړوا مډيا. 14 تئيون پرميشور نټه اسرائيليون مانه کاوټ سټي ان اوتون نټه لوتيا وازون را قوضام ډيدا پرا، جيا اوتون نټه لوتوا مډيا. اوټه اوتون نټه زوتټه ويسيا پرا مطلب چارون پاهون رون دشمنون را قوضام

ڏيڏا پرا، تيام اُو آڀرون ڏشمڻون هوما اُوپي نه هيكيا. <sup>15</sup> اُو زئيون پڻ جنگ ڪروا زاتا، تون پرميشور اُوئون رو سات نه ڏيتو ان اُوئون مانھ آقت ميلتو زم پرميشور اُوئون ٿي هون ڪائين ڪيڏو تو. تيام اُو الهائي تنگ ٿيا. <sup>16</sup> پسئ پرميشور اُوئون هارو آڳيون سونڊيا جيئي اُوئون نئ ٺوتيا وازون ٿي سڏايا. <sup>17</sup> پڻ اُوئي آڀرون آڳيونون رئي نه هومپري. اُو آڀرا ايشور نئ ساڏين ڏيو ڏيوٽونون لار وودا ان اُوئون رئي پوزا ڪري. اُوئون رو هائي پي وقائي رو ڪوم زنا جيوو ڪراپ هتو. اُو اوتا مارگ ٿي جلدِي ڦري ڳيا جيا مانھ اُوئون را ٻاپ ڏاڏا وينا. اُوئون را ٻاپ ڏاڏا پرميشور را حڪم مونتا پڻ ايئي اُوئون جيوو ڪوم نه ڪريا. <sup>18</sup> زئيون پرميشور اُوئون هارو آڳيون سونڊتو تئيون پرميشور اُوئون قاضيون پيرو هوتو ان اوتا آڳيون رئ حياتي هوتون ٿي اُوئون نئ ڏشمڻون رون هاتون ٿي سڏاوتو پرا. ڪم تون زئيون اُو هتاپيا وازون ان ڏک ڏيڏا وازون ري ڪري رڙيون ڪرتا تئيون پرميشور اُوئون مانھ ڏيا ڪرتو. <sup>19</sup> پڻ زئيون اُو آڳيون مري زاتو تئيون منڪ وڙي زائين ڏيون رئي شيوا ڪرتا ان پڳي پڙتا ان هم اُو آڀرون ٻاپ ڏاڏون ٿي پڻ گهڻا ٻڳڙي زاتا. اُوئي آڀرا ڪراپ ڪوم ان ناهڏائي نه ساڏئي. <sup>20</sup> تيام پرميشور نئ اسرائيلي قوم مانھ ڪاوڙ سڙئي ان اُوئ ڪيڏو: ”ايئھ قوم مارا اوتا وسن نئ توڙيو پرو جيا رو حڪم مئين ايئون رون ٻاپ ڏاڏون نئ ڏيڏو تو ان مارئي وات نه هومپري. <sup>21</sup> تيام هوءَ هون پڻ اُوئون قومون موئين ٿي ڪيا نئ پڻ اُوئون را هوما ٿي نئين ڪاڍون جيا نئ يشوع ساڏين مريوه. <sup>22</sup> هم ڪريا ٿي هون اُوئون قومون ٿي اسرائيليون نئ آزماوون جي اُو پرميشور را مارگ مانھ وودا هارو آڀرا ٻاپ ڏاڏا را زم ويسي ڪا نا. “ <sup>23</sup> تيام پرميشور اُوئون قومون نئ ربوا ڏيڏي. اُوئون نئ شيڪي نتي ڪاڍي ان يشوع را هات ۾ پڻ نتي ڏيڏي.

## اُو قومون جيون نئه مُلك موئين ريو اِديتي

3 اي اُو قومون سئه جيون نئه پرميشور ريو اِديتي زم اُوئون ري هاڻي اُوئون اسرائيلون رو آزمتو لئه جيا كنعان مُلك مانھ قوضو ڪريا واري جنگون ڪيڙ پيدا ٿيا تا. 2 اي تيام ٿيو جي اسرائيلون را نوا وستار نئه جنگ ڪريا رو تجريو ٿئه ان اُو منڪ جنگ ڪروا شيڪي لئه، جيون نئه پيهرين جنگ وِڊيا رو ڪوئي تجريو نتو. 3 هاڻي قومون اي سئه. فلسطيني قوم را پونس ئي آڳيوون ان اُوئون را منڪ، كنعاني قوم را ٻڌائي منڪ، صيداني قوم واڙا ان حوي قوم واڙا جيا لُبنان را ڏونگر اڙا علاقا موئين بعل حرمون ڏونگر ٿي لُبو حمات شهر هُودِي ريتا. 4 هاڻي تيام ري گي تي جي اُوئون ٿي اسرائيلون نئه آزماوئه زم ڪپر پڙئه جي اُو پرميشور رون حُڪمون نئه مونشي ڪا نا، جيا اُوئه موسيٰ ري هاڻي اُوئون رون پاپ ڏاڏون نئه ڏيڏا تا. 5 هم اسرائيلي قوم را منڪ كنعاني، حتي، اموري، فرزي، حوي ان يئوسي قومون رون منڪون پيرا ريو مڌيا 6 ان اُوئون ٿي ليتي ڌيتي ڪرين اُوئون رون ڏيون رئي شيوا ڪروا مڌيا.

## عُتني ايل اسرائيلي قوم رو آڳيوون

7 اسرائيلي قوم ري منڪي پرميشور رو ڏوه ڪريو ان اُو پرميشور آڀرا ايشور نئه ساڏين بعل ڏيو ان يسيرت ڏيو رئي شيوا ڪروا ربا. 8 تيام پرميشور نئه اسرائيلي قوم مانھ ڪاوڙ سڙئي ان اُوئه اسرائيلون نئه زوئيه ويسيا پرا مطلب مسوپتاميه را پاڌشا ڪوشن رسعتم را هات ۾ ڏيڏا پرا. ان اسرائيلي آڻ سال ڪوشن رسعتم ري گُلومي موئين ربا. 9 پسئ زئيون اسرائيلي پرميشور نئه پوڪاريو تتيون پرميشور اسرائيلون هارو هيڪ سڏايا واڙا نئه سُونڊيو ان ڪالب را نونا پائي قنز را ڏيڪرا عُتني ايل اُوئون نئه سڏايا. 10 پرميشور رئي آتما عُتني ايل مانھ اوتري ان اُو اسرائيلي قوم رو آڳيوون ٿيو ان جنگ هارو نيهريو. تتيون پرميشور مسوپتاميه را پاڌشا ڪوشن رسعتم نئه اوتا را هات ۾ ڏيڏو

ان اُوڻه ڪوشن رِسعتيم نئه هرايو. <sup>11</sup> اُوڻا مُلڪ ۾ چاليه سال سُڪ شونتئي رئي. پسئہ قنز رو ڏيڪرو غُتني ايل سرگواسي ٿيو.

## اهود اسرائيلي قوم رو اڳيون

<sup>12</sup> اسرائيلي قوم ري منڪي وڙي پرميشور رو ڏوه ڪريو. تئيون پرميشور مواب مُلڪ را پادشا عجلون نئه اسرائيلون رئه خلاف ٿيا هارو شڪتئي ڏيڏئي ايئا هارو جي او وڙي پرميشور رو ڏوه ڪروا ربا. <sup>13</sup> تئيون عجلون عموني ان عماليقي قومون رون منڪون نئه آپ ڪن پيرا ڪريا ان زائين اسرائيليون مانھ حملو ڪريو ان اوئي ڪجيون را شهر<sup>a</sup> پريحو مانھ قوضو ڪريو پرو. <sup>14</sup> اسرائيلي قوم را منڪ اڍارئه سال مواب مُلڪ را پادشا عجلون ري ڳلومي موئين ربا.

<sup>15</sup> پسئہ زئيون اسرائيلي قوم ري منڪي پرميشور نئه پوڪاريو تئيون پرميشور ايئون نئه سڏايا هارو بنيامين را قبلا وازون موئين ٿي جيرا را ڏيڪرا اهود نئه سونديو جيو ڏاووڙي هتو. اسرائيلي قوم ري منڪي اُوڻا هات مواب مُلڪ را پادشا عجلون نئه لڳون ڏي ميليو. <sup>16</sup> هوئه اوڻه زيا مور اهود آپ هارو ڏوڍ ڦٽ لونبو بي ڌار ڪنجر نايو ان اُوڻا نئه اپرا چوڳا نيسو زمڻي هاتر مانھ بونديو پرو. <sup>17</sup> پسئہ اوڻه زائين مواب را پادشا عجلون نئه او لڳون ڏيڏو. هوئه عجلون الاهي زاڏو آڏمي هتو. <sup>18</sup> اهود زئيون لڳون ڏي ريو تئيون اوڻون نئه روونا ڪريا جيا لڳون اوپاڙي آيا تا. <sup>19</sup> پسئہ او آپ پڻ پاسو روونو ٿيو ان اوڻون مورتيون ڪن پوڳيو جي جلال شهر ڪن سئہ، پسئہ اوڻون اي وڙي پاسو پادشا ڪن آيو ان ام ڪيو ريو: ”او پادشا، مون ڪن تمون هارو هيڪ راز رئي وات سئہ.“ تون پادشا ڌرپار وازون نئه ڪيڏو: ”ماڻ ڪپئہ.“ تئيون او ٻڌا جيا اُوڻا رئه پاهئہ اوپا تا اُوڻا ڪن ٿي ٻارا ڳيا پرا.

<sup>a</sup> 13:3 ڪجيون را شهر ڪجيون رو شهر پريحو سئہ

<sup>20</sup> اُوئه توتئه پادشا آڤرا وائيرا واري ماڙي ۾ هيڪلو پښو تو، تتيون اهود پادشا ڪن ڏوڪڙو آوين ام ڪيا ريو: ”تمون هارو مون ڪن ايشور رو نياپو سئـ.“ تتيون پادشا گهاڙي ٿي اونيرو پرو. <sup>21</sup> تتيون اهود آڤرا ڏاوا هات ٿي او ڪنجر ڪاڍيو جيو اوتا ري زمڙي هاتر مانھ بوندل هتو، او پادشا را پيت موئين هڻيو. <sup>22</sup> ڪنجر هاتا هودو پار ٿي گيوھ ان پادشا را پيت رئي چرڀي ڪنجر مانھ وڙي آوي ڪم تون اوتھ ڪنجر نئ پادشا را پيت ٿي نتو ڪاڍيو پڻ او زائين پتون ٿي بارو نيھريو. <sup>23</sup> پسئھ اهود اوتون نيھرين وروندا موئين آيو، ان پسئھ آڤ لار ماڙي را ڪمرا نئ چاڀي ڏين پند ڪريو پرو.

<sup>24</sup> زتيون او گيو پرو تتيون پادشا را شيواڌاري آيا ان آوي زيوو جي ماڙي را ڌر پند سئھ. تون ڪيدو: ”او ضرور وائيرا واڙا ڪمرا را ڪاڪوس موئين هوشي.“ <sup>25</sup> او وات زوئين ٿاڪي گيا پڻ ماڙي را ڌر نه ڪليا. تتيون آوي چاڀي ليدڙي ان او ڌر ڪوليا ان زوئھ، تو اوتون رو مالڪ زمي مانھ مرل پڙيوھ.

<sup>26</sup> نوڪر زتيون وات زوتات ربا تتيون اهود اوتون پاڳي گيو تو ان وڙي هاڳي مورتيون ڪن ٿي ٿيتو سعيرت شهر موئين پاڳين پچي گيو. <sup>27</sup> اوتئھ پوگين اوتھ افرائيم را قبيلو را ڏونگرون واڙا علاقا ۾ نر شينگڙو قونڪيو. تتيون اسرائيلي قوم را منڪ اوتا پيرا ڏونگرون واڙا علاقا ٿي اوتريا ان او اوتون مور مور وويدو. <sup>28</sup> اوتھ اوتون نئ ڪيدو: ”مون وونھڙ وونھڙ وو ڪم تون پرميشور تما را ڏشمڻ موآيون نئ تما را هات موئين ڪريا پرا.“ تيام آوي اوتا وونھڙ زائين يردن ڌريا رون گهاٽون مانھ قوضو ڪريو پرو جيا موآب ملڪ نئ هوما هتا ان ڪيا نئ پڻ اوتھ پاهئھ زاوا نئ ڏيدا. <sup>29</sup> اوتھ توتئھ آوي موآب را ڏھڪ هزار آدمي ماريا جيا ٻڌائي هيئت پريا ان ٻروون هتا. اوتون موئين ٿي هيڪ پڻ نه پچيو. <sup>30</sup> ان اوتھ ڏي موآب ملڪ اسرائيلي قوم را هات هيٺ آيوھ ريو ان اوتا ملڪ موئين اسي سال سڪ شونتئي رئي.

## شمجر اسرائيلي قوم رو اڳيون

<sup>31</sup> اهود ڪيتر عنات رو ڏيکرو شجر اونيوان سو هو فلسطينون ننه پڙه هاکليا واري پروني ٿي ماري. اونه ئي پڻ اسرائيليون ننه سڏايا.

## ٻائي دبورہ اسرائيلي قوم رئي اڳيون

**4** اهود را ڳڏاريا ڪيتر اسرائيلي وري پرميشور رو ڏوه ڪريو. <sup>2</sup> تئيون پرميشور اوتون ننه زوئنه ويسا پرا مطلب ڪنعاني قوم را پادشا يابن را قوضام ڪريا پرا جيو حصور شهر ۾ رين راز ڪرتو. اوتا ري قوج را اڳيون رو نوم سيسرا هتو ان او حروست هيگوئيم شهر موئين ريتو. <sup>3</sup> تئيون اسرائيلي پرميشور ننه پوڪاريو ڪم تون اوتا پادشا ڪن لوھ را نو هو رت هتا ان اونه ويھ سالون ٿي اسرائيليون ننه الاهي تنگ ڪريا تا.

<sup>4</sup> اوتون ڏيئون ۾ ايشور رو نياپو ڏيڏا واري، دبورہ نومي هيڪ ٻائي هئي. او اسرائيلي قوم رئي اڳيون هئي ان منڪون رو نيا ڪرتي. او ليفيدوت رئي گهر واري هئي. <sup>5</sup> اوتون افرائيم را قبيل را ڏونگر وارا علاقا موئين رامه ان بيت ايل شهرن وسا ڪجي را وٽ نيسي ريتي، جي دبورہ رئي ڪجي ڪيوراتي، ان اسرائيلي قوم را منڪ اوتا ڪن نيا هارو زاتا. <sup>6</sup> اونه نياپو ميلين ابي نوحه را ڏيکرا برق ننه نفتالي را قبيل وازون را شهر قادس ٿي تيزاوين اوتا ننه ڪيڏو: ”پرميشور اسرائيلي قوم رنه ايشور تمون ننه اي حڪم ڏيڏوھ جي، تون تبور ڏونگر مانھ سڙ ان نفتالي را قبيل ان زولون را قبيل موئين ٿي ڏھ هزار آدمي آپ پيرا لي زالا! <sup>7</sup> هون آپ ايشور يابن ري قوج را اڳيون سيسرا ننه، اوتا رون رتون ان اوتا ري قوج ننه تون ڪن قيسون نڍي موئين توڻي آبه ان اوتا ننه تارا هات ۾ ڏيهه پرو.“ <sup>8</sup> تيا مانھ برق دبورہ ٻائي ننه ڪيڏو: ”جي تمي آپ مون پيرا هالشو تون هون زائيھ پڻ جي تمي مون پيرا نئين هالو تون هون نئين زائون.“ <sup>9</sup> اونه ڪيڏو: ”هون ضرور تمون پيرئي هاليھ پڻ تمارنه ايشور ري وات مانھ شڪ ڪريا ري ڪري ايئا جنگ ۾ تمون

نٺ ڪئين مونَ نئين زڙڻه ڪم تون پرميشور سڀسرا نٺ هيڪي ڏوشي را هات موئين ڏيشي پرو- ”تئين دبوره ٻائي اوني ان برق پيڙئي قادس شهر هومئي ڳئي-<sup>10</sup> اوتنه پوڳين برق زولون ان نفتالي رون قپيلون نٺ آپ ڪن قادس شهر ۾ تيڙيا- او ڏه هزار آدمي اوتا را قوجي تين جنگ ڪروا رونا ٿيا ان دبوره پڻ اوتا پيڙئي ڳئي-

<sup>11</sup> هوٺه قيني قوم رو جبر نومي منڪ، جيو موسي را هارا حباب ري نسل موئين ٿي هتو، اوتنه آري قوم رون پيزون منڪون نٺ ساڌين قادس شهر ڏوڪڙو ضعنييم شهر ڪن بلوط را موتا وڻ ڪن آيو تنبو ڪوڙيو-

<sup>12</sup> زئين ڪنعاني قوم ري قوج را آڳيون سڀسرا نٺ ڪپر پڙئي جي ابي نوعم رو ڏيڪرو برق تبور ڏونگر مانھ پوڳي آيوھ،<sup>13</sup> تئين سڀسرا آڀرا ٻڌا رت، مطلب لو را نو هو رت ان ٻڌون قوجيون نٺ جيا حروست هيگوييم شهر ۾ هتا قيسون نڌي ۾ مڳايا-

<sup>14</sup> تئين ٻائي دبوره برق نٺ ڪيڏو: ”اونو! ڪم تون آز پرميشور سڀسرا نٺ تمارا هات ۾ ڏيڏوه رو- زوئو! پرميشور تمون مور ٻڌو ڪئين تيار ڪريوه پرو- ”تئين برق تبور ڏونگر ٿي نيسو اوتريو ان او ڏه هزار آدمي اوتا وونهڙ وونهڙ هتا-<sup>15</sup> ان پرميشور سڀسرا نٺ ان اوتا رون ٻڌون رتون ان ٻڌي قوج نٺ برق آڳر تروٿار ٿي ٻيوڙاوين ايل اول پڳڙيا ان سڀسرا رت ٿي اوترين پنڌ ٿي پنڌ پاڳيو-<sup>16</sup> برق حروست هيگوييم شهر هوڏي رتون ان قوجيون وونهڙ ڳيو ان سڀسرا رٿي ٻڌي قوج تروٿار ٿي مرائي ڳئي ان هيڪي پڻ نه پڇيو-

<sup>17</sup> پڻ سڀسرا جبر قيني را تنبو هومو پنڌ پاڳيو، ايٿا هارو جي حضور شهر را يادشا يابين ان جبر قيني را گهراڻا ۾ ٺاه هتو- اوتنه جبر رٿي ڏوشي ياعيل آڀرا تنبو موئين هيڪليي بينئي ٿي-<sup>18</sup> تئين ٻائي ياعيل سڀسرا نٺ مڙيا هارو نيهرئي ان اوتا نٺ ڪيڏو: ”او مارا مالڪ، آوو را! پيٿائو مت! تنبو ۾ آوو را- ”تئين سڀسرا اوتا را تنبو ۾ ڳيو ان اوتنه اوتا نٺ ڪمبل اوڍاڙيو پرو-<sup>19</sup> تئين سڀسرا اوتا نٺ ڪيڏو: ”مون نٺ پيڌا هارو توڙڪوڪ

پوڻي ڏٺه ڪم تون هون ترهو سون- ”پڻ اونه ڏوڏ رئي هندارئي ڪولين اوتاهن ڏوڏ پيدا هارو ڏيڏو ان پسنه وڙي اوتاهن ڪمبل اوڍاڙيو پرو-<sup>20</sup> تون سيسرا اوتاهن ڪيڏو: ”توڻ گهڻي مانه اوڀئي ري ان جي ڪوئي منڪ آوين توڻ ننه پونسهه جي، ايتنه ڪوئي منڪ سئه؟“ تو توڻ ڪي پرو، نا! ڪوئي نٿي-“

<sup>21</sup> زئيون سيسرا پري اونگه موئين هتو تئيون جبر رئي ڏوشي ياعيل تنبو رو ڪيلو ان هتوڙو لين سوني مات اوتاهن ڏوڪڙي ڳي ان ڪيلو اوتاهن ري ڪون ري پاڙ مانه راکين ايرو هتوڙو هڻيو جي او پار ٿين زمي موئين ڪي ڳيو ان سيسرا مري ڳيوه-<sup>22</sup> اونه ئي توڻه برق سيسرا ري ڳوت ۾ اوڻهه آيو تون ياعيل اوتاهن مڙيا هارو آئي ان اوتاهن ڪيڏو: ”آوو را! هون تمون ننه او منڪ ڏيڪاڙونه جيا ننه تم ڳوتوه ريا-“ تئيون برق اوتاهن ڪننه زائين زوڻه تون سيسرا مرل پڙيوه ان ڪيلو اوتاهن ري ڪون ري پاڙون وسا ڪيل سئه-

<sup>23</sup> اونه ڏي ايشور ڪنعان را پادشا يابين ننه اسرائيل رون منڪون هومو پاڙيو-<sup>24</sup> پسنه اسرائيلون رو پر ڪنعاني قوم را پادشا يابين رنه ڪلاڦ وڌنو ڳيو، اتي هوڏي جي اوتي ڪنعاني قوم را پادشا يابين رو ناش ڪريو پرو-

ٻائي دبوره ان برق رو گيت

**5** اونه ڏي ٻائي دبوره ان ابي نوعم رنه ڏيڪرته برق اي گيت ڳايو،

<sup>2</sup> ”اڳيون زئيون اسرائيلي قوم رئي اڳيون ڪري

تون قوم را منڪ ڪشي ٿي جنگ ۾ حصو لڌا هارو پيڙا ٿيا

پرميشور را وڪوڻ ڪرو!

<sup>3</sup> او پادشائون، هومپرو! او وزيرون، ڪون ڏيو!

هون آپ پرميشور رئي استوتئي ڪريه

هون آپ پرميشور اسرائيلي قوم را ايشور را ڳڻ ڳايه-

4 او پرمیشور! زئيون تون شعير دُونگر ٿي نيهريو،

زئيون تون اڏوم را ميدون ٿي وُڍيو،

تئيون زمئي ڏهئي ان آڪاش پڻ ٽوتي پڙيو۔

واڏرون ٿي پڻ پريون رڻه مون مي ورهيو۔

5 سينا دُونگر را پرميشور هوما ٻڌائي دُونگر ٿرٿرائي ڳيا

پرميشور اسرائيلي قوم را ايشور هوما۔

6 عنات را ڏيڪرا شمر رن ڏيئون موئين

ان ياعيل رن ڏيئون ۾ مارڳ هونا پڙيا تا

ان مسافر پڳ شيرڙيون ٿي آوتا زاتا۔

7 اسرائيلي ٻاهراڙي ۾ نٿا ريتا، اُئون را ڳوم ان پاڙا هونا ٿي ڳيا تا

زئيون هُڏي هُون دُوره اسرائيلي قوم رئي مان تين نه اُونئي۔

8 پڻ اُئي نوا نوا ڏيو سُونديا

تئيون شهر رن دروازون مانھ ئي جنگ ٿيوا مڏي۔

چاليھ هزار اسرائيليون موئين

هڪڙھ پڻ ڍال ڪا پالو ڏيڪيام نه آيو!

9 مارو من اسرائيلي قوم رن جنگي آڳيونون هومو لاڳيوھ

جيا منڪون موئين ٿي ڪشي ڪشي جنگ ڪريا هارو پيڙا ٿياھ۔

پرميشور را وڪوڻ ڪرو!

10 تمي جيا ڌورون ڳڏيڙون مانھ سوار ٿيوھ ريا

تمي جيا ٺاڻوڪون ڳاڏيلون مانھ پيهوھ

تمی جیا ویتاڙو سو

تمی ای ٻڌو کڻن همپراو.

<sup>11</sup> تیر هاڪلیا وازون ری کاش ٿی شیتئم پوڻی ری ویریون کن

پرمیشور رن نائوکن کومون را پارام هومپرايو زاشی.

اسرائیلی قوم ۾ اوتا ری هاسائی را گیت گایا زائھ

اوتھ توئھ پرمیشور را منک اوتري اوترین شهر را دروازا مانھ گیا.

<sup>12</sup> زاگو! زاگو! او ٻائی دبورھ!

زاگو! زاگو! گاؤ گیت!

اوتو، او برق! او ابي نوعم را ڏیکرا، آپرون دشمنون نئھ قیدی ناوو!

<sup>13</sup> ریل منک اگیوونون کن اوتري آیا،

پرمیشور را منک جنگی جوڌون ٿی مقابلو کریا هارو مون کن اوتري آیا.

<sup>14</sup> افرائیم را قبیلہ را علاقا واڙا تمون وونھو آیا، جیو علاقو پیرھین

عمالیقی قوم رو هتو.

بنیامین را قبیلہ واڙا تمارون منکون پیرا هتا.

مکیر را وستار موئین ٿی جنگی اگیوون اوتري آیا.

ان زبولون را قبیلہ موئین ٿی او منک آیا جیون را هات ۾ اکتیار وازو گیدیو هتو.

<sup>15</sup> ان اشکار را قبیلہ را اگیوون ٻائی دبورھ پیرا پیرا هتا

اشکار را قبیلہ واڙا برق پیرا گیا.

برق رو حُکم موئین او منک زھور موئین اوتربا.

رُوبن را قبیلہ واڙا الهائی موزھومڻ ۾ هتا.

16 او رُوبَنَ وازون، تمی کم ذراژون رئي شيند هومپريا هارو ريديون را واژا

موئين پينا ئي پينا ریا؟

رُوبَنَ را قَبِيلا واژا الهائي هكوتكو كروا مډيا.

17 جلعاد را علاقا واژا يردن ذريا رئه اونه پار پينا ریا.

ان دان را قَبِيلا واژا پيژيون موئين کم ریا؟

آشر را قَبِيلا واژا سمونيد را كپ مانه پيژون رون اډون مانه پينا ریا.

18 پښ زوونون را قَبِيلا واژا آيرو جيو ډيدا هارو تيار هتا

ان ماتليا ميدونون ږ نفتالي را قَبِيلا واژا پښ.

19 پاډشائي آوين جنګ كرئي

هم كنعان ري پاډشائي تعناك شهر كن

مجدو ري نډي كن جنګ كرئي

پښ اوئون ننه چونډي رو تكو ئي هات نه آيو.

20 آكاش را پاها ټي تاري پښ جنګ كرئي

اوئي آبرا آبرا مارګ موئين سيسرا ټي جنګ كرئي.

21 قيسون نډي اوئون ننه توږي گڼي

او ئي زونئي نډي جڼي قيسون نډي سته.

او مارا من! تون ډاډو ټين وته.

22 گهوژون رون تاږونون ټي زمي ډرزي اوئي

اوئا را گهوژا تګا اګر وډيا.

23 پرميشور رئه ډوت كيدو: 'تمی ميروز شهر ننه هراپ ډيو!

اوئا موئين ریا وازون ننه الاهي پتتا ډيو!

ڪم تون اُو پرميشورِ ري مدت ۾ نه آيا،

جنگي جوڌون رو مُقابلو ڪريا ۾ پرميشورِ ري مدت ۾ نه آيا۔

24 پڙيون ڏوشيون ٿي وڌيڪ دن هونءَ جبرِ قيني رئي ڏوشي ياعيل،

اُو ڏوشي جي تنبُوئون موئين ره اُوئون ٿي گهٽئي پاڳواڙي ٿيشي۔

25 سيسرا پوئي مونگيو، اُوئه اُوئا نئه ڏوڏ ڏيڏو

اميرون را پيئالا ۾ اُو اُوئا هارو ڏئي لي آئي۔

26 اُوئه ڏاوا هات موئين ڪيلو

ان زمنا هات ۾ واڍا رو هتوڙو ليڏو

ان هتوڙا ٿي سيسرا رو مائو ڦوڙي نوڪيو۔

ڪيلو اُوئا ري ڪون ري پاڙ ۾ پار ٿي گيو۔

27 اُوئا رون پڳون مانءِ نيمو ان پڙيو ان پڙيو ريو۔

اُوئا رون پڳون مانءِ نيمو ان پڙيو

جيئنه نيمو، اُوئنه پڙيو ان مري گيو۔

28 سيسرا ري مان آريا ٿي زويو ان پُوڪار پاڙي۔

اُوئه آريا رون قونڪون ٿي زويو ان پُوڪار پاڙي

جي، 'اُوئا را رت ڪم نٿي آيا؟

اُوئا رون رتون رون پئيڙون رئي آواز ڪم نٿي آوتِي؟'

29 اُوئا ري عقل واري ڏوشي جواپ ڏيڏو۔

پڻ اُوئه آڦوڪي آڀرا آپ نئه جواپ ڏيڏو۔

30 'اُوئون نئه لوت رو شيمون زڙيو هوشي، ان همئنه اُو شيمون وراوتو هوشي۔

هر آدمي نئه هيڪ هيڪ نئين پڻ بي بي ڪُوناري زڙي هوشي۔

ان لُوت را شيمونَ موئين ٿي سيسرا نئه رنگ رنگيلا لُگهٿا نئين پڻ  
 لُوت را شيمونَ موئين ٿي پرت پرل رنگ رنگيلا لُگهٿا زڙيا هوشي -  
 لُوت را شيمونَ موئين ڳرا مانه هٿيا هارو نائوڪا نائوڪا پرت پرل لُگهٿا  
 نٿي زڙيا ڪي؟

<sup>31</sup> او پرميشور! تمارا ٻڌائي دشمن امرام مري زائ!  
 پڻ تمون ٿي پريم ڪرنارون نئه ايوو مونَ شونَ زڙئه جيوو ڌوڙا ڏي رو  
 هورز رو شونَ هوئه!  
 هيا ڪيڙ ملڪ موئين چاليه سال سڪ شونتئي رئي -

### جدعون اسرائيلي قوم رو اڳيوون

**6** اسرائيلي قوم ري منڪي وڙي پرميشور رو ڏوه ڪريو ان پرميشور اوتون نئه هات  
 سالون هوڏي مدياني قوم را هات ۾ ڏيڏا پرا - <sup>2</sup> تئيون مدياني قوم رو ٻڙ اسرائيليون  
 ٿي گهڻو ٻڙوڪو ٿيو ان مديانيون ري ڪري اسرائيلئي آپ نئه پچايا هارو پونئرون موئين،  
 ڪوتون موئين ان ڏونگرون موئين هتيا ري جڳايون ناوي پري - <sup>3</sup> ان ام ٿيتو جي زئيون  
 اسرائيلي ڪئينڪ واوتا تون مدياني ان عماليقي قومون را منڪ ان اڳوڻيا علاقا را منڪ  
 اوتون مانه حملو ڪريا هارو آوتا <sup>4</sup> ان اوتون ري زمي مانه ڏيرا نوڪين پورا ملڪ ۾ غزه  
 شهر هوڏي ڪيترون رو ڌون ڪتم ڪرتا پرو - اسرائيليون هارو ڪئين نه پچاوتا، نه ري، نه  
 ڳائي، نه ڳڏيڙا، <sup>5</sup> ڪم تون او آپرو مال ان آپرا تنبو پيڙا لين آوتا ان او ٿيڌون رون ٿوڙون  
 را زم الهائي هوتا، اوتون را منڪ ان اوتون را اونٺ ڳنيا ٿي ٻارا هوتا - او ملڪ نئه تپاه  
 ڪريا هارو آوتا - <sup>6</sup> تيام مديانيون ري ڪري اسرائيليون را الهائي پونڌا هار ٿي ڳيا تا تئيون  
 اسرائيلي قوم ري منڪي پرميشور نئه پوڪاريو -

<sup>7</sup> پستہ زئيون اسرائيليئي مديانيون ري كري پرميشور نئه پوكاريو <sup>8</sup> تئيون پرميشور اسرائيلي قوم وازون ڪن آڀرو نياپو ڏيڏا هارو هڪا سنت نئه ميليو. اونه سنت منڪون نئه ڪيڏو: ”پرميشور اسرائيلي قوم رو ايشور ام ڪئھ، ’هون تمون نئه مصر ملڪ ٿي ڪاڊين ايئنه لي آيوھ ان مئين تمون نئه ڳلومي ري حالت ٿي ٻارا ڪاڊياھ. <sup>9</sup> مئين مصريون را هات ٿي ان تمون نئه ڏک ڏيڏا وازون ٻڌون منڪون رون هاتون ٿي تمون نئه پڇاياھ ان تمون هوما اوتون نئه ڪاڊياھ ان اوتون رو ملڪ تمون نئه ڏيڏوھ. <sup>10</sup> مئين تمون نئه ڪيڏو تو جي، ”پرميشور تمارو ايشور هون سون. تمی اموري قوم رون ڏيو ڏيوٽونون ٿي مت پٽايا جيون را ملڪ موئين تمی ربوھ.“ پڻ تمی مارئي وات نه مونئي.“

<sup>11</sup> پستہ هڪ ڏي پرميشور رو ڏوت آوين عفره شهر ڪن بلوط را وڻ نيسو پڻو. هائي زمئي يوآس رئي هئي. يوآس ايعزر ري پيڊي ٿي هتو. هوءَ يوآس رو ڏيڪرو جدعون انگڙورون رو رس ڪاڊيا وازا هڪا گهوٽا موئين ڪڻڪ ڳاهتو تو زم اوتئا نئه مديانيون ٿي هتازين راکئھ. <sup>12</sup> تئيون پرميشور رئه ڏوت اوتئا نئه ڏرشن ڏين ڪيڏو: ”او پڙوڪا جوڏا، پرميشور تون پيڙو سئھ.“

<sup>13</sup> جدعون اوتئا نئه ڪيڏو: ”او مارا مالڪ، جي پرميشور امون پيڙو سئھ، تو پستہ امارا ايوا هار ڪم سئھ؟ اوتئا را ٻڌا چمتڪار ڪيال ڳيا جيا رئي وات امارا ٻاپ ڏاڏا امون ٿي ڪرتا ان اي پڻ ڪيتا جي، ’ياڏ راکو! پرميشور آڀون نئه مصر ري ڳلومي ٿي ڪاڊين ايئنه لي آيوھ.‘ پڻ هوءَ تو پرميشور امون نئه ساڏي ڏيڏاھ ان امون نئه مديانيون را هات ۾ ڏيڏاھ پرا.“

<sup>14</sup> تئيون پرميشور اوتئا هومو وڙين ڪيڏو: ”تون آڀرا پڙ ٿي زا ان اسرائيلي قوم نئه مديانيون را هات ٿي سڏاؤ! هون آپ تون نئه ميلونھ ريو.“

<sup>15</sup> اُوئە پرمیشور نئە کیدو: ”اُو مالک، اسرائیلی قوم نئە هُون پِلا کم کَرین سَداون؟

منسِي را قِپِلا موئین تِي ٻَدون تِي گهت مون واژِي اکايي مارِي سئە ان مارا ٻاپ را گهر موئین ٻَدون تِي نونو هُون سون.“

<sup>16</sup> پرمیشور اُوئا نئە کیدو: ”هُون تُون پِزو هوئیه ان تُون مِديانِيون نئە ام مارِبه زم اُو رُوگُو هیکئە آڊمي هوئە.“

<sup>17</sup> تئِيون جِدعون اُوئا نئە کیدو: ”جي مُون مانه تمارِي دئِيا رئي نظر سئە تون ايئا رو کوئي نيشون دِیکارو، جيا تِي پک تئە جي تمِي ايشور سو جي مُون تِي واتون کروه رِبا. <sup>18</sup> هوئە تمِي ايئون مت زايا زئِيون هُوڊِي هُون تمون کن پاسو نه آون ان آپرو دُون لي آوين تمون هومو نه راکون.“ <sup>19</sup> تئِيون جِدعون زائين هیک چيلو ان اڌ مڻ آئا ري روتي تيار کري ان مونه نئە هیکا نونٻزا مِ ان شورو پِزا مِ نوکين بلوط را وڻ نيسو آوين اُوئا هومو راکيو. <sup>20</sup> تئِيون ايشور رئە دُوت اُوئا نئە کیدو: ”اي مونه ان روتي لي زائين اُوئا تیکري مانه راک ان شورو اُوئون مانه نوم پرو.“ اُوئە همروم کريو، <sup>21</sup> تئِيون پرمیشور رئە دُوت اُوئا دُونگِڙي تِي جئِي اُوئا را هات موئین هتئِي مونه ان روتِيون نئە سِٻاڙي، تون اُوئا تیکري تِي دِیوتا نيهریو ان اُوئا مونه ان روتِيون نئە راک کري پري. تئِيون پرمیشور رو دُوت الوپ تِي گِيوه.

<sup>22</sup> تئِيون جِدعون هَزمي گِيو جي اُو پرمیشور رو دُوت هتو. تيام جِدعون کیدو: ”او پرمیشور، مارا پريو! مُون نئە الهائي ڏک سئە، جي مئین پرمیشور را دُوت نئە اونکِيئي پاڙيوه!“

<sup>23</sup> پڻ پرمیشور اُوئا نئە کیدو: ”تُون هک شونتي تِي رئە! پِئا مت! تُون نئين مرئە.“

<sup>24</sup> تئِيون جِدعون اُوئە پرمیشور هارو مال ساڙيا رئي ويڏئي ناوئي ان اُوئا ماڳ رو نوم

پرمیشور شونتئي ڏينار راکيو. هائي آڙ هُوتي ابيعر رِي پيڊي واڙون را علاقا ۾ عُفره شهر ڪن سئ.

<sup>25</sup> هاڳي رات پرميشور اُئا نئ ڪيڏو: ”ٿارا ٻاپ رون ٻڙدون موئين ٿي پيزو ٻڙه لي زا جيو هات سال رو سئ. پسئ بعل ڏيو را نوم مانھ مال ساڙيا رئي ويڏئي جئي ٿارا ٻاپ رئي سئ ڍاھ پري! پسئ اُئا ويڏي ڪن يسيرت ڏيو رِي لاڪڙا واڙي مورتِي نئ واڊي نوڪ! <sup>26</sup> تيا ڪيڙ ايئا ڏونگر رِي سوتي مانھ پرميشور آڀرا ايشور را نوم مانھ مال ساڙيا رئي ويڏئي ناو ان اُئا پيزا ٻڙه نئ لين اُئا يسيرت ڏيو رِي لاڪڙا واڙي مورتِي نئ واڊين ايندئي ڪري ان ويڏي مانھ هاڙا ٻڙه رو ڏونپ ساڙا! <sup>27</sup> تئيون جڏعون آڀرون نوڪرون موئين ٿي ڏھ آڏمي پيزا لين همروم ڪريو زم پرميشور اُئا نئ ڪيڏو تو. پڻ اُو هائي ڪوم آڀرا ٻاپ رِي اڪائي ان شهر رون منڪون رِي ٻيڪ رِي ڪري ڏي رو نه ڪريو، پڻ رات رو ڪريو.

<sup>28</sup> زئيون اُئا شهر را منڪ هوار را وِلا اُونيا تئيون اُئي پاڙيو جي بعل ڏيو را نوم مانھ مال ساڙيا رئي ويڏئي ڍاھل پڙئھ ان اُئا ڪن يسيرت ڏيو رئي لاڪڙا واڙي مورتِي وادل پڙئھ ان اُئا نوي ناول ويڏي مانھ اُو پيزو ٻڙه سڙايو ڳيوھ. <sup>29</sup> اُئي هِڪا پيزا نئ پُونسيو: ”اي ڪوم ڪئئ ڪريوھ؟“ زئيون اُئي ڪُڀر پاڙئي ان جونچ ڪري تئيون ڪُڀر پڙئي جي يُوآس رءُ ڏيڪرئ جڏعون اي ڪوم ڪريوھ. <sup>30</sup> تئيون شهر رِي منڪي يُوآس نئ ڪيڏو: ”تون ٿارا ڏيڪرا نئ ٻارو ڪاڍي آو، تو امي اُئا نئ قتل ڪرون ڪم تون اُئ بعل هارو مال سڙايا رئي ويڏئي ڍاهئي پري ان يسيرت ڏيو رئي لاڪڙا واڙي مورتِي پڻ واڊي پري.“

<sup>31</sup> يُوآس اُئون ٻڙون نئ جيا اُئا هوما اُويا تا ڪيڏو: ”تمي ڪم بعل هارو جهڳڙو ڪروھ ريا؟ جي تمي اُئا نئ پڇايا هارو مون ٿي جهڳڙو ڪرئو تون هوار هُوتي تمي پڻ

مراڻي زاشو. جي بعل هاس ۾ ايشور سٺ تو اُو آڻ اُوئا منڪ ٿي جهيڙو ڪرڻ جيئن اُوئا را نوم مانھ مال ساڙيا رئي ويڏئي ڏاهيھ. ”<sup>32</sup> تيام اُوئ ٿي ڏي جِءون رڻ ٻاپ اُوئا رو پيزو نوم ڀر بعل راڪيو، جيا رو مطلب سٺ ”بعل جهيڙو ڪرڻ“ ڪم تون اُوئ جِءون را پارام آڻ ڪيڏو جي، ”بعل آڻ اُوئا ٿي جهيڙو ڪرڻ ڪم تون اُوئ بعل را نوم رئي ويڏئي ڏاهيھ.“

<sup>33</sup> پستھ مدياني ان عماليقي قوم را منڪ ان يردن ڌريا رڻ اڳوڻيا پاها را پيزا منڪ پيزا ٿيا ان يردن ڌريا پار ڪرين يزريعل زهوڙ موئين تنبو هڻيا. <sup>34</sup> تئيون پرميشور رئي آتما جِءون ۾ آوئي ان اُوئ جنگ ڪريا هارو رڻ شينگڙو وڳاڙين ابيعر ري پيڊي واڙون نٽھ آڻ لار وُودا هارو تيڙايا. <sup>35</sup> پستھ اُوئ آڻا ڦيلا واڙون ڪن مطلب منسي را ڦيلا رون ٻڌون منڪون ڪن نياپو ڏيڏا واڙا ميليا ان اُوئون نٽھ پڻ آڻ لار وُودا هارو تيڙايا ان اُوئ اشر، زبُولون ان نفتالي رون ڦيلون ڪن پڻ نياپو ڏيڏا واڙا ميليا ان اُو پڻ آوين اُوئون پيزا ٿي ڳيا.

<sup>36</sup> تئيون جِءون ايشور نٽھ ڪيڏو: ”جي تمي آڻا ڪيڏا پرموئڻه ماري هاڻي اسرائيلي قوم نٽھ سڏاوا ڪروھ <sup>37</sup> تو زوئا! هُون رڍ رئي اُون ڪڙا ۾ راڪونھ ريو ان جي نار رُوڳو اُون مانھ پڙڻھ ان آهڻه پاهڻه رئي ٻڌئي زمئي هُڪئي هون، تون هُون زوئي ليه جي تمي آڻا ڪيڏا پرموئڻه ماري هاڻي اسرائيلي قوم نٽھ سڏاوشو.“ <sup>38</sup> ان همروم ٿيو. اُو هوار رو ويلو اُونيو ان اُوئ اُون نٽھ نيپوڙئي تون اُوئا موئين ٿي هيڪ پيئالو پوئي نيهريو. <sup>39</sup> تئيون وڙي جِءون ايشور نٽھ ڪيڏو: ”ميريونئي ڪرين مُون مانھ ڪاوڙ مت ڪريا! هُون هيڪ وار وڙي عرض ڪرونھ جي ايئا اُون ٿي هيڪ وار وڙي پرڪ ڪرين تمارئي مرضي زوئي ليونھ. هون رُوڳئي اُون هُڪئي رڻ ان آها پاها ري ٻڌي زمي مانھ نار پڙڻه.“ <sup>40</sup> ان

ايشور اوتھ رات همروم ڪريو۔ روگئي اُون ھوڪئي رئي پڻ آھا پاھا ري ٻڌي زمي ماڻھ  
نار پڙيو۔

### جِدْعُون مِديانيون نئھ ھاراوئھ

**7** تئيون يربعل مطلب جِدْعُون ان ٻڌائي منڪ جيا اوتھا پيڙا هئا هوار را اُونيا ان حرود  
را نيرا ڪن تنبو توڻيا۔ مِديانيون را تنبو اوتھا رتھ اوتر هوما مورھ ڏونگر ري زھور  
موئين هئا۔

<sup>2</sup> تئيون پرميشور جِدْعُون نئھ ڪيڏو: ”تُون پيڙا اتا گھڻا منڪ سئھ جي هُون مِديانيون  
نئھ اوتون رون هات ۾ نئين ڏيون۔ ام نہ تئھ جي اسرائيلي مُون هوما آڪڙ ٿي ڪئھ جي،  
'امي آڀرا ٻڙ ٿي آڀرا آپ نئھ سڏايھ۔‘“ <sup>3</sup> هوءَ تُون منڪون نئھ ام ڪئھ جي، ”جيو پڻ  
پيئاتو هوءَ ان ڏڪتو هوءَ، اُو جلعاد ڏونگر ٿي پاسو زائھ پرو۔“ تئيون اوتون موئين ٿي  
ٻاويھ هزار منڪ پاسا ڳيا پرا، ڀاڳي ڏھ هزار ڀڄيا۔

<sup>4</sup> تئيون پرميشور جِدْعُون نئھ ڪيڏو: ”منڪ هنزون پڻ گھڻا سئھ۔ تيام تُون اوتون نئھ  
نيرا ڪن تيڙي زا ان اوتھ هُون تُون هارو اوتون نئھ آزماويھ۔ تئيون جي هُون تُون نئھ ڪونھ  
جي 'اي تُون پيڙو زائھ'، اُو ئي تُون پيڙو زاشي۔ ان جي هُون ڪون جي 'اي تُون پيڙو نہ  
زائھ'، تون اُو نئين زائھ۔“ <sup>5</sup> تئيون جِدْعُون اوتون نئھ نيرا ڪن نيسو تيڙي ڳيو ان پرميشور  
جِدْعُون نئھ ڪيڏو: ”جيو جيو آڀري جيب ٿي ڪوترا را زم هٻڙڪا ڪرين پوڻي پيئھ اوتون  
نئھ ڌار ڪر ان امرورم جيا آڌمي ڳوڏا ڪوڙين پيئھ اوتون نئھ ڌار ڪر۔“ <sup>6</sup> جيئھ ٻُڪ ٿي  
هٻڙڪا ڪرين پوڻي پيڏو اُو ڳڻپ ۾ ترڻ هو منڪ هئا ان پيڙي ٻڌي ڳوڏا ڪوڙين پوڻي پيڏو۔

<sup>7</sup> تئيون پرميشور جِدْعُون نئھ ڪيڏو: ”هُون ايئون ترڻ هو آڌميون ري هاڻي تمون نئھ سڏايھ  
جيئھ هٻڙڪا ڪرين پوڻي پيڏو تو ان مِديانيون نئھ تارا هات ۾ ڏيھ پرا۔ تيام هوءَ پيڙون  
ٻڌون منڪون نئھ آڀري آڀري گھري پاسا رونا ڪر!“ <sup>8</sup> تئيون اوتھي آڀرا کاڌا پيڏارو شيمون

ان رڻ شينگڙا لڏا ان جِدهونَ هاڻيون ترڻ هو آڏميون شيوا پڙيون ٻڌون اسرائيلي منڪون نٿو  
اوتون رن گهرون هوما روونا ڪريا پرا.

هوئ مديانيون را تنهو نيسا زهوڙ موئين هتا.

<sup>9</sup> اوتہ رات پرميشور جِدهونَ نٿو ڪڍو: ”اوت ان نيسو تنهون موئين زا ڪم تون  
اوتون نٿو ٿارا هات ۾ ڏيڏا را. <sup>10</sup> پڻ جي تون نيسو زيا ٿي پيائڻ، تون تون آڀرا شيواڌاري  
فوراه پڙو تنهون ۾ زا <sup>11</sup> ان اوتہ تون هومپري ليه جي او ڪي ڪئ رهيا. ايٺا ڪيڙ تون  
۾ هيٺ آشي رئي ان تون اوتون ٿي جنگ هارو اوتري پڙيه.“ پسته او آڀرا شيواڌاري  
فوراه پڙو تنهون هومو اوتون قوجيون ڏوڪڙو ڳيو. <sup>12</sup> مدياني ان عماليقي قوم وارا ان  
يردن ڌريا را اڳوڻيا پاها را ٻڌائي منڪ زهوڙ موئين ٿيڏون را زم پڪڙل هتا ان اوتون را  
اوت سمونڊ ري واري را زم اڻ ڳيا هتا.

<sup>13</sup> زبون جِدهونَ اوتہ پوڳيو تيون اوتہ هيڪ منڪ آڀرو شپنو آڀرا ساڻي نٿو ام  
همپراوتوت ريو: ”هومپرا! مون نٿو هيڪ شپنو آيوه. زو رئي هيڪ روئي مديان هومئي  
رڙتي تنهو ڪن پوتي ان اوتا ٿي ايوئي تڪروئي جي او پڙو نو ان تپاه ٿي ڳيو.“  
<sup>14</sup> تيون اوتا رٿو ساڻي هايا شپنا را پارام ڪڍو: ”ايٺا روتي رو مطلب اسرائيلي آڏمي  
يواس را ڏيڪرا جِدهونَ ري تروار شيوا پڙو ڪئين نٿي. ايشور آڀون مديانيون ري ٻڌي  
قوج نٿو اوتا را هات موئين ڏيڏي پري.“

<sup>15</sup> زبون جِدهونَ شپنو ان اوتا رئي هزموي هومپري تيون نمين ايشور رو تورو مويو.  
پسته اسرائيليون رن تنهون ۾ پاسو زائين ام ڪيو مڏيو: ”اوتو! ڪم تون پرميشور  
مدياني قوج نٿو تمارون هاتون موئين ڪريه پري.“ <sup>16</sup> تيون اوتہ آڀرون ترڻ هو آڏميون را  
ترڻ توڙا نيا ان اوتون ٻڌون رن هاتون موئين هيڪو ڪو رڻ شينگڙو ان اوتا پڙو هيڪو ڪو  
ڪالي گهڙو پڻ ڏيڏو ان هر گهڙا موئين هيڪ ڏڪنو اونٻاڙ هتو. <sup>17</sup> پسته اوتہ اوتون نٿو

ڪيڏو: ”مُون نٿو زوتا ربا ان همروم ڪريا! زوئو، زئيون هُون تنبُوئون ڪن پُوڳون تئيون هُون زم ڪرون همروم تمي پڻ ڪريا! 18 زئيون هُون ان اُو ٻڌائي جيا مُون پيڙا سٺه رڻ شينگڙا وڳاڙشون، تئيون تمي پڻ تنبُوئون ري چاري پاھي رڻ شينگڙا وڳاڙيا ان اي نعرو هڻيا، ’پرميشور هارُو ان جِدعون هارُو!‘“

19 جِدعون ان اُو هو آڌمي جيا اُوئا پيڙا هتا آڏي رات را زئيون پوهرو ڏيڏا واڙا پڌليا، تئيون تنبُوئون ڪن ڳيا ان اُوئي رڻ شينگڙا وڳاڙيا ان اُوئون گهڙون نٿو ڦوڙيا جيا اُوئون رون هاڻون ۾ هتا. 20 اُوئو تُوئو ترڻي توڙيئي مطلب ٻڌي پيڙي رڻ شينگڙا وڳاڙيا ان گهڙا ڦوڙيا. پستو ڏکنا اُونٻاڙ آپرون زمئون هاڻون ۾ ان رڻ شينگڙا ڏاوا هاڻون ۾ لين اي نارا هڻيا: ”اي تروٿار پرميشور هارُو ان جِدعون هارُو!“ 21 اُو ٻڌا تنبُوئون ري چاري پاھي آپرا آپرا ماڳ مانھ اُپيا ربا. تئيون مڊيانيون رڻي قوج رڙ ڪرتئي پاڳئي ان اُوئي ترڻي توڙي نارا هڻي هڻين اُوئون نٿو پڳڙايا. 22 زئيون اُوئي ترڻ هو رڻ شينگڙا وڳاڙيا تئيون پرميشور مڊياني قوجيون نٿو هڪا پيڙا ٿي وڍاڙين تروٿار ٿي وڍاڙيا ان پستو اُو قوج صربرات شهر هومئي بيت سِطه شهر هُوڏي ان طبات شهر ڏوڪڙو ايبيل محوله شهر ڪن ڪنعان ملڪ را ڌنگ هُوڏي پاڳئي.

23 تئيون اسرائيلي آڌمي جيا نفتالي، آشر ان منسي رون ڦيلون ٿي آيا تا اُو مڊيانيون وونھڙ ٿيا. 24 تئيون جِدعون اِسرائيم را ڦيلا را ٻڌا علاقا ۾ نياپو ڏيڏا واڙون هات ام ڪي ميليو: ”مڊيانيون را مُڦايلا هارُو اوتري آوو ان اُوئون ٿي پيرھين بيت بره شهر هُوڏي يردن ڏريا پار ڪريا رون ٻڌون ماڳون مانھ قوضو ڪري ليو.“ تئيون اِسرائيم ري منڪي پيڙي ٿين بيت بره هُوڏي يردن ڏريا پار ڪريا رون ٻڌون ماڳون مانھ قوضو ڪري لڏو. 25 اسرائيلي مڊياني قوج رو پيڇو ڪريو، ان مڊياني قوم رون بيئون مُڪ آڳيوونون عوريب ان زئيبن نٿو زهالي لڏيا. اُوئي عوريب نٿو اُوئا پوٽا ڪن ماريو، جيا نٿو همئو عوريب رو پوٽو ڪئو، ان

زئيب نئه اوتا ذراڪ رس كاڊيا را گهوٽا ڪن ماريو جيا نئه همئنه زئيب رو گهوٽو ڪئھ۔  
پسنه اسرائيلي عوريب ان زئيب را ماتا واڊين يردن ذريا رئه اٿوٿليا پاھنه جڏعون ڪن لي  
آيا۔

### مڊيانبي قوم رئي هار

**8** تئيون افرائيم را قبيلا ري منڪي جڏعون نئه ڪيڏو: ”نمي امون نئه ڪم نه ڪيڏو  
زئيون نمي مڊيانبيون ٿي وڊوا ڳيا؟ امون ٿي ام ڪم ڪريو؟“ تيام اوئي اوئون ٿي  
الاهي واڌ ڪريو۔

<sup>2</sup> جڏعون اوئون نئه ڪيڏو: ”مئين تمارا جيوو ڪوئي موٽو ڪوم نٿي ڪريو۔ ڪي تمون  
افرائيم واڙون را چانتي واڙا انگور مارا ڏاڏا ابيعرز را وستار رون ٻڌون انگورون ٿي نائوڪا  
نٿي؟<sup>3</sup> ايشور مڊيانبيون را آڳيون عوريب ان زئيب نئه تمارون هاٿون ۾ ڏيڏا۔ تمارا جيوو  
هون نه ڪري هيڪيوھ۔“ زئيون اوئه اي ڪيڏو تئيون اوئون رئي ڪاوڙ گهٽ ٿئي۔

<sup>4</sup> پسنه جڏعون يردن ذريا ڪن آيو ان آيرا ترڻ هو ساٿي آپ پيڙا لين يردن پار اوتريو۔ او  
ٽاڪل هوتون ئي مڊيانبي قوم واڙون وونهڙ ٿيتا ربا۔<sup>5</sup> سُڪات شهر ڪن پوڳين اوئه اوٽ  
رون منڪون نئه ڪيڏو: ”هون مڊيانبي قوم رون پيئون پاڌشائون زبح ان ضلمنع وونهڙ ٿيونھ  
ريو۔ نمي ايئون منڪون نئه ڪاڏا هارو ڏيو، جيا مون پيڙا سئھ۔ ڪم تون اي ٿاڪي ڳياھ۔“  
<sup>6</sup> سُڪات ري آڳيون ڪيڏو: ”ڪي زبح ان ضلمنع تارا قوضه ۾ آياھ را جي امي تاري  
قوج نئه روٽي ڏيونھ؟“

<sup>7</sup> جڏعون ڪيڏو: ”زئيون پرميشور زبح ان ضلمنع نئه مارا قوضه ۾ ڪرشي پرا، تئيون  
هون تمون نئه رڻ وڳڙا رون ڪنڊيرون ان ڪونتون ٿي شيريھ پرا۔“<sup>8</sup> پسنه او اوئون فنوايل  
شهر هومو ڳيو ان اوتا رون منڪون ٿي هاڳي وات ڪري ان فنوايل شهر ري منڪي پڻ

همروم جواب ڏيڏو جيوو سڪاٽيون ري منڪي ڏيڏو تو. <sup>9</sup> تيام اُوڻه فَنُوَيل رون منڪون نئه پڻ ڪيڏو: ”زئيون هُون هَازو هُورو پاسو آويه تئيون تمارو اي گهڊ ڍاهيه پرو.“

<sup>10</sup> اُوڻه تُوڻه زبح ان ضِلَمَنع آڀري قوج پيڙا قَرُور شهر ۾ هتا. ڪم تون اڳوڻليون منڪون ري ٻڌي قوج موئين ٿي پئرڪ هزار منڪ پچيا تا. پيڙا هيڪ لڪ ويه هزار منڪ مراني ڳيا تا جيا تروٿار ٿي وڊيا را ماهر هتا. <sup>11</sup> هُوڻه جِدَعون نُبَح ان يَڳبهاه شهرن رئه اڳوڻلئه پاهئه تنبوئون موئين ربا واڙون را مارڳ ٿي ڳيو ان اُوڻا قوج مانه حملو ڪريو ڪم تون اُو قوج پي پروا ٿين پڙئي تئي. <sup>12</sup> تئيون زبح ان ضِلَمَنع پاڳيا پڻ جِدَعون اُوئون وونهڙ ٿين بيئون مڊيانِي پاڌشائون نئه زهالي ليڏا ان ٻڌي قوج نئه پيوڙاوين پڳڙاوي پري.

<sup>13</sup> تيا ڪيڙ يُوَاس رو ڏيڪرو جِدَعون جنڳ پورو ڪرين حرس ري چڙهائي ڪن ٿي پاسو وڙيو. <sup>14</sup> پسئه پاسو وڙتون اُوڻه سڪات شهر ۾ ربا واڙون موئين ٿي هيڪا جووڻ نئه زهالين اُوڻا ٿي پڙا پونس ڪري، تون اُوڻه سڪات رون آڳيوئون ان موتون را پارام همپرايو جيا ستمتر هتا. <sup>15</sup> تئيون جِدَعون سڪات رون منڪون ڪن آوين ڪيڏو: ”زوئو، اي ربا زبح ان ضِلَمَنع جيا را پارام تمي مُون نئه ام ميٿو ڏين ڪيڏو تو جي، ’ڪي زبح ان ضِلَمَنع ٿارا قَوْضا ۾ آياه را جي امي ٿارون موڻهون نئه جيا ٿاڪي ڳياه روتي ڏيونه؟“ <sup>16</sup> تئيون اُوڻه شهر رون موتون نئه زهالين رڻ وڳڙا رون ڪنديرون ان ڪوتون ٿي ماري مارين سڪات شهر رون منڪون نئه شيڪت ڏيڏيھ. <sup>17</sup> تيا ڪيڙ اُوڻه فَنُوَيل شهر رو گهڊ ڍاهيو پرو ان اُوڻا شهر رون منڪون نئه قتل ڪريا پرا.

<sup>18</sup> پسئه اُوڻه زبح ان ضِلَمَنع ٿي پونسيو: ”جيون منڪون نئه تمي تبور شهر ڪن قتل ڪريا اُو ڪيا هتا؟“

اُوئي اي جواب ڏيڏو: ”جيوو تون سئه ايوا اُو هتا. اُو ٻڌا راز ڪُونُرون جيوا هتا.“

<sup>19</sup> تئيون اُوئه ڪيڏو: ”اُو مارا هڳا پائي هتا. تيام جيوتا پرميشور رو هون جي تمي اوئون نئه جيوتا ساڌو ها تو هون پڻ تمون نئه جيوتا ساڌيت پرا.“ <sup>20</sup> پسته اُوئه آپرا موتا ڏيڪرا يتر نئه ڪيڏو: ”زا! اوئون نئه قتل ڪر!“ پڻ اُوئه سوڪرئه تروٿار نه ڪاڏي ڪم تون اُو هزون نونو پاڙ هتو ان اوئا نئه پيڪ لاڳئي.

<sup>21</sup> تئيون زبح ان ضلمع جِ دعون نئه ڪيڏو: ”تُون آپ آوِين امون نئه مارا! ڪم تون جيوو آڏمي، ايوي اُوئا رئي طاقت.“ تيام جِ دعون زائين زبح ان ضلمع نئه ماري نوڪيا. ان اوئون رون اونون رون ڳرون را چندن هار ڪاڏين ليڏا را.

<sup>22</sup> پسته اسرائيلي قوم ري منڪي جِ دعون نئه ڪيڏو: ”امون مانھ راز ڪرو! تمي، پسته تمارو ڏيڪرو ان پسته تمارو پوترو پڻ، ڪم تون تمي امون نئه مڊيانيون را هات ٿي سڏاياھ.“

<sup>23</sup> تئيون جِ دعون ڪيڏو: ”نا هون تمون مانھ راز ڪريھ نڪو مارو ڏيڪرو! پڻ پرميشور ئي تمون مانھ راز ڪرئ!“ <sup>24</sup> ان جِ دعون اوئون نئه وڙي ڪيڏو: ”مارئي تمون ٿي هيڪ وينتئي سئه جي تمون موئين هر هيڪ آڏمي لوت را شيمون موئين ٿي هيڪ هيڪ مرڪئي مون نئه ڏئه ري.“ مڊياني قوم واڙا اسماعيل ري پيڏي را هتا ان اوئون ڪن هيم ري مرڪيون پيريا رو رَواز هتو.

<sup>25</sup> اوئي جواپ ڏيڏو: ”امي ڪشي ٿي ڏيشون.“ پسته ساڌر وساوي ان هر منڪ لوت ري مرڪيون موئين ٿي هيڪ هيڪ اوئا ۾ نوڪي. <sup>26</sup> او مرڪيون جي اُوئه مونگي تي وزن موئين هيڪ هزار هات هو تولا هتي. ايئا شيوا لوتل شيمون ۾ چندن هار، جهمڪا ان مڊياني پاڌشائون را وونگٽائي رنگ را لوگهڙا جيا اوئي پيريا تا ان هونڪرون هتي جي اوئون رون اونون رون ڳرون موئين هتي. <sup>27</sup> ان جِ دعون هايا هيم ٿي پوزاري رو ايوو پيرن نارايو جيو هاڳ ٿو پاڳ مڪ پوزاري واڙا ڪاس ويسڪوت جيوو هيڪ ويسڪوت هتو. جِ دعون اوئا

ننه آږا شهر عُفره ۾ راکيو ان اوتنه ٻڌي اسرائيلي آږا ايشور ننه ساڌين اوتا رڻي پوزا کړي. اوتون رو هائي کوم زنا جيوو هتو ان هائي جِدعون ان اوتا ري اکائي هارو قاهو ٿيو.

<sup>28</sup> هم مدياني اسرائيلي قوم رن منکون هيٺ آيا را ان اوئي وڙي کيڏي ماٿو اونسو نه اُڀاڙيو. ان جِدعون رن ڏيئون ۾ چاليه ورهه اوتا ملڪ ۾ سڪ شونتئي رڻي.

### يُوآس را ڏيکرا جِدعون رو سرگواس

<sup>29</sup> يُوآس رو ڏيکرو جِدعون جيا رو پيزو نوم يربعل هتو اي آږي گهري زائين ربوا مڏيو. <sup>30</sup> هوئه جِدعون را ستر ڏيکرا هتا جيا اوتا رو ئي رت هتا ڪم تون اوتا ري الاهي ڏوشي هتي. <sup>31</sup> اوتا رڻي هيڪ ٻونئي جي اوتا رڻي ڏوشي هتئي، اوسڪم شهر ۾ ريتئي. اوتا ٿي پڻ هيڪ ڏيکرو پيدا ٿيو ان جِدعون اوتا رو نوم ابي ملڪ راکيو. <sup>32</sup> يُوآس رو ڏيکرو جِدعون گهرڊو ٿين سرگواسي ٿيو ان اوتا ننه اوتا را ڏاڏا ابيعر را وستار را شهر عُفره ڪن آږا ٻاپ يُوآس را پونئيرا جيوو مقوم موئين راکيو.

<sup>33</sup> هوئه جِدعون رنه مرتون ئي اسرائيلي قوم وڙي آږا ايشور ننه ساڌين بعل نومي ڏيو ان هيون پيزون ڏيون وونهڙ وين زنا جيوو کوم ڪريو. اوئي بعل برت نومي ڏيو ننه آږو ايشور ٿيو. <sup>34</sup> اسرائيلي پرميشور آږا ايشور ننه يادا نه راکيو، جيئنه اوتون ننه چارون ٻاهون رن ڏشمئون رن هاٿون ٿي سڏايا تا. <sup>35</sup> نڪو وڙي اوئي يربعل مطلب جِدعون ري اکائي ٿي ٺاڻوڪو ورتاو ڪريو جيوو اوئه اسرائيليون ٿي ڪريو تو. جِدعون بعل ڏيو هارو مال ساڙيا رڻي ويڏئي ڍاهيا واڙو جيا رو پيزو نوم يربعل ٿيو.

### ابي ملڪ اسرائيلي قوم رو آڳيون

**9** تيون يربعل رو ڏيکرو ابي ملڪ سڪم شهر موئين آږون مومون ڪن ڳيو ان اوتون را ٻڌا ڪٿم رن منکون ننه ام ڪيڏو: <sup>2</sup> ”سڪم ۾ ريا واڙون منکون ٿي پونسي

زوئو، 'تمون هارو ڪي نائوڪو سٺه؟ ڪي تمون مانھ ڀرئيل را ستر ڏيڪرا راز ڪرڻه ڪا  
 تمون مانھ هيڪ زئو راز ڪرڻه؟' ان اي پڻ ياد راکيا جي هون تمارو آڀرو سون- " <sup>3</sup> زئيون  
 اوئا ري مومي اوئا را پارام سڪم رون منڪون ٿي پونسيو، تون اوئون را من ابلي ملڪ  
 وونهو وودا هارو راجي ٿيا ڪم تون ام ڪيتات ربا: "اي تون آڀو پائي سٺه- " <sup>4</sup> تيام اوئي  
 بعل بريت ڏيو را مندر ٿي چوندي را ستر سڪا ابلي ملڪ نٺه ڏيڏا- اوئو هليون سڪون ٿي  
 آوارا ان پدماش منڪ آب پيرا راکيا جيا ابلي ملڪ وونهو ويوا مڌيا- <sup>5</sup> او غفره شهر ۾ آڀرا  
 باپ ري گهري گيو ان آڀرون پايون نٺه مطلب ڀرئيل رون پاڦي ستر ڏيڪرون نٺه هيڪا ئي  
 پوئا مانھ قتل ڪريا- پڻ ڀرئيل رو نونو ڏيڪرو يوتام پچي گيو ڪم تون او هٽائي گيو تو-  
<sup>6</sup> تئيون سڪم شهر را ٻڌائي منڪ ان بيت گهڊ را ٻڌائي منڪ پيرا ٿيا ان زائين سڪم را  
 ٽمپ واڙا بلوط را موتا وڻ ڪن ابلي ملڪ نٺه پاڌشا نايو-

<sup>7</sup> زئيون يوتام نٺه ايئا وات رئي ڪپر پڙئي تئيون او اوئو زائين گرزيم ڏونگر ري سوتي  
 مانھ اوڀو ان موتو هاد اوئون موٽهون نٺه ڪيو مڌيو: "او سڪم شهر واڙون! مارئي وات  
 هومپرو، زم ايشور تماري هومپرو- <sup>8</sup> هيڪا زمونا موئين وڻ آب مانھ هيڪ پاڌشا نايا  
 هارو نيهريا- تيام اوئي زئيون را وڻ نٺه ڪيڏو: 'تمي امون مانھ راز ڪرو- ' <sup>9</sup> پڻ زئيون  
 رٺه وڻ اوئون نٺه ڪيڏو: 'هون آڀرو تيل ساڌين وٽون مانھ راز ڪرو زائون، ڪي؟ ايئا  
 تيل ري ڪري ايشور ان منڪ رو مون ٿئھ- ' <sup>10</sup> تئيون وڻي انجير را وڻ نٺه ڪيڏو: 'تمي  
 آوو ان امون مانھ راز ڪرو؟' <sup>11</sup> پڻ انجير رٺه وڻ اوئون نٺه ڪيڏو: 'هون آڀري مناس ان  
 نائوڪي ميوات ساڌين وٽون مانھ راز ڪرو زائون، ڪي؟' <sup>12</sup> تئيون وڻي انگور ري ويل  
 نٺه ڪيڏو: 'تمي آوو ان امون مانھ راز ڪرو- ' <sup>13</sup> پڻ انگور ري ويل اوئون نٺه ڪيڏو: 'هون  
 آڀرو ڌراڪ رس ساڌين وٽون مانھ راز ڪرو زائون، ڪي؟ ڌراڪ رس را اڀڻ ري ڪري  
 ايشور ڪش ٿئھ، ان ڌراڪ رس پين منڪ پڻ ڪش ٿئھ- ' <sup>14</sup> نيٺ اوئي ٻڌي وڻي ڪنديرا نٺه

ڪيڏو: 'تُون آوَ ان امون مانھ راز ڪر۔' <sup>15</sup> ڪنڊيرئہ وٽون نئہ ڪيڏو: 'جيڪيڏي ھاس ۾  
 تمي مُون نئہ آپ مانھ ڀاڏشا ٺاؤوا ڪروھ تون آوو ان مارا سونئڙا ۾ پناھ ليو ان جيڪيڏي  
 تمي ھم نئين ڪرو تون تمون نئہ مارئي پت لاڳشي ان مُون موئين ٿي ڏيوٽا نيھرين لُبنان  
 رون ڌيال رون وٽون نئہ ٻارين شيلئي ڪرشي پرا۔'

<sup>16</sup> تمي جيو ابي ملڪ نئہ ڀاڏشا ٺايوھ، ڪي ھائي تمي ھاسا مَن ٿي ڦينصلو ڪريوھ،  
 ان ھائي تمارئي ھاسائي سئہ؟ جي تمي ڪريوھ، اُو يربعل ان اُوتا رون ڀاتيون ھارُو ٺاؤڪو  
 سئہ؟ اُوتا ري ڀلائي رو ڀڏلو اي سئہ، ڪي؟ <sup>17</sup> مارو ٻاپ تمون ھارُو وڌيو تو۔ اُوئہ آڀرو  
 جيو جوڪون موئين نوڪيو ان تمون نئہ مڊيانيون رون ھاڻون ٿي سڏايا۔ <sup>18</sup> پڻ تمي آڙ مارا  
 ٻاپ رون ڀاتيون ٿي پڳاوت ڪريھ ان مُون شيوا اُوتا رون ستر ڏيڪرون نئہ ھيڪا ٿي پوٽا  
 مانھ قتل ڪريھ۔ تمي اُوتا ري ٻوني را ڏيڪرا ابي ملڪ نئہ سڪم رون منڪون رو ڀاڏشا  
 ٺايوھ، ايٽا ھارُو جي اُو تمارو ڀائي سئہ۔ <sup>19</sup> جي تمي يربعل ان اُوتا رون ڀاتيون ٿي آڙ ھاسا  
 ربا ھوئو ان ھاسا مَن ٿي وُڍا ھوئو، تون تمي ابي ملڪ ٿي ڪُش ريو ان اُو تمون ٿي ڪُش  
 رئہ! <sup>20</sup> ان جي نئين تون مارئي پت تمون نئہ لاڳشي ان ابي ملڪ ٿي ڏيوٽا نيھرين سڪم  
 شھر ان سڪم را گھڍ رون ربا واڙون منڪون نئہ ٻارين شيلئي ڪرشي پرا ان سڪم شھر  
 ان سڪم را گھڍ رون ربا واڙون منڪون ٿي ڏيوٽا نيھرين ابي ملڪ نئہ ٻارين شيلئي ڪرشي  
 پرو۔ " <sup>21</sup> پسئہ يُوٽام اُوٽون ڀاڳيو ان زائين بير نومي ويري ھومو ڳيو پرو ان آڀرا ڀائي ابي  
 ملڪ ٿي ھٽائين اُوئہ ربا مڏيو۔

<sup>22</sup> ھوئہ ابي ملڪ ترڻ سال اسرائيليون مانھ راز ڪريو۔ <sup>23</sup> تتيون ايشور ابي ملڪ ان  
 سڪم شھر رون منڪون وسا وير نوڪئي ان سڪم شھر را منڪ ابي ملڪ ٿي پڳاوت ڪروا  
 مڏيا۔ <sup>24</sup> ايشور ھم ڪريو، زم يربعل رون ستر ڏيڪرون را کُون رو ڀڏلو اُوٽون را ڀائي ابي  
 ملڪ ٿي ليڏو زائہ جيئہ اُوٽون نئہ ماري نوڪيا تا، ان سڪم شھر رون منڪون ٿي جيئي

اَوٽا نٽه ڪُون ڪريا ۾ واڌي ڏيڏي ان مدت ڪري. <sup>25</sup> تيام سِڪم ري ربا واڙي منڪي آڀرا  
 پاڌشا ابي ملڪ رٽه ڪلاڻ آڀرون منڪون نٽه ڏونگرون ري سوتيون مانھ بيهاريا زم اَوٽا  
 مارڳ ٿي متيا واڙون نٽه لوتِي لٽه. ان ابي ملڪ نٽه هيا وات رٿي ڪپر پڙئي.

<sup>26</sup> تئيون عبد رو ڏيڪرو جعل آڀرون پايون پيرو سِڪم شهر ۾ آوين ربوا مڏيو ان سِڪم  
 ري منڪي اَوٽا مانھ ڀروسو ڪريو. <sup>27</sup> ڌراڪون پاڪيا رٿي مڏ آوئي تون سِڪم شهر را منڪ  
 آڀري آڀري واڙيون ۾ ڳيا ان آڀري آڀري واڙيون ٿي ڌراڪون پٿين اَوٽون رو رس ڪاڍيو. تيا  
 مانھ اَوٽي ڪوڀ ڪُشي ڪري. آڀرا ڏيو را منڌر ۾ زائين ڪاڏو پيڏو ان پسٽه ابي ملڪ نٽه  
 پتوا مڏيا. <sup>28</sup> تٽه توڻٽه عبد رٽه ڏيڪرئ جعل ڪيڏو: ”ڪُون سٽه ابي ملڪ ان ڪُون سٽه  
 سِڪم جي آبي اَوٽا رٿي شيوا ڪرون؟ اُو تو سِڪم شهر رو اصلي منڪ سٽه ئي نئين! اُو  
 تو رُوڳو ڀرُعل رو ڏيڪرو سٽه. ان زُڙول، آڀون مانھ وزير، رُوڳو اَوٽا رو راکل سٽه. اصل  
 ۾ حمور سٽه، جيئٽه آڀرا ڏيڪرا را نوم مانھ ايٽا شهر رو نوم سِڪم راڪيو. تمي ڪياڪ  
 سِڪم شهر واڙا رٿي شيوا ڪرو! آبي اَوٽا ڌاريا منڪ رٿي ڳلومي ڪم ڪرون؟ <sup>29</sup> جي اي  
 ٻڌائي منڪ مارا هاٿ موئين هوئين تون هُون ابي ملڪ نٽه هڪا پاهٽه ڪرٽ پرو! هُون  
 همٽه رو همٽه ابي ملڪ نٽه ام ڪونه جي، ’تون آڀري قوج وڌاو ان ميڏون ۾ نيھري  
 آو!‘“

<sup>30</sup> زئيون اَوٽا شهر رٽه وزير زُڙول عبد را ڏيڪرا جعل ري واتون هوميڙي تئيون اَوٽا نٽه  
 الاهي ڪاوڙ آوئي. <sup>31</sup> ان اَوٽه چالاڪي ٿي ابي ملڪ ڪن منڪ ميليا ان ام ڪي ميليو:  
 ”زوتو! عبد رو ڏيڪرو جعل ان اَوٽا را پائي سِڪم ۾ آوين شهر واڙون نٽه تمون ٿي پڳاوت  
 ڪريا هارُو پڙڪاوٽه ربا. <sup>32</sup> تيام تمي رات را اُونيا ان آڀرون سائون نٽه تيڙين ميڏون ۾  
 هٽائين بيهيا. <sup>33</sup> ان هوار رو ڏي اُوڳتون ئي شهر مانھ حملو ڪريا پرو ان زئيون جعل ان

اَوتَا را ساٿي تمون ٿي وِڊيا هَارُو نيهرئ تئيون تمون ٿي جئين ڪئين ٿي هيڪڻھ اُوتون ٿي ڪريا۔“

<sup>34</sup> تيام ابي ملڪ ان اَوتَا را ساٿي رات را ئي اُونيا ان چار توڙا ناوين سِڪم ڪن هٽائين ٻهي ربا۔ <sup>35</sup> هَوار رو ويلو عبد رو ڏيڪرو جعل ٻارو نيهرين اَوتَا شهر را ڌروازا ڪن اُوپي ريو۔ اُوءِ ئي توڻئ ابي ملڪ ان اَوتَا را ساٿي هٽال ماڳ ٿي ٻارا نيهريا۔ <sup>36</sup> زئيون جعل اُوتون منڪون نئ شيتا ٿي پاڙيا تئيون اُوءِ زبُول نئ ڪيڏو: ”زوئو! ڏونگرون ري سوٽيون ٿي منڪ اُوترئ ربا۔“

زبُول ڪيڏو: ”تمون نئ ڏونگرون رو سونئيو ايوو ڏيڪاڻھ جيووا منڪ۔“

<sup>37</sup> جعل وڙي ڪيڏو: ”زوئو! هيڪ توڙو ميڏون را وس موئين آوئھ ريو ان پيزو پوپا واڙا بلوط را وڻ را مارڳ ٿي آوئھ ريو۔“

<sup>38</sup> تئيون زبُول اَوتَا نئ ڪيڏو: ”هوءَ تارو گهمند ڪيال ڳيوھ؟ تئين تون ڪيڏو تو جي، اُبي ملڪ ڪوڻ سئھ جي امي اَوتَا رئي شيوا ڪرونھ؟ ڪي اي اُو منڪ نٿي جيا رئي تئين پيغزتي ڪري تئي؟ تيام هوءَ زا ان اُوتون ٿي وِڊين ڏيڪاڙا!“ <sup>39</sup> تئيون جعل سِڪم رون منڪون مور مور وُڍو ان ابي ملڪ ٿي وِڍيو۔ <sup>40</sup> ان ابي ملڪ اَوتَا نئ پڳڙاوين وونھر ٿيو ان شهر را ڌر هُڏي پوڳتون پوڳتون الاهي آڏمي گهاٽيل ٿين مري ڳيا۔ <sup>41</sup> اُوءِ ئي ڏي ابي ملڪ ارومھ شهر موئين زائين ٽڪي ريو ان زبُول جعل ان اَوتَا رون پايون نئ سِڪم شهر ٿي ٻارا ڪاڍيا پرا۔

<sup>42</sup> هوءَ پيزئ ڏي ام ٿيو جي منڪ شهر ٿي نيهرين ڪيترون ۾ ڳيا ان ابي ملڪ نئ ايٿا وات رئي ڪٻر پڙئي، <sup>43</sup> تون ابي ملڪ آڀرون ساٿيون پيزو ڪيترون ۾ ڳيو ان ترڻ ٽولا ناوين اُوتئ هٽائين پينو ٿو۔ ان زئيون اُوتون نئ شهر ٿي نيهرتا پاڙيا تئيون اُو اُونيو ان اُوتون مانھ حملو ڪريو۔ <sup>44</sup> ابي ملڪ ان اَوتَا را ساٿي جيا اَوتَا پيرا هتا جلدِي جلدِي زائين شهر را

دروازا ڪن اُڀيا ان اُڻا ري پيري بي توڙي زائين اُڻون ٻڌون مانھ حملو ڪريو جيا ڪيترون موئين هئا. <sup>45</sup> پورو ڏي ابي ملڪ شھريون ٿي وڌتو ريو. نيٺ شھر مانھ قوضو ڪرين اُڻون منڪون نئھ مارتو گيو جيا اُڻا شھر موئين هئا. پسئھ شھر نئھ ڍاهين اُڻا موئين لُڻ چٽيو پرو، جيا ٿي ٻڌون نئھ ڪٻر پڙئھ جي شھر مانھ هميش ھوڏي ھونو ربا رئي پت لاڳل سئھ. <sup>46</sup> زئيون سڪم را گھڍ ري منڪي ھومپڙيو تئيون اُو بعل بریت ڏيو را منڌر را پونئيرا موئين ھٽائي ڳيا. <sup>47</sup> پسئھ ابي ملڪ نئھ اي ڪٻر پڙئي جي منڪ سڪم را گھڍ موئين پيڙا ٿيا. <sup>48</sup> تئيون ابي ملڪ آپرون ٻڌون ساٿيون پيڙو ضلْمُون ڏونگر مانھ سڙيو. اُڻئھ پوگين ابي ملڪ آڀ ڪوئارو لين وڻ ٿي هيڪ تارئي واڍئي ان اُڻا نئھ ڪوا مانھ راکئي. پسئھ آپرون ساٿيون نئھ ڪيڏو: ”جئن ڪئن تمي مُون نئھ ڪرتون پاڙيو تمي پڻ جلدِي همروم ڪرو!“ <sup>49</sup> تئيون زتا پڻ منڪ هئا اُڻي ٻڌي همروم هيڪ هيڪ تارئي واڍي ليڏئي ان ابي ملڪ لار زائين تاري پونئيرا مانھ نوڪين پاهئي ڏيڏئي پري. هم سڪم را گھڍ را ٻڌائي منڪ مري ڳيا جيا آڏمي ان ڏوشي ٻڌائي ٿين لڳ پڳ هيڪ هزار هئا.

<sup>50</sup> پسئھ ابي ملڪ تبيض شھر ھومو گيو ان آپرون منڪون نئھ شھر رئھ چوقير بيهارين اُڻا مانھ قوضو ڪريو پرو. <sup>51</sup> پڻ اُڻئھ شھر موئين هيڪ الاهي ڏاڍو گھڍ هتو. تيام ٻڌا آڏمي ان ڏوشي مطلب شھر را ٻڌائي منڪ پاگين اُڻا موئين ھٽائي ڳيا ان دروازو پند ڪرين گھڍ ري چت مانھ سڙي ڳيا. <sup>52</sup> ابي ملڪ گھڍ ڪن زائين اُڻا مانھ حملو ڪرو مڏيو. اُو گھڍ نئھ ٻاريا ھارو دروازو ڪن گيو، <sup>53</sup> تون هيڪي ٻائي گھرتي رو ماٿليو پڙ ابي ملڪ را ماتا مانھ ڦڳوڙيو ان اُڻا رو ماٿو ڦوڙيو پرو. <sup>54</sup> تئيون جھت م ابي ملڪ هيڪ جووڻ نئھ جيو اُڻا را هٿيار اُڀاڙين ويتو اُڻا نئھ ھاڏ پاڙين ڪيڏو: ”تُون آڀري تروٿار ٿي مُون نئھ ماري نوڪ زم منڪ مارا پارام اي نه ڪي هيڪئھ جي، هيڪي ٻائي اُڻا نئھ ماري

نوکیو۔ ”تیاہ اُوٺا نٺ تروٺار ٿي ويندو پرو ان اُو مري گيو۔<sup>55</sup> زئيون اسرائيلي منکي پاڙيو جي ابي ملڪ مري گيو تئين ٻڌائي آڀري آڀري گهري پاسا وڙي گيا۔  
<sup>56</sup> هم ايشور ابي ملڪ ٿي اُوٺا پونڌائي رو ڀڏلو ليدو جي اُوٺا آڀرا ٻاپ ٿي ڪري ٿي مطلب لڳ ڀڳ آڀرون ستر پايون نٺ ماريات پرا۔<sup>57</sup> ان سڪم شهر رون منڪون رئي ٻڌي پونڌائي ايشور اُوٺون مانھ نوکئي۔ هيون نئونئہ يربعل را ڏيڪرا يوتام رئي پت اُوٺون نٺ لاڳي۔

## تولع اسرائيلي قوم رو آڳوون

**10** ابي ملڪ رون ڏيئون ڪيڙ اشڪار را قبلا موئين ٿي فواه رو ڏيڪرو تولع جيو دودا رو پوترو هتو، اُو اسرائيليون نٺ پڇايا هارو اُونيو۔ اُو افرائيم را قبلا را ڏونگر واڙا علاقا را شهر سمير ۾ ريتو۔<sup>2</sup> اُو تيوهه سال اسرائيلي قوم رو آڳوون ريو ان پسٺہ سرگواسي ٿيو ان سمير شهر ۾ ڌڻ ٿيو۔

## يائير اسرائيلي قوم رو آڳوون

<sup>3</sup> ايٺا ڪيڙ جلعاد را علاقا رون منڪون موئين ٿي يائير اُونيو ان اُو ٻاويهه سال اسرائيلي قوم رو آڳوون ريو۔<sup>4</sup> اُوٺا را تيهه ڏيڪرا هتا جيا تيهه ڳڏيڙون مانھ سوارئي ڪرتا ان اُوٺون را تيهه شهر هتا جيا آڙ هوڏي خوت يائير را شهر ڪيواراه جيو جلعاد را ملڪ ۾ سٺہ۔<sup>5</sup> يائير سرگواسي ٿيو ان قامون شهر ۾ ڌڻ ٿيو۔

## افتاح اسرائيلي قوم رو آڳوون

<sup>6</sup> اسرائيلي قوم ري منکي وڙي پرميشور رو ڏوه ڪريو۔ اُوئي بل نومي ڏيون، عستارات ڏيو، ارام ملڪ رون ڏيون، صيدا شهر رون ڏيون، مواب ملڪ رون ڏيون، عموني قوم رون ڏيون ان فلسطيني قوم رون ڏيون رئي شيوا ڪري۔ اُوئي پرميشور نٺ ساڌي ڏيدو ان اُوٺا رئي شيوا نه ڪري۔<sup>7</sup> تياہ پرميشور نٺ اسرائيلي قوم مانھ ڪاوڙ

سڙڻي ان اُوڻه اسرائيليون نئه ويسيا پرا مطلب فلسطيني ان عموني قوم را قوضا ۾ ڏيڏا پرا. <sup>8</sup> اُوڻي اُوڻه ئي سال اسرائيليون نئه ڌر پڌر ڪريا پرا. هم ڪرين او اڍارنه سال اوئون ٻڌون اسرائيليون مانھ ظلم ڪرتا ربا، جيا يردن ڌريا رنه اڳوڻي پاهنه جلعاد را علاقا ۾ مطلب اموري قوم را علاقا ۾ ريتا. <sup>9</sup> اوئون ڏيئون ۾ عموني قوم را منڪ يردن پار ڪرين يهوداه، بنيامين ان افرايم رون ڦيلون ٿي پڻ وڊيا هارو آوتا را، تيام اسرائيلي گهڻا تنگ ٿيا.

<sup>10</sup> تئيون اسرائيلي پرميشور نئه ام پوڪاريو: ”هاس ۾ امي تمارو ڏوه ڪريو، ڪم تون امي آپرا ايشور نئه ساڌي ڏيڏو ان بل نومي ڏيون رئي شيوا ڪري.“

<sup>11</sup> تئيون پرميشور اسرائيلون نئه ڪيڏو: ”ڪي مئين تمون نئه مصريون، اموريون، عمونيون ان فلسطيني ٿي نئي سڏايا؟ <sup>12</sup> يئون شيوا سيدانيي، عماليقيي ان ماعونيي پڻ تمون نئه تنگ ڪريا ان تمي مون نئه پوڪاريو ان مئين تمون نئه اوئون را قوضا ٿي سڏايا. <sup>13</sup> توئي پڻ تمي مون نئه ساڌين ڏيون رئي شيوا ڪري. ايٿا هارو هوئه ٿي هون تمون نئه نئين سڏاوون. <sup>14</sup> تمي زائين اوئون ڏيون نئه پوڪارو جيون نئه تمي سوندياه. پلئه او ئي تماري ڏوروڻ رنه توڻه تمون نئه سڏاوئه.“

<sup>15</sup> پڻ اسرائيلي قوم ري منڪي پرميشور نئه ڪيڏو: ”امي تون ڏوه ڪريوه. تيام زم تمون نئه نيڪ لاڳهه هم امون ٿي ڪرو، پڻ آڙ تون امون نئه سڏاوي ليو!“ <sup>16</sup> تيا ڪيڙ اوئي ڌاري قومون رون ڏيون ري مورتِي ڦڳوڙي پري ان پرميشور رئي شيوا ڪري. تئيون پرميشور رو من اسرائيليون هارو ڏڪي ٿيو.

<sup>17</sup> پسئ عموني قوم را منڪ جنگ ڪريا هارو پيڙا ٿيا ان جلعاد را علاقا ۾ تنبو هڻيا. تيا مانھ اسرائيلي قوم را منڪ پڻ پيڙا ٿيا ان مصفاه شهر ڪن تنبو هڻيا. <sup>18</sup> تئيون جلعاد

علاقا رون منكون را آڳيوون هڪا پيزا نئه ام ڪياو مڌيا: ”جيو منڪ عموني قوم رون منڪون ٿي وڊيا ۾ ٻڌون ٿي آڳر وڻشي اُوئي جلعاد رون ٻڌون ربا واڙون رو آڳيوون ٿيشي.“

**11** هونءِ جلعاد را علاقا واڙو افتتاح هڪ جوڌو هتو. اُو هڪي ڦرتياڙ ٿي پيدا ٿيو تو ان اوٿا رو ٻاپ جلعاد هتو. <sup>2</sup> جلعاد ري ڏوشي ٿي پڻ ڏيڪرا هتا ان زئيون اوٿا را ڏيڪرا موٽا ٿيا تئيون اُوئي افتتاح نئه اي ڪين گهر ٿي ڪاڍيو پرو جي، ”امارا ٻاپ را گهر ۾ تون نئه ڪئين حصو نئين زڙئه، ڪم تون تون پيزي مان رو سئه.“ <sup>3</sup> تئيون افتتاح آيون پايون ڪن ٿي پاڳي ڳيو ان طوب را علاقا ۾ ربوا مڌيو. اوٿه پڌماش منڪ اوٿا را ساڻي ٿي ڳيا ان اوٿا پيزا ڦروا مڌيا.

<sup>4</sup> ڪئينڪ وڪت ڪيڙ عموني قوم ري منڪي اسرائيلي قوم رون منڪون ٿي جنڳ ڪري. <sup>5</sup> هاڻي جنڳ هزون ٿيتيٽ رئي، تئيون جلعاد علاقا را موٽا منڪ طوب علاقا هوما ڳيا زم اوٿون افتتاح نئه تيڙي اوٿه. <sup>6</sup> اُوئي افتتاح نئه ام ڪيڌو: ”تمي هالو ان امارو جنڳي آڳيوون ٿيو زم آبي عموني قوم رون منڪون ٿي جنڳ ڪرون.“

<sup>7</sup> تئيون افتتاح جلعاد علاقا رون موتون منڪون نئه ڪيڌو: ”تمي مون ٿي اڏاوڏو راڪيو ان مون نئه مارا ٻاپ را گهر ٿي ڪاڍيو پرو. هونءِ زئيون تمي موصيت ۾ ڦاٿياھ، تئيون مون ڪن ڪم آياھ؟“

<sup>8</sup> جلعاد را علاقا ري موتي آڳيووني افتتاح نئه ڪيڌو: ”امي تيام تمون ڪن آياھ جي تمي امون پيزا هالو ان عموني قوم رون منڪون ٿي جنڳ ڪرو، پسئ تمي ئي امون ٻڌون جلعاديون را آڳيوون ٿيشو.“

<sup>9</sup> تون افتتاح جلعاد علاقا رون موتون نئه ڪيڌو: ”جي تمي عموني قوم رون منڪون ٿي جنڳ ڪريا هارو مون نئه پاسو تيڙي زائوھ ان پرميشور اوٿون نئه مارئ حوالئ ڪرئھ پرا، تون هاس ۾ هون تمارو آڳيوون ٿيھ؟“

<sup>10</sup> جِلعاد علاقا ري موتي إفتاح نئه ام جواپ ڏيڌو: ”پرميشور اماري واتون هومپريه. او آپ شائيد سئه. زم تمي ڪوه، امي همروم ڪرشن.“ <sup>11</sup> تتيون إفتاح جِلعاد علاقا رون موتون پيڙو روونو ٿيو ان اوت ري منڪي اوتا نئه آڀرو آڳيون ان جنگي آڳيون پڻ ٿايو. اوتئه مصفاه شهر ۾ إفتاح پرميشور نئه ايئا وات مانھ انصاف ڪريا وازو ناوين آڀري ٻڌي واتون وڙي ڪيڌي.

<sup>12</sup> پسئه إفتاح عموني قوم را يادشا ڪن منڪ روونا ڪريا ان ام ڪي ميليو: ”مئين تمارو ڪي ٻڳاڙيوھ، جي تمي جنگ هارو مارا ملڪ موئين آياھ را؟“ <sup>13</sup> عموني قوم رئه يادشا إفتاح رون منڪون نئه ام جواپ ڏيڌو: ”زئيون تمي اسرائيلي قوم را منڪ مصر ملڪ ٿي نيهرين آيا تا، تتيون تمي ارنون نڌي ٿي لين يوق ڌريا ان يردن ڌريا هوڏي جيو مارو علاقو هتو مون ٿي ڪوهي ليدو تو. تيام هوئه تمي او علاقو عزت ٿي مون نئه پاسو ڏيو رو.“

<sup>14</sup> تتيون إفتاح وڙي منڪون نئه عموني قوم را يادشا ڪن روونا ڪريا <sup>15</sup> ان إفتاح ام ڪي ميليو: ”اسرائيليي نڪو تو موآب رو علاقو ڪوهيو نڪو وڙي عموني قوم رون منڪون رو علاقو. <sup>16</sup> پڻ زئيون اسرائيلي مصر ٿي نيهرين ان رڻ وڳڙا ۾ ٿيتا قلم سمنوڊ هوڏي آيا ان قادس شهر ڪن پوگيا <sup>17</sup> تتيون اسرائيلي ادوم ملڪ را يادشا ڪن منڪ روونا ڪريا ان ام ڪي ميليو تو جي، ’امون نئه تمارا ملڪ موئين ٿي متوا ڏيو!‘ پڻ ادوم رو يادشا نه مونيو. همروم اوئي موآب ملڪ را يادشا نئه ڪي ميليو ان اوئه پڻ نا پاڙيو. تيام اسرائيلي قادس ۾ ربا.

<sup>18</sup> تيا ڪيڙ او رڻ وڳڙا ٿي متيا ان ادوم را ملڪ ان موآب را ملڪ ٿي ٻارا ٻارا ٿين موآب ملڪ رئه اڳوئلئ پاهه آيا ان ارنون نڌي رئه پيڙه پاهه تنبو هڻيا. هيوء نمونئ او موآب ملڪ ۾ نه گيا ڪم تون ارنون نڌي هوڏي موآب ملڪ رو دنڳ هتو.

<sup>19</sup> پسنه اسرائيليئي اموري قوم را پادشا سيحونَ كن منڪ رونا كريا جيو حسبونَ شهر ۾ راز ڪرتو، اوتا ننه ڪي ميلو جي، 'امون ننه تمارا ملڪ ٿي ٿين متوا ڏيو زم امي آڀرا علاقا ۾ زائون-'<sup>20</sup> پڻ سيحونَ اسرائيليون مانھ اتو پڻ ڀروسو نه ڪريو جي اوتون ننه آڀرا ڌنگ ٿي متوا ڏنه پڻ سيحونَ آڀرون ٻڌون منڪون ننه ڀيرا ڪرين يھصاه شهر ڪن تنبو هٿيا ان اسرائيليون ٿي جنگ ڪري-<sup>21</sup> پرميشور اسرائيليون رنه ايشور سيحونَ ان اوتا رون ٻڌون منڪون ننه اسرائيليون را هات ۾ ڏيڌا را ان اوتي اوتون ننه ماري پرا- تيام اسرائيليئي اوتنه ربا وازون اموري قوم را ٻڌا ملڪ مانھ قوضو ڪريو پرو-<sup>22</sup> مطلب اوتي ارون ڏي ٿي لين يوق ڌريا هوڌي ان رڻ وڳڙا ٿي يردن ڌريا هوڌي اموريون را ٻڌا علاقا مانھ قوضو ڪريو پرو-

<sup>23</sup> هم پرميشور اسرائيلي قوم رنه ايشور آڀرون اسرائيلي منڪون آڳڙ ٿي اموريون ننه ڪاڍيا پرا- تيام ڪي هوننه تم ايتا مانھ قوضو ڪري هيڪيه؟<sup>24</sup> جي تمارو ڏيو ڪموس تمون ننه قوضو ڪريا هارو علاقو ڏنه تون تم اوتا مانھ قوضو نئين ڪرو، ڪي؟ تيام جيا جيا ننه پرميشور امارنه ايشور امون هوما ٿي ڪاڍيا امي پڻ اوتون رون علاقون مانھ قوضو ڪرين بيهشون-<sup>25</sup> ان تم آڀرا آپ ننه مواب ملڪ را پادشا صفور را ڏيڪرا بلق ٿي وڌارنه هزموه، ڪي؟ ڪي او ڪيڏي اسرائيليون ٿي وڌيو ڪا اوتا ٿي جنگ ڪري؟<sup>26</sup> اسرائيلي قوم را منڪ حسبونَ شهر ان اوتا رون ڳومون ۾، عروعر شهر ان اوتا رون ڳومون ۾ ان ارون ٻڌون شهرن ۾ ترڻ هو سالون ٿي ره ربا- اوتنه توتنه تماري قوم ري منڪي ڪم نا اوتون علاقون ننه سڏايا؟<sup>27</sup> مئين تمارو ڪئين ڏوه نٿي ڪريو پڻ تم مون ٿي جنگ ڪرين ناٿوڪو نٿي ڪرتا- تيام آڙ پرميشور ٿي جيو نيا ڪرنار سنه اسرائيلي قوم رون منڪون ان عموني قوم رون منڪون رو نيا ڪرشي- "<sup>28</sup> پڻ

عموني قوم رټه پادشا افتتاح ري هائي واتون نه هومپري جيون را پارام اوټه نياپو ډي ميليو تو.

<sup>29</sup> تئيون پرميشور رټي آتما افتتاح مانه اترئي ان افتتاح جلعاد را ان منسي را قبيلا را علاقا ټي تيتو، جلعاد را شهر مصفاه م آيو ان اوټون عموني قوم رون منكون ټي جنگ كريا هارو گيو.

<sup>30</sup> هوټه افتتاح پرميشور نټه اي پاسټي كړي: ”جي تمې هاس م عموني قوم رون منكون نټه مارا هات م ډيشو، <sup>31</sup> تو زئيون هون عمونيون نټه هراوين هازو هورو پاسو وږبه، تئيون جيو پښ جيوټو جيو پيرهيڼ مارا گهر را ډر ټي نيهربن مون نټه هومو آوشي، او پرميشور را نوم رو هوشي ان هون اوټا نټه لين هازو پرميشور را نوم مانه سټراوين اوټا رو ډونپ كړه پرو.“

<sup>32</sup> تئيون افتتاح عموني قوم رون منكون ټي جنگ وډيا هارو گيو ان پرميشور اوټون نټه افتتاح را هات م كريا پرا. <sup>33</sup> اوټه عروعر شهر ټي لين مينيت شهر كن ايبيل كراميم شهر هوډي ويهون شهرون مانه قوضو كړيو ان الاهي منك ماربيا. هم عموني قوم را منك اسرائيليون را هات هيټ ټي گيا.

### افتتاح رټي ډيكرئي

<sup>34</sup> پسټه افتتاح مصفاه شهر م آپري گهري آيو، تون ام ټيو جي اوټا رټي ډيكرئي ډق وگاڙتي ان رمتي اوټا نټه مزيا هارو آوي. او افتتاح رټي هيكله ډيكرئي هتي، هايا شيوا بيزي كوي اولاد نتي. <sup>35</sup> زئيون افتتاح اوټا نټه يارټي تو گهټو ډكي ټين، آپرا لوگهټا قاتين كيډو: ”او ماري ډيكرئي! تئين مون نټه پاڙيوه نو، تئين مون نټه هوټه اتو ډك ډيډوه زوټه مارون دشمنون پيڙي ټي گي هوټه، كم تون مئين آپ پرميشور نټه زبون ډيډي ان هون اوټا ټي قري نټي هيكتو.“

<sup>36</sup> هوئہ آڀرا ٻاپ نئہ ڪڍدو: ”ٻا! تمی مُون ٿي اُو ڪرو زم تمی ڀرمیشور نئہ زبون ڏيڏي ڪم تون ڀرمیشور تمارون ڏشمئون، عُموني قوم واڙون ٿي تمارو ڀڏلو لڏوھ.“

<sup>37</sup> پسئہ اُوئہ آڀرا ٻاپ نئہ وينتئي ڪري: ”مُون هارو اتو ڪرو جي مُون نئہ ٻي مئينون رو تائم ڏيو تون هُون ڏونگرون ۾ آڀري ڳيڏلون پيڙي زائين ڪُونٿاري مريا رو ماتم ڪرون.“

<sup>38</sup> تون اُوئہ ڪڍدو: ”زا“ ان افتتاح اُوئا نئہ ٻي مئينا ڏيڏا. اُو آڀري ڳيڏلون نئہ ڏونگر مانھ تيڙي ڳئي ان ڪُونٿاري مريا مانھ وڙاپ ڪرتئي رئي. <sup>39</sup> زئينون اُو ٻي مئينا پورا ٿيا، تيا ڪيڙ اُو آڀرا ٻاپ ڪن پاسي آوي ان افتتاح اُوئا ٿي امروم ڪريو زم اُوئہ پاسئي ڪري تي. اُو سوڪري ڪُونٿاري هتئي. تيام اسرائيلي قوم ۾ اي رواز وُڍو، <sup>40</sup> جي هر سال اسرائيلي قوم ري جووڻ سوڪري زائين چار ڏي افتتاح جلعادي ري ڏيڪري هارو وڙاپ ڪرھ.

### افتتاح ان اِسرائيم را قبيلا وارا

**12** تئينون اِسرائيم را قبيلا را منڪ جنگ هارو پيڙا تين يردن ڏريا رءُ اڳوڻيئہ پاهئہ صفون شهر ڪن ڳيا ان افتتاح نئہ ڪڍدو: ”زئينون تون امون ڪن ٿي تين عُموني قوم رون منڪون ٿي جنگ ڪريا هارو ڳيو تئينون امون نئہ پيڙا ڪم نه تيڙي ڳيو؟ تيام امي تون نئہ تارا گهر هُودو ٻارئون پرو.“

<sup>2</sup> افتتاح اُوئون نئہ جواپ ڏيڏو: ”زئينون مارئي ان عُموني قوم رون منڪون رئي جنگ ٿيئي تي تئينون مئين تمون نئہ تيڙايا تا، پڻ تمی مُون نئہ اُوئون رون هاتون ٿي پڇايا هارو آيا ئي نئين. <sup>3</sup> پسئہ زئينون مئين اي زويو جي تمی مارئي مدت نئي ڪرتا، تئينون مئين آڀرا جيو رئي پرو نه ڪري ان عُموني قوم رون منڪون ٿي جنگ ڪريا هارو يردن ڏريا پار ڳيو ان ڀرميشور اُوئون نئہ مارا هات ۾ ڪريا پرا. تون پسئہ تمی آڙ مُون ٿي وڍوا ڪم آياھ؟“

<sup>4</sup> تئينون افتتاح آڀرا علاقا جلعاد رون ٻڌون منڪون نئہ پيڙا ڪرين اِسرائيم را قبيلا واڙون ٿي

وڊيو ان جلعاديئي اِسرائيٽيون نئه ماري پرا ڪم تون اُو ام ڪيتا تا: ”تمي اِسرائيٽي ان منسي را ڦيلا وازون ٿي پاڳين ايٽه آياھ را!“<sup>5</sup> ان جلعاديئي اِسرائيٽيون ٿي پيرھين يردن ڌريا رون گھاتون مانھ قوضو ڪري ليڌو۔ پسئ زئيون ڪوئي جنگ ٿي پاڳل اِسرائيٽي اُوئئھ آوين ڪيتو: ”مُون نئه اُوئھ پار زاوا ڏيو!“ تئيون جلعادي اُوئا ٿي پونستا: ”تون اِسرائيٽي سئھ، ڪا نا؟“ ان جي اُو ام جواپ ڏيتو: ”نا“<sup>6</sup> تئيون اُو اُوئا نئه ڪيتا: ”بول سبَلت!“ تون اُو ڪيتو: ”سبَلت!“ ڪم تو اي آواز ”ش“ اُوئا ٿي نه ڪيوراتو۔ تئيون جلعادي اُوئا نئه زھالين يردن ڌريا رون گھاتون مانھ مارتا پرو۔ تيام اُوئھ توئئھ بئيتاليھ هزار اِسرائيٽي مروئا۔

<sup>7</sup> افتاح سو سال اِسرائيلي قوم رو آڳيون ريو۔ پسئ افتاح جلعادي سرگواسي ٿيو ان اُوئا نئه جلعاد علاقا را هڪا شهر ۾ ڌڦن ڪريو۔

### اِصان اِسرائيلي قوم رو آڳيون

<sup>8</sup> اُوئا ڪيٽ بيت لحم شهر رو هڪ اِصان نومي منڪ اِسرائيلي قوم رو آڳيون ٿيو۔  
<sup>9</sup> اُوئا را تيه ڏيڪرا ان تيه ڏيڪري هتي۔ اُوئھ آڀري ڏيڪريون نئه ڌاريون ۾ پرتاوي ان آڀرون تيه ڏيڪرون هارو ڌاريون ري ڏيڪري ليڌي۔ اُو هات سال اِسرائيلي قوم رو آڳيون ريو۔  
<sup>10</sup> پسئ اِصان سرگواسي ٿيو ان بيت لحم ۾ ڌڦن ٿيو۔

### ايلون اِسرائيلي قوم رو آڳيون

<sup>11</sup> اُوئا ڪيٽ زبولون را ڦيلا وازو ايلون اِسرائيلي قوم رو آڳيون ٿيو ان اُو ڏھ سال اِسرائيلي قوم رو آڳيون ريو۔  
<sup>12</sup> نيٺ پسئ ايلون زبولوني پڻ سرگواسي ٿيو ان ايلون شهر ۾ ڌڦن ٿيو جيو زبولون را ڦيلا را علاقا ۾ سئھ۔

## عبدون اسرائيلي قوم رو آگيوون

<sup>13</sup> اُوئا ڪيترَ فرعاتون شهر ۾ ريا وارا هليل رو ڏيکرو عبدون اسرائيلي قوم رو آگيوون ٿيو. <sup>14</sup> اُوئا را چاليه ڏيکرا ان ٿيه پوترا هئا، جيا ستر گڏيتون مانه سوارئي ڪرتا. عبدون آڻ سال اسرائيلي قوم رو آگيوون ريو. <sup>15</sup> نيٺ فرعاتون شهر وارا هليل رو ڏيکرو عبدون سرگواسي ٿيو ان افرائيم را قبيل را علاقا ۾ فرعاتون شهر ۾ دقن ٿيو جيو عماليقي قوم را ڏونگر وارا علاقا ۾ سئ.

## سمسون اسرائيلي قوم رو آگيوون

سمسون رو زلم

**13** اسرائيلي قوم ري منڪي وڙي پرميشور رو ڏوه ڪريو ان پرميشور اوئون نئه چاليه سال فلسيتي قوم وازون را هات ۾ ڏيڏا پرا.

<sup>2</sup> هوئه صرعا شهر ۾ دان را وستار رو هيڪ منڪ هتو جيا رو نوم منوحه هتو. اُوئا رئي ڪوئي اولاد نٿي، اُوئا رئي ڏوشي وونزئي هئي. <sup>3</sup> پرميشور رئه ڏوت اُوئا ري ڏوشي نئه ڏرشن ڏين ڪيدو: ”زو! تون وونزئي سئ، تون نئه ٻار نٿي ٿيتو، پڻ هوئه تون پاري پڳ ٿيه ان تون نئه ڏيکرو ٿيشي. <sup>4</sup> تيام ڪيال راڪي، تون ڌراڪ رس ڪا پيزئي ڪوئي نشا وارئي شينهن مت پي ان نڪو ڪوئي حروم شينه ڪائي. <sup>5</sup> زو! تون پاري پڳ ٿيه ان تون نئه ڏيکرو ٿيشي. تون اُوئا را مٿوٽاز مت ڪري، ڪم تون او سوڪرو زلم ٿي ايشور را نوم مانه ڪرل هوشي، ان او اسرائيليون نئه فلسطينيون رون هاڻون ٿي سڏايا ۾ آگيوونئي ڪرشي.“

<sup>6</sup> اوئه ڏوشي زائين اپرا آڏمي نئه ڪيدو: ”هيڪ ايشور رو منڪ مون ڪن آيو تو. اُوئا رو روپ ايشور را ڏوت را زم الاهي مون شون وازو هتو ان مئين اُوئا نئه نه پونسيو، جي

تُون ڪيٽ ٿي آيوه؟ ان نڪو اُوڻه آڀرو نوم همڀڙايو. 7 پڻ اُوڻه مُون ننه ڪيڏو: ’زو! تُون ڀاري پڳ ٿيھ ان تُون ننه ڏيڪرو ٿيشي. تيام تُون ڌراڪ رس ڪا پڙئي ڪوئي نشا وڙئي شينھ مت پي نڪو وڙي ڪوئي حروم شينھ ڪائي ڪم تون اُو سوڪرو زلم ٿي ايشور را نوم مانھ ڪرل هوشي.‘

8 تئيون منوحه پرميشور ٿي پراٿنا ڪرين ڪيڏو: ”او مارا پڙيو، هُون تمون ننه منت ڪرونھ جي اُو ايشور رو منڪ جيا ننه تمي ميليو تو امون ڪن وڙي اُوڻه ان امون ننه شيڪاڙه جي امي اُوڻا سوڪرا رئي ھار همڀڙ ڪم ڪرين ڪرون جيو زلمشي.“

9 تئيون ايشور منوحه رئي پراٿنا هومڀڙي ان ايشور رو ڏوت اُوڻا ٻائي ڪن وڙي آيو. اُوڻه ٿوڻه اُو ڪيتر موئين هٽي پڻ اُوڻا رو آدمي منوحه اُوڻا پڙو نٿو. 10 تيام اُوڻه ڏوشي جلدِي ڊوڙين آڀرا آدمي ننه همڀڙايو: ”اُو منڪ جيو اُوڻه ڏي مُون ننه ڏيڪوڻو تو، اُو آڙ وڙي آيوھ.“

11 تئيون منوحه اُوئين آڀري ڏوشي لار لار وُڍو ان اُوڻا منڪ ڪن آوين اُوڻا ننه ڪيڏو: ”ڪي تُون اُو سئه جيئنه ماري ڏوشي ٿي واتون ڪري تي؟“  
اُوڻه ڪيڏو: ”هوڻه، هُون اُوئي سون.“

12 تئيون منوحه ڪيڏو: ”زئيون تماري واتون پوري ٿيشي، تون اُوڻا سوڪرا رو ريڻ سيڻ ڪيوو هوشي ان اُو ڪي ڪوم ڪرشي؟“

13 پرميشور رنه ڏوت منوحه ننه ڪيڏو: ”ٿارئي ڏوشي اُوڻون ٻڌيون واتون ننه مونته جيا را پارام مئين پيرھين همڀڙايو تو. 14 اي ڪوئي ايوي شينھن نه ڪانه جيو انگور ري ويل رئي پيڌارت هوڻه ان ڌارڪ رس ڪا پڙئي نشا وڙئي شينھ نه پيئنه ان ڪوئي حروم شينھ نه ڪانه. جيو پڻ حُڪم مئين ايئا ننه ڏيڏو اي اُوڻا ننه مونته.“

<sup>15</sup> منوحه پرمیشور را دُوت نئه کیدو: ”میریونئی کرین امون کن ترسو زم تمون هارو چیلو هلالین تیار کرون.“

<sup>16</sup> تئین پرمیشور رئه دُوت منوحه نئه جواپ ڏیدو: ”جي تون مُون نئه تڪاڙوا کرئه توئي پڻ هُون تاري روتئي نئين کائون. پڻ جي تون پرمیشور را نوم مانه هازا مال رو دُونپ ساڙئه تون پلئه ساڙ!“ منوحه نئه کبر نتئي جي او پرمیشور رو دُوت سئه.

<sup>17</sup> پسئ منوحه پرمیشور را دُوت نئه پُونسيو: ”تمارو نوم کي سئه؟ کم تون زئيون تماري واتون پوري تيشي تئيون امي تمارا نوم را گڻ ڳاوي هيڪشون.“

<sup>18</sup> پرمیشور رئه دُوت اوتا نئه کیدو: ”تون کم مارو نوم پُونسئ؟ او تارا هزم ٿي بارو سئه.“

<sup>19</sup> تئین منوحه هيڪي شيپر مانه پرمیشور را نوم مانه هازا چيلا رو دُونپ ساڙيو، ان دُون رو دُونپ کريو. تئین هيڪ عجب کوم ٿيو! منوحه ان اوتا ري دوشي زوبو جي <sup>20</sup> دُونپ را ماڳ ٿي زئيون زهراڙ آڪاش هومئي اونئي، تئین پرمیشور رو دُوت دُونپ ري زهراڙ م اونسو ڳيو پرو. منوحه ان اوتا رئي دوشي هائي پاڙين اوندئه مون زمي مانه پڙيا نا. <sup>21</sup> پڻ اوتا کيڙ پرمیشور رو دُوت نڪو منوحه نئه ڏيکوڻو نڪو اوتا ري دوشي نئه. تئین منوحه نئه کبر پڙئي جي او پرمیشور رو دُوت هتو.

<sup>22</sup> تيام منوحه آپري دوشي نئه کیدو: ”هوءَ آبي ضرور مري زاشون کم تون آبي ایشور نئه پاربوه.“

<sup>23</sup> پڻ اوتا ري دوشي اوتا نئه کیدو: ”جي پرمیشور رئي اي مرضئي هوئيت جي آپون نئه مارئه پرا، تون پرمیشور آپرا نوم را دُونپ مانه ساڙل چيلو ان دُون رو دُونپ آڻا هات ٿي قبول نه کرئت ان آز آپون نئه اي ٻڌو کئين نه ڏيکارئت ان نڪو آپون ٿي ايوي واتون ڪئت.“

<sup>24</sup> تيا ڪيڙ اُٿا ٻائي رو هيڪ ڏيڪرو ٿيو ان اُٿه ٻار رو نوم سمسُون راکيو۔ اُو سوڪرو موٽو ٿيو ان پرميشور اُٿا ننه آشيرواڏ ڏيڌو۔ <sup>25</sup> اُو زئيون صُرعاہ ان اِستال شھرون وسا دان ري قوج رو اڏو نومي ماڳ ۾ ريتو، تئيون پرميشور رئي آتما اُٿا مانھ اثر ڪروا مڏي۔

### سمسُون ان تمنت شھر رئي ٻائي

**14** ھوئہ سمسُون تمنت شھر ھومو ڳيو ان اُٿئہ اُٿا ننه فلستي قوم رئي هيڪ سوڪري نائوڪي لاڳي۔ <sup>2</sup> تئيون اُٿه پاسو گھري آوين آبرا مان ٻاپ ننه ڪيڏو: ”مئين تمنت ۾ فلستيون رئي هيڪ سوڪري پاڙيھ۔ ھوئہ تمي اُٿا ٿي مارو ويوا ڪراو۔“

<sup>3</sup> اُٿا ري مائيتري اُٿا ننه ڪيڏو: ”ڪي ٿارون عزيزون ري سوڪريون ۾ ڪا آڻي ٻڌي قوم ۾ ڪوئي سوڪري نٿي جي تون فلستي قوم واڙون ۾ ويوا ڪروا زائ، جيون رئي توھر پڻ نٿي ڪرل؟“

پڻ سمسُون آبرا ٻاپ ننه ڪيڏو: ”اُٿا ٿي مارو ويوا ڪراو ڪم تون اُو مون ننه پسندئ سئ۔“

<sup>4</sup> پڻ اُٿا رون مائيترون ننه ڪٻر نٿي جي اي پرميشور را پاھا ٿي سئ ڪم تون پرميشور فلستيون ٿي وڊيا رو وجه ڳوتتو تو۔ اُوئون ڏيئون ۾ اسرائيلي قوم مانھ فلستي راز ڪرتا۔

<sup>5</sup> پسئہ سمسُون ان اُٿا رئي مان ان ٻاپ تمنت شھر ھوما وُڊا۔ تمنت ري واڙيون ۾ پوڳيا، تون اوچتو هيڪ پڙوڪو شينھ ھونگر ڪرتو ڪرتو سمسُون ھومو آيو۔ <sup>6</sup> تئيون پرميشور رئي آتما پورا ٻڙ ٿي اُٿا مانھ اُٿري۔ اُٿا را ھاٿ ۾ ڪئين نٿو توئي پڻ اُٿه شينھ نئہ ام شيري نوڪيو زم ڪوئي چيليو ھوئہ۔ پڻ جئين ڪئين ڪريو تو، اُو آپرون مائيترون نئہ نہ ھمپڙايو۔

<sup>7</sup> هُوَ اُوَئِهَ زائينَ اُوَئَا سوڪري ٿي واتون ڪري ان اُو سمسُون نئه الهائي وٺي. <sup>8</sup> پسئه ڪئينڪ ڏيئون ڪيڙ زئون اُو اُوَئَا سوڪري ٿي ويوا ڪروا زاتو تو، تئين اُو مرل شينھ نئه زووا ڳيو ان ڀاريو جي شينھ را زھونڳڙ ۾ مڌ رو منارو هتو. <sup>9</sup> اُوئِه مڌ هات ۾ ليڏي رئي ان کاتو کاتو آڳڙ وُڍو ان آڀرون مائيترون ڪن آوين اُوئون نئه ڏيڏي ان اُوئي ڪاڏي. پڻ اُوئون نئه نه همڀرايو جي اي مڌ شينھ را زھونڳڙ ٿي اوتاري تي.

<sup>10</sup> پسئه اُوَئَا رو ڀاپ اُوَئَا سوڪري ري گهري ڳيو. اوت را رواز ڀرموئنه سمسُون ويوا مانھ الاهي موٽي ڏاوت ڪري. <sup>11</sup> زئون اُوئي منڪي سمسُون نئه ڀاريو تئين اُو تيه آڏمي تيڙي آيا زم اُو اُوَئَا را اُئوئر ته. <sup>12</sup> سمسُون اُوئون نئه ڪيڏو: ”هون تمون مانھ هيڪ هيماڙي نوڪونه. جي ڏاوت رون هات ڏيئون ۾ اُوَئَا نئه سوڙين مُون نئه اُوَئَا رو مطلب همڀراو، تون هون تيه توڻال ان تيه وڳا لوگهڙا را تمون نئه ڏيه. <sup>13</sup> ان جي تمي همڀراوي نه هيڪو، تون تمي مُون نئه تيه توڻال ان تيه وڳا ڏيا.“

اُوئي سمسُون نئه ڪيڏو: ”پلهه تمي آڀري هيماڙي همڀراو، تون امي اُوَئَا نئه هومڀرون.“

<sup>14</sup> سمسُون اُوئون نئه ڪيڏو: ”ڪاڏا وارا موئين ٿي ڪاڏو. ڀڙوڪا موئين ٿي مناس.“ اُو ترڻ ڏيئون هُوڏي اُوَئَا هيماڙي رو ارت نه همڀراوي هڪيا.

<sup>15</sup> نيٺ هاتمه ڏي اُوئي سمسُون ري ڏوشي نئه ڪيڏو: ”آڀرا آڏمي نئه قوهلاو زم اُو امون نئه اُوَئَا هيماڙي رو ارت همڀراوئه، نڪا تون نئه ان تارا ڀاپ را گهر نئه ڀاهي ڏيشون پري. تمي امون نئه ڪنگال ڪريا هارو تيڙاياھ، ڪي؟“

<sup>16</sup> تئين سمسُون رئي ڏوشي سمسُون هومئي روئين ڪيو مڏي: ”تمي مُون ٿي نفرت ڪرو. تمون نئه مُون ٿي پريم نٿي. تمي ماري قوم رون منڪون ٿي هيماڙي نوڪيھ پڻ مُون نئه اُوَئَا رو ارت نه همڀرايو.“ سمسُون اُوَئَا نئه ڪيڏو: ”واھ! مئين آڀرون مائيترون

نٺه پڻ نٽي همپرايو، تون تون نٺه ڪم ڪرين همپراوونھ؟ ”<sup>17</sup> پسئہ اُو ڏاوت را هاتما ڏي هُوڏي روتئي رئي. نيٺ هاتمنہ ئي ڏي ام ٿيو جي اُوئہ آپري ڏوشي نٺه همپرايو پرو ڪم تون اُوئہ سمسُون نٺه الاهي تنڳ ڪريو تو. پسئہ ڏوشي زائين اُوئا هيماڙي رو ارٿ آپري قوم رون منڪون نٺه همپرايو پرو.

<sup>18</sup> تئيون هاتمنہ ئي ڏي، ڏي آتميا مور، اُوئا شهر ري منڪي سمسُون نٺه ڪيڏو: ”مد ٿي منو پيزو ڪي؟ ان شينھ ٿي ٻُڙوڪو پيزو ڪوڻ؟“ تئيون اُوئہ ڪيڏو: ”جي تمي ماري واسڙي نٺه هڙ ۾ نه جوتوت، تون مارئي هيماڙي ڪيڏي نه سوتيت.“

<sup>19</sup> تئيون پرميشور رئي آتما پورا ٻڙ ٿي اُوئا مانھ اوترئي ان اُو فلسٽيون را شهر اسقلون هومو ڳيو. اُوئہ اُوئون را تيه آڏمي ماريا، اُوئون رو ٻڌوئي ڪئين لوتيو، اُوئون را لوگهڙا اوتارين هيماڙي سوڙيا واڙون نٺه ڏيڏا پرا. اُوئا نٺه الاهي رينھ سڙئي جي آپري ڏوشي اُوئہ ئي ساڏئي ان آپرا ٻاپ ري گھري پاسو ڳيو پرو. <sup>20</sup> تيا ڪيڙ سمسُون رئي ڏوشي هিকা فلسٽي نٺه ڏيڏئي پري، جيو سمسُون را ويوا ري ڏاوت ۾ سمسُون رون اُوئون موئين ٿي هيڪ هتو.

### سمسُون فلسٽيون ٿي ڀڏلو لئھ

**15** ڪئينڪ ڏيئون ڪيڙ ڪٽڪ را لبارا رٺه توئہ سمسُون چيلو لين آپري هاهريئي ڳيو ان ڪيڏو: ”هون آپري ڏوشي ڪن ڪمرا موئين زاوا ڪرون.“ پڻ اُوئا رٺه هاهرئہ اُوئا نٺه گھر ۾ زاوا نه ڏيڏو. <sup>2</sup> اُوئا رٺه هاهرئہ ڪيڏو: ”مون نٺه ام لاڳيو جي تون نٺه اُوئا ٿي الاهي نفرت ٿي ڳئي تئي، تيام مئين اُوئا نٺه ٿارا اُوئر نٺه ڏيڏئي پري. اُوئا رئي نونئي بين اُوئا ٿي الاهي روياري سئ، تيام اُوئا رٺه ڀڏلئہ تون ايٺا نٺه لئہ رئي!“

<sup>3</sup> هائي وات هومپرين سمسُون منڪون نٺه ڪيڏو: ”هوءَ جي هون فلسٽيون رو ڪوئي پڻ نقصون ڪرون، تو هايا ۾ مارو ڪوئي ڏوه نئين هوءَ.“ <sup>4</sup> پسئہ سمسُون زائين ترڻ

هو شينئازون زهالي ان اُونبازي لِيدي ان بي بي شينئازون ري پُونسزي آيت موئين پيڙي  
 ڪرين وسا هيڪوڪئي اُونبازي پوندئي. <sup>5</sup> پسنه اُونبازي ڏڪاڙين شينئازون فلسطينون را اُوپل  
 قصلون موئين ساڏي ڏيڏي. هم اُوته ڪٽڪ رون پوزون، اُوپل قصل، انگورون ري واڙي  
 ان زيتون را باگه پڻ ٻاريا پرا.

<sup>6</sup> زئيون فلسطيني پونسو: ”اي ڪيئنه ڪريوه؟“ تتيون منڪي همپرايو: ”سمسون جيو  
 تيمناٽ شهر را ربا واڙا رو زمائي سئ. ان هائي اُوته ايئا هارو ڪريو جي اُوئا رئه هاهرئه  
 اُوئا رئي ڏوشي اُوئا را ائوتر نئه ڏيڏئي پري.“ تتيون فلسطيني زائين اُوئا ٻاپ ڏيڪري نئه  
 ٻاريا پرا.

<sup>7</sup> تيا مانه سمسون اوتون نئه ڪيڏو: ”جي تمي امروم ڪرتا ربا، تون هون ضرور پڌلو  
 لي، هوءَ تمون نئه ماڳنه نئين ساڏون!“ <sup>8</sup> پسنه اُوته اوتون نئه ماري مارين اوتون را هات  
 پڳ پونگي نوڪيا ان گهٽون منڪون نئه ماري نوڪيا. پسنه او اوتون زائين ايتام تيڪري را  
 پونئيرا ۾ ربوا مڏيو.

### سمسون فلسطينون نئه هراوئه

<sup>9</sup> تتيون فلسطيني يهوداه را علاقا ۾ آيا ان لحي شهر رئه آهه پاهه پڪڙين وڊيا هارو  
 تنبو هئا. <sup>10</sup> تتيون يهوداه را قبيل را منڪي اوتون نئه ڪيڏو: ”تمي ڪم امون مانه  
 حملو ڪرو آيا؟“ اُوئي جواپ ڏيڏو: ”امي سمسون نئه زهالوا آيا. زم اُوته امون ٿي  
 ڪريوه، همروم امي پڻ اوتو ٿي ڪرشون.“ <sup>11</sup> تتيون يهوداه را قبيل را ترڻ هزار آدمي  
 ايتام تيڪري ري تريڙون ۾ اوتري پڙيا ان سمسون نئه ڪيڏو: ”ڪي تون نئه ڪبر نٿي جي  
 آيون مانه فلسطينون رو راز سئ؟ توئي تئين امون ٿي ام ڪم ڪريوه؟“ اُوته اوتون نئه  
 ڪيڏو: ”زم اُوئي مون ٿي ڪريو تو، همروم مئين پڻ اوتون ٿي ڪريوه.“

<sup>12</sup> اُوئي اُوئا نئه ڪيڏو: ”امي ايئا هارو آيا جي تون نئه ٻوندين فلسطين رئه حواله ڪرون پرو-“ سمسون ائون نئه ڪيڏو: ”مون ٿي هون ڪائو جي تمجي آپ مون نئه نئين مارو-“

<sup>13</sup> اُوئي جواب ڏيڏو: ”نا، امي تون نئه نئين مارون، پڻ امي تون نئه ڏاڍو ٻونڌئون ان ائون رئه حواله ڪرئون-“ پسئ اُوئي سمسون نئه ٻي نوون رنڊوڙون ٿي ٻونڌيو ان ٽيڪري ري تريڙ ٿي ٻارا تيڙي آيا-

<sup>14</sup> زئون او لحي شهر ڪن پوگيا تيون فلسطيني اُوئا نئه يارين هوڪرون ڪرتا ڪرتا اُوئا ڪن آيا- تيون پرميشور رئي آتما پورا پڙ ٿي اُوئا موئين اوترئي ان اُوئا رون هاتون ۾ ٻونڌل رنڊوڙا ام ٽوتين پڙي ڳيا زم ڏيوتا لاڳتون ئي شئي ٽوتي زائھ- <sup>15</sup> سمسون نئه ڳڏيڙا ري زاڙي رئي هيڪ ڏاڍي هاڏڪي هاٿ آي ڳئي، جيا ٿي اُوئه فلسطيني را هيڪ هزار منڪ ماري نوڪيا-

<sup>16</sup> پسئ سمسون ڪيڏو:

”ڳڏيڙا ري زاڙي ري هاڏڪي ٿي ڍڳ لاڳي ڳيا،

ڳڏيڙا ري زاڙي ري هاڏڪي ٿي مئين هيڪ هزار منڪ ماريا-“

<sup>17</sup> هم ڪين اُوئه زاڙي رئي هاڏڪي ڦڳوڙي پري ان اُوئا ماڳ رو نوم زاڙي رو ڏونگر راکيو-

<sup>18</sup> پسئ سمسون نئه الاهي تره لاڳي- تيون اُوئه پرميشور نئه پوڪارين ڪيڏو: ”تمجي آپرا ٻونها ري هاڻي جيت ڏيڏيھ- پڻ ڪي هوءَ هون ترهي مرون؟ ان فلسطيني رون هاتون ۾ پڙون جيون رئي توهر ٿيل نٿي؟“ <sup>19</sup> تيون پرميشور اُوئا کاڌا ٿي جيو لحي ۾ هتو پوئي ويو- زئون اُوئه پيڏو تيون اُوئا را جيو ۾ جيو آيو ان او تازو ٿيو- تيام اُوئا ماڳ رو نوم پڪار رئي ويرئي راکيو- او آڙ هوڏي لحي ۾ سئ-

<sup>20</sup> تيا ڪيڙ سمسُون فلسطينيون را راز ۾ ويه سال اسرائيلي قوم رو آڳيون ريو.

### سمسُون غزه شهر ۾

**16**

پسئ سمسُون غزه شهر هومو ڳيو ان اوئنه هيك پاترن پاڙي ان اوئا ڪن ڳيو.  
<sup>2</sup> تئيون غزه شهر رون منڪون نئه ڪبر پڙئي جي سمسُون ايئنه آيوه. تئيون اوئي  
 اوئا ماڳ نئه گهيري ليدو ان ٻڌي رات شهر را دروازا ڪن هٽائين پينا ربا ان آبت موئين  
 ام صلاح ڪري: ”آپي هوار تيا رئه توئنه اوئا نئه مارشون پرو.“ <sup>3</sup> پڻ سمسُون رُوڳو آڏي  
 رات هُوڏي هُوٽو ريو. پسئ اونين شهر را پاڳو رون پيئون تاڪون نئه زهالين پلرون هُوڏو  
 اوڪاڙيو پرو ان اوئا نئه آپرون ڪوون مانه اوپاڙين ڏونگر ري سوتي مانه لي ڳيو جيو خبرون  
 شهر هومو سئ.

### سمسُون ان ٻائي دليله

<sup>4</sup> اوئا ڪيڙ سمسُون نئه هيك سوڪري ٿي پريم ٿي ڳيو جيا رو نوم دليله هتو. او سورق  
 نڏي ڪن ريتئي. <sup>5</sup> هوئه فلسطينيون ري آڳيون اوئا سوڪري ڪن زائين ام ڪيدو: ”تون  
 اوئا نئه قوهلاوين ڪبر پاڙ جي اوئا ۾ پڻ ڪيئون آوئه ان امي ڪم ڪرين اوئا نئه هراوي  
 هيڪونه ان امي اوئا نئه ڪم ڪرين ٻوندين آڀرا وس موئين ڪري هيڪونه. هايا هارو  
 امون موئين ٿي هر هيك تون نئه چوندي را اڳياره هو سڪا ڏيشي.“  
<sup>6</sup> تئيون دليله سمسُون نئه ڪيدو: ”مون نئه تمي همپراو، جي تمون ۾ اتئي طاقت  
 ڪيئون آوئه ان تمون نئه ڪوئي منڪ ڪم ڪرين ٻوندين آڀرا وس ۾ ڪري هيڪه؟“  
<sup>7</sup> سمسُون اوئا نئه ڪيدو: ”جي مون نئه مال ري هات تازي نسون ٿي ٻونڌه، تون هون  
 ڪمزور ٿين پيزون منڪون را زم ٿي زائيه.“

<sup>8</sup> تئيون فلسطينيون را آڳيون مال ري هات تازي نسون لين اوئا سوڪري ڪن آيا ان اوئه  
 سمسُون نئه اوئون ٿي ٻونڌيو. <sup>9</sup> اوئه سوڪري ڪينڪ آدمي موئينليا ڪما موئين هٽاڙيا

تا. پسئہ اُوئہ ڪِيتو: ”او سمسُون، فلسِتي تمون مانہ حملو ڪرو آياھ!“ تئيون سمسُون اُوئون نسون نئہ ام توڙي زم سڻي ڏيوتا سبتون ئي توتي زائہ. هم ڪٻر نہ پڙئي جي اُوئا ۾ طاقت ڪيئون اُوئہ.

<sup>10</sup> تئيون دليلہ سمسُون نئہ ڪِيتو: ”زوئو! تمي مُون نئہ ڏوڪو ڏيتوھ ان مُون ٿي ڪوڙ ٻولياھ. هُوئہ تمي ميرپونئي ڪرين مُون نئہ همپراوو جي تمون نئہ ڪم ڪرين ٻوندو؟“  
<sup>11</sup> سمسُون ڪِيتو: ”جي مُون نئہ نوون رسون ٿي ٻوندئہ جيا ڪيڏي واپرايا نہ هُوئہ، تون هُون ڪمزور ٿين پيزون منڪون جيوو ٿي زائِھ.“

<sup>12</sup> پسئہ دليلہ نوا رسا ليڏا ان اُوئا نئہ ٻوندين ڪِيتو: ”او سمسُون، فلسِتي تمون مانہ حملو ڪرو آياھ!“ تئيون اُوئہ آپرون هاڻون ۾ ٻوندل رسا ام توڙيا زم ڏورڙا هُوئہ. اُوئہ توئئہ پڻ موئينليا ڪمرا موئين ڪئنيڪ آدمي هٿال هٿا.

<sup>13</sup> تئيون دليلہ سمسُون نئہ ڪِيتو: ”زوئو! تمي مُون نئہ ڏوڪو ڏيتوھ ان مُون ٿي ڪوڙ ڪريوھ. هُوئہ تمي ميرپونئي ڪرين مُون نئہ همپراوو جي تمون نئہ ڪم ڪرين ٻوندو؟“  
 سمسُون ڪِيتو: ”مارا مٿوئاڙون ري هات سوتي ڪڏي را سنچا ۾ ڳوٺ پري.“

<sup>14</sup> تئيون اُوئہ ڪڏي را سنچا ۾ اُوئا را مٿوئاڙون نئہ ڏورڙون پيرا توئين ڳونيا پرا ان ڪِيتو: ”او سمسُون، فلسِتي تمون مانہ حملو ڪرو آياھ!“ تئيون اُو اُونگھ ٿي زاڳيو ان لُوگھڙا نايا واڙي ڪڏي نئہ ڪلون ان ڏورڙون هُوڏو اُوڪاڙيو پرو.

<sup>15</sup> پسئہ اُوئہ سمسُون نئہ ڪِيتو: ”تمي ام ڪم ڪرين ڪي هيڪوھ جي تمون نئہ مُون ٿي پريم سئہ؟ ڪم تون تمارا مَن موئين تون هُون سون ئي نئين، تمي ترڻ وار مُون نئہ ڏوڪو ڏيتوھ ان نا همپرايو جي تمون ۾ طاقت ڪيئون اُوئہ.“<sup>16</sup> زئيون اُو اُوئا نئہ روزوني آپري واتون ٿي تنگ ڪروا مڏي ان مجپور ڪروا مڏي تئيون اُو الهائي تنگ ٿي ڳيو.  
<sup>17</sup> تئيون اُوئہ اُوئا نئہ ٻڌو هاس هاس همپرايو: ”مئين ڪيڏي پڻ مٿوئاڙ نٿي ڪتريا، ڪم

تون هُون ماري مان را پيت ٿي ايشور را نوم مانھ ڏيڏل سون۔ جي مارا مٿوڻار وائڻه پرا تون ماري طاقت ڪتم ٿي زاشي ان هُون ڏوڀرو ٿين عام آدميون را زم ٿي زائيه۔“

<sup>18</sup> زئيون دليله زويو جي اُوڻه ٻڌوئي هاس هاس همپرايوه پرو تئيون اُوڻه فلسطينيون رون اڳيونون نئه ام ڪي ميليو: ”هيك وار وڙي آو، ڪم تون اُوڻه مون نئه ٻڌو هاس هاس همپرايوه پرو۔“ تئيون فلسطينيون را اڳيون چونڌي را سڪا لين اُوڻا ڪن آيا۔<sup>19</sup> تئيون اُوڻه سمسون نئه اپرون ڳوڏون مانھ هُوڻاريو ان هيسا آدمي نئه تيڙاوين اُوڻا را مائا ري هاتي سوتي وڍاي پري زم اُو هيو ٿي زائ، تيام اُوڻا رئي طاقت ڪتم ٿي ڳئي۔<sup>20</sup> پسئه اُوڻه ڪيڏو: ”او سمسون، فلسطيني تمون مانھ حملو ڪرو آياھ!“ ان اُو اُونگھ ٿي زاڳيو ان سوچيو جي، ”هون پيرهين را زم ٻارو زائين آپرا آپ نئه سڌاي ليه۔“ پڻ اُوڻا نئه ڪپر نتئي جي پرميشور اُوڻا نئه ساڌي ڏيڏو۔<sup>21</sup> تئيون فلسطيني اُوڻا نئه زهالين اُوڻا ري اونڪيون ڪاڍي پري ان اُوڻا نئه غزه شهر ۾ لي ڳيا ان پيتو ري ٻيڙيون ٿي اُوڻا نئه ٻونڌيو پرو۔ اُوڻه اُو جيل ۾ گهرتئي ڌرتو۔<sup>22</sup> پڻ اُوڻا را مٿوڻار وڙي وڌو مڌيا۔

### سمسون رو موت

<sup>23</sup> هوءَ فلسطينيون را اڳيون پيرا ٿيا زم اُو آپرا ڏيو دجون را نوم مانھ گهڻو مال ساڙئھ ان ڪشي ڪرئ، ڪم تون اُو ام ڪيتا تا: ”آپئھ ايشور آڀا دشمن سمسون نئه آڀا هات ۾ ڪريو پرو۔“<sup>24</sup> زئيون منڪ اُوڻا نئه پاڙتا تئيون آپرا ڏيو را وڪوڻ ڪرين ام ڪيتا: ”آپئھ ايشور آڀا دشمن نئه آڀا هات ۾ ڏيڏوھ رو، جيئھ آڀا ملڪ نئه تياھ ڪريو تو ان آڀون گهڻون منڪون نئه ماري نوڪيا۔“<sup>25</sup> پسئه زئيون اُو الاهي ڪش ٿيا تئيون اُوئي ڪيڏو: ”سمسون نئه هاڏ ڪرو زم اُو امون نئه ڪش ڪريا هارو رمت ڪرئ۔“ پسئه اُوئي سمسون نئه جيل ٿي تيڙايو ان اُوڻون هارو رمت ڪرو مڌيو۔ پسئه اُوئي اُوڻا نئه بئيون ٿميون وسا اُوڀاڙيو۔<sup>26</sup> تئيون سمسون اُوڻا جووڻ ٿي ام ڪيڏو جيو اُوڻا رو هات زهالين پاڍي زاتو:

“مُون نټه اُوئون ټمپون نټه سېوا دټه جيا مانه اي مندر اُوپل سټه زم هُون اُوئون نټه ټيڪ هون.”<sup>27</sup> هُوټه اُو مندر دوشيون ان آدميون ټي پرال هتو ان فلسطين را ٻڌا اُگيوون پڻ اُوټه هتا ان مندر ري چت مانه ترټڪ هزار منک هتا جيا سمسُون رټي رمت زوتا تا.

<sup>28</sup> تئيون سمسُون پرميشور ټي وينټي ڪرين ڪيدو: “او مارا پريو، پرميشور، مُون نټه همپارو! ميريوني ڪرين ټي مُون نټه رُوگي هيك وار وڙي طاقت ديو زم هُون هيكه وار م فلسطين ټي آپري اونكيون رو پڌلو ليون رو.”<sup>29</sup> هم ڪين سمسُون اُوئون پئيون ټمپون نټه جيا مانه مندر ناول هتو هيك مانه زمنا ان پيزا مانه داوا هات ټي زور ڏيدو.<sup>30</sup> ان سمسُون ڪيدو: “فلسطين پيرو پلټه هُون پڻ مري زائون!” پسټه اُوټه آپرا پورا پڻ ټي ڌڪو ڏيدو ان اُو مندر اُوئون اُگيوونون ان ٻڌون منكون مانه جيا اُوټا موئين هتا پڙي آيو. هم اُوټه مرتون اُوټا ټي پڻ گهٽا منک ماريا جيون نټه اُوټه حياتي هوتون ماريا تا.<sup>31</sup> تئيون سمسُون را پائي، اُوټا را ڪاڪا ان ڪاڪائي پائي ٻڌائي آيا ان اُوټا رو لاش اُوٻاڙين لي گيا، ان اُوټا نټه صرعا ان استال شهرون وسا اُوټا را ٻاپ منوحه را پونيئرا جيوا مقوم موئين راکيو.

اُو ويه سال اسرائيلي قوم رو اُگيوون ريو.

## میکاه نومي اسرائيلي مورتی پوزھ

**17** افرائيم قبيل را ڏونگر وارا علاقا م هيك منک ريتو جيا رو نوم ميڪاه هتو.<sup>2</sup> اُوټه آپري مان نټه ڪيدو: “چونڌي را اُو اُگيارٽه هو سڪا جيا ڪئيڪ ليڌات را ان مئين تمون نټه هايون هارو پٽا ڏيتون هومپريا تا، اُو چونڌي را سڪا مُون ڪن سٽه. اُو مئين ليڌا تا.”

اُوټا ري مان ڪيدو: “مارا ڏيڪرا، پرميشور تون نټه آشيرواڌ ڏٺه!”<sup>3</sup> پسټه اُوټه چونڌي را اُو اُگيارٽه هو سڪا آپري مان نټه پاسا ڏيڌا. تئيون اُوټا ري مان اُوټا نټه ڪيدو: “هُون

آپرا ڏيکرا هارو آڀرون هاتون ٿي اي چونڌي پرميشور را نوم مانھ ڏيونھ رئي زم ايئا ٿي هيڪ شيتل ان پيڙي ڳاڙول مورتئي نوراوون۔ هم هون او هاڳي چونڌي تون ننه پاسي ڏيھ۔“<sup>4</sup> هيون نمونھ، زيون اوئھ او چونڌي را سڪا آڀري مان ننه ڏيڏا تيون اوئا ري مان چونڌي را بي هو سڪا هونارا ننه ڏيڏا ان هونارھ اوئون ٿي هيڪ شيتل ان پيڙي ڳاڙول مورتئي ناوي ان او مورتئي ميڪاھ آڀرا گھر ۾ راڪي۔

<sup>5</sup> ميڪاھ را گھر ۾ مندر هتو ان اوئھ آڀرون ڏيڪرون موين ٿي هيڪا ننه پوزاري راڪيو۔ ميڪاھ پوزاري رو ايوو پيرڻ نارايو جيو هاڳ ٿو پاڳ مڪ پوزاري واڙا کاس ويسڪوت جيوو هيڪ ويسڪوت هتو ان اوئھ گھر همپاريا واڙون ڏيون ري مورتئي پڻ نوراوي۔<sup>6</sup> اوئون ڏيئون ۾ اسرائيلي قوم ۾ ڪوئي يادشا نٿو ان جيا ننه زم نيڪ لاڳتو هم ڪرتو۔

<sup>7</sup> لاوي قبيلا رو هيڪ جوڻ سوڪرو هتو، جيو يهوداھ را قبيلا واڙون وسا يهوداھ را علاقا را شهر بيت لحم ۾ ريتو۔<sup>8</sup> او جوڻ سوڪرو يهوداھ را بيت لحم شهر ننه ساڏين ڪيٽڪ پيزيل ربا هارو ماڳ ڳوتتو تو۔ او پند ڪرتو ڪرتو افرائيم قبيلا واڙون را ڏونگراڙا علاقا ۾ ميڪاھ ري گھري زائي پوڳيو۔<sup>9</sup> ميڪاھ اوئا ننه پونسيو: ”تون ڪيئون آيوھ؟“ اوئھ اوئا ننه جواپ ڏيڏو: ”هون لاوي سون ان يهوداھ را بيت لحم شهر ٿي آيوھ۔ هون ربا هارو ماڳ ڳوتونھ ريو۔“

<sup>10</sup> ميڪاھ اوئا ننه ڪيڏو: ”تون مون هارو پوزاري ٿئھ! مون هارو باپ را زم همپاريا واڙو ٿئھ! هون تون ننه سال ۾ چونڌي را ڏھ سڪا ان جوڙو لوگھڙون رو ان کاڌو پيڏو پڻ ڏيھ۔“ تيام او لاوي جوڻ اوئا ري گھري ڳيو۔<sup>11</sup> او لاوي جوڻ اوئا ري گھري ربا هارو راضي ٿيو ان او جوڻ سوڪرو ميڪاھ رو پيزون ڏيڪرون را زم ٿي ڳيو۔<sup>12</sup> ميڪاھ اوئا لاوي ننه پوزاري راڪيو ان او جوڻ ميڪاھ هارو پوزاري ٿيو ان اوئا ري گھري ريو۔

<sup>13</sup> تئينون ميڪاه ڪيڏو: ”مُون نٽه پڪ سٺه جي هونءِ پرميشور مارو پلو ڪرشي ڪم تون هيڪ لاوي منڪ مون هارو پوزاري ٿيوھ.“

## دان را ڦيلا واڙا مورتِي پوزئھ

**18** ائون ڏيئون ۾ اسرائيلي قوم ۾ ڪوئي پاڌشا نٿو. اسرائيلي قوم رون ڦيلون موئين ٿي دان رو ڦيلو هزون آپري وراست مانھ قوضو نٿو ڪري هيڪيو. تيام او آپرا ربا هارو جگا ڳوتوت ريو. <sup>2</sup> هونءِ دان ري منڪي صرعاھ ان استال شھرون ٿي آپرا ڦيلا را پونس پڙوڪا جوڌا رونا ڪريا زم ڪياڪ علاقا نٽه زونءِ ان جاسوسي ڪرئ. تيام ائون نٽه ڪيڏو: ”زائين ڪوڪ علاقا زونءِ!“ تئينون اوافرائيم را ڦيلا واڙون را ڏونگراڙا علاقا ۾ ميڪاه ري گھري ڳيا ان اوئنه ٿڪيا. <sup>3</sup> زئينون او ميڪاه ري گھري هتا تئينون اوئي هيڪا لاوي جوڻ رو هاڏ هومپريو. تئينون اوئي زائين اوئا نٽه پونسو: ”تون نٽه ايئنه ڪوڻ لي آيوھ؟ تون ايئنه ڪي ڪرئھ ان ايئنه ٿارو ڪي؟“

<sup>4</sup> اوئھ ائون نٽه ميڪاه را سلوڪ را پارام همپريو ان ڪيڏو: ”اوئھ مون نٽه نوڪري ڏيڏي ان آپ هارو پوزاري نايو.“

<sup>5</sup> اوئي اوئا نٽه ڪيڏو: ”ايشور ٿي پونس زم امون نٽه ڪپر پڙي زائھ جي امي ايئا پنڌ ۾ ڪامياپ ٿيشون ڪا نا؟“

<sup>6</sup> پوزاري ائون نٽه ڪيڏو: ”شونتي ٿي زائو ڪم تون تمارو اي پنڌ پرميشور پارئھ ريو.“

<sup>7</sup> پسئھ او پونس ئي آدمي رونا ٿيا ان لیس شھر هوما ڳيا. اوئي اوٿ رون منڪون نٽه پاريا جي او ڪشحال سٺھ ان هپ ان شونتي ٿي رھ ربا زم صيدا شھر واڙا هپ ان شونتي ٿي ريتا ان اوئا ملڪ موئين پاڌشا نٿو جيو ائون نٽه ڪئينڪ وات ۾ تنگ ڪرئھ ان او صيدا شھر واڙون ٿي الاهي شيتئھ هتا ان ائون رو ڪيا ٿي پڻ ڪوئي واسطو نٿو.

<sup>8</sup> زئيون اُو صُرعاہ ان اِستال شھرون ۾ آڀرون پايون ڪنَ پاسا آيا ان اُوئون ري پايي اُوئون نئہ پُونسيو: ”ڏيو ڪڀر ڪي ٿيو؟“ <sup>9</sup> اُوئي ڪيڏو: ”هالو! آبي اُوئون مانہ حملو ڪرون، ڪم تون امي اُوئا علاقا نئہ پاڙيوہ۔ اُو الاهي ناٿوڪو سئہ۔ ڪي تمي امرام ٻيٺا ريشو؟ هوئہ تمي وراست ليڏا هارُو زيا ۾ ڏير مت ڪرو! <sup>10</sup> جي تمي هالشو، تون هيڪ ايوي قوم ڪنَ پُوڳشو جئي شونتي ٿي رئہ رئي۔ اُو علاقا الاهي موتو سئہ ان ايشور اُوئا نئہ تمارون هائون ۾ ڏيڏوہ رو۔ اُو ايوو ماڳ سئہ جيا ۾ ڏنيا رئي ڪيا پڻ شينہ رئي ڪاپئي نٿي۔“

<sup>11</sup> تئيون دانَ را قبيلا ٿي سو هو آڏمي جنگ را هٿيار لينَ صُرعاہ ان اِستال شھرون ٿي رَوونا ٿيا <sup>12</sup> ان يهوداہ علاقا را شھر قريت يعريم هوما زائينَ تنبو ڪوڙيا۔ تيام آڙ هوڏي اُوئا ماڳ نئہ دانَ ري قوج رو اڏو ڪئہ ان اي قريت يعريم شھر را اٿوئلئہ پاهئہ سئہ۔

<sup>13</sup> اُوئون وينَ افرائيم را قبيلا وازون را ڏونڱارا علاقا ٿي ٿيتا ميڪاہ ري گھري ڳيا۔

<sup>14</sup> تئيون اُو پونس آڏمي جيا لیس شھر رئہ آهئہ پاهئہ را علاقا رئي جاسوسي ڪروا ڳيا تا، اُوئي آڀرون پايون نئہ ڪيڏو: ”ڪي تمون نئہ ڪڀر سئہ جي ايئون گھرون ۾ مُڪ پوزاري واڙا کاس ويسڪوٽ جيوو هيڪ ويسڪوٽ، گھر همپاريا وازون ڏيوون ري مُورتي، هيڪ شيتل مورتئي ان هيڪ ڳاڙول مُورتي پڻ سئہ۔ تيام هوئہ تمي سوچي ليو جي تمارئہ ڪي ڪرو۔“ <sup>15</sup> تئيون اُو اولَ هوما وڙيا ان اُوئا لاوي جوڻ ري گھري ڳيا، جيو ميڪاہ را پاڙا ۾ هتو، ان اُوئا نئہ نمسڪار ڪيو۔ <sup>16</sup> ان اُو سو هو آڏمي جيا دانَ را قبيلا ٿي هتا جنگ را هٿيار لينَ پاڙا ري گھتي ڪنَ ٻارا اُپيا ريا۔ <sup>17</sup> اُوئي پونس آڏمي جيا اُوئا علاقا رئي جاسوسي ڪروا ڳيا تا اُوئہ موئين زائينَ شيتل مُورتي، مُڪ پوزاري واڙا کاس ويسڪوٽ جيوو هيڪ ويسڪوٽ، گھر همپاريا وازون ڏيوون ري مُورتي، ان ڳاڙول مُورتي ليڏي ري ان اُو پوزاري دروازه مانہ اُوئون سو هو آڏميون پيرو اُپيو تو جيا جنگي هٿيار لينَ اُپيا تا۔

<sup>18</sup> زئيون اُو ميڪاه را گهر ۾ پيهينَ شيتلَ مُورتي، مُڪ پُوزاري واڙا کاس ويسڪوت جيوو هيڪ ويسڪوت، گهر همپاريا واڙون ڏيون ري مُورتي ان ڳاڙولَ مُورتي لي آيا، تو اُوئ پُوزاري اُوئون نئه ڪيڏو: ”تمي اي ڪي ڪروھ ربا؟“

<sup>19</sup> تئيون اُوئي پُوزاري نئه ڪيڏو: ”ماڻ ڪر! ڪئين مت ٻول. هُوئ امون پيڙو هال ان امارو پُوزاري تئه ان امارئي همپار ڪر! ڪي تون هارو هيڪي اڪائي رو پُوزاري ٿيوو نائوڪو سئ ڪا وڙي اي جي تون اسرائيلي قوم را هيڪا ڪُٽپ رو مطلب هيڪ ڪيلا رو پُوزاري تئه؟“ <sup>20</sup> تئيون پُوزاري نئه اي نائوڪو لاڳيو ان اُو مُڪ پُوزاري واڙا کاس ويسڪوت جيوو هيڪ ويسڪوت، گهر همپاريا واڙون ڏيون ري مُورتي ان شيتلَ مُورتي لينَ منڪون پيڙو ڳيو پرو.

<sup>21</sup> پسئ اُو اُوئون پاسا وڙينَ رَوونا ٿيا ان قيمتي شينهنون، ٻارَ پسا ان مال آپرئ اڳر ڪريو. <sup>22</sup> دانَ را ڪيلا واڙا زئيون ميڪاه را گهر ٿي شيتئ نيهري ڳيا تئيون ميڪاه آپرون ٻڌون پاڙوشيون نئه پيڙا ڪرينَ دانَ را ڪيلا واڙون وونهڙ ٿيو ان اُوئون ڪنَ زائينَ پُوڳيو. <sup>23</sup> اُوئ لار ٿي دانَ رون منڪون نئه پُوڪاريا تئيون اُوئي وڙينَ ايئون هومو زويو ان ميڪاه نئه ڪيڏو: ”ڪي ٿيوھ جي تون اتون منڪون نئه پيڙا لينَ آيوھ؟“

<sup>24</sup> اُوئ ڪيڏو: ”تمي مارون ڏيون ري مُورتي جي مئينَ نوراوي تي ان مارا پُوزاري نئه پيڙو لي ڳياھ. هُوئ مُون ڪنَ پيڙو ڪي پچيوھ؟ تون پسئ مُون نئه ڪم ڪوھ ربا جي تون نئه ڪي ٿيوھ؟“

<sup>25</sup> دانَ ري منڪي اُوئا نئه ڪيڏو: ”هُوئ پش! ماڻ ڪر! ام نه تئه جي ڪاوڙ موئين ڪوئي آدمي تون مانھ حملو ڪرئ ان تون آپرو ان آپرا گهر واڙون رو جيو ڳمئ پرو.“

<sup>26</sup> تئيون دانَ را منڪ آپرو مارڳ لينَ ڳيا پرا ان ميڪاه پڻ آپري گهري پاسو ڳيو پرو ڪم تون اُوئ پارو جي دانَ واڙا اُوئا ٿي پڙوڪا سئ.

<sup>27</sup> ام اُو ميڪاه ري نوراوُل مُورتي ان اُوئا پُوزاري نئه، جيو اُوئا ڪن اُوئنه هتو، لين لِس شهر ۾ اُوئون منڪون ڪن پُوگيا جيا هپ ان شونتي ٿي ريتا. اُوئون نئه تروار ٿي ماري پرا ان شهر ٻاريو پرو. <sup>28</sup> اُو شهر بيت رحوب شهر ڪن زهوڙ موئين هتو. اُو صيدا شهر ٿي الاهي شيتنه هتو ان اوت رون منڪون رو ڪيا ٿي ڪوئي واسطو نتو. تيام اُوئون نئه پچايا وازو ڪوئي هتو ئي نئين.

تيا ڪيڙ دان را قبيلا واري اُوئا شهر نئه وڙي نايو ان اُوئا موئين ربوا مڏيا. <sup>29</sup> اُوئي اُوئا شهر رو نوم آڙا ڏاڏا را نوم مانھ دان راڪيو جيو اسرائيل، مطلب يعقوب رو ڏيڪرو هتو. تيا مور اُوئا شهر رو نوم لِس هتو. <sup>30</sup> دان را قبيلا واري اُو شيتل مُورتي آپ هارو راڪئي پري. يوناتن، جيو موسي را ڏيڪرا جيسوم را وستار رو هتو، اُو ان اُوئا رو وستار دان را قبيلا وازون هارو پُوزاري ربا زئون هُوڏي اسرائيلي قوم را منڪ قيڏي ٿين ٻاروئا ۾ نه ٿيا. <sup>31</sup> ان زئون هُوڏي ايشور رو گهر سيلا شهر ۾ ريو تيون هُوڏي اُوئون ڪن اُو شيتل مُورتي ربي جيا نئه ميڪاه آپ هارو نهرائي تي.

## بنيامين قبيلا را منڪ لاوي ري ڏوشي ربي عزت لوئنه

لاوي قبيلا رو هيڪ منڪ ان اُوئا ربي ڏوشي جي بوني هتي **19** اُوئون ڏيئون ۾ اسرائيلي قوم ۾ ڪوئي يادشا نتو. هوه ام ٿيو جي لاوي را قبيلا رو هيڪ آدمي، جيو افرايم قبيلا وازون را ڏونگوارا علاقا ۾ پرليا چيڙا مانھ ريتو، اُو يهوداه علاقا را شهر بيت لحم ٿي هيڪي بوني ٿي وبوا ڪريو. <sup>2</sup> اُوئا ربي هائي ڏوشي اُوئا ٿي رينهايي گئي ان اُوئا نئه ساڌين يهوداه علاقا را شهر بيت لحم ۾ آڙا ٻاپ ري گهري گئي پري ان چار مئينا اُوئنه ربي. <sup>3</sup> تيون اُوئا رو آدمي آڙا هيڪا شيواڌاري نئه ان ٻي گڏيڙا پيڙا لين اُوئا لار گيو زم اُوئا نئه مناوين پاسي تيڙي آوه. زيون اُو اُوئنه

پُڳيو تو اُئا رئي ڏوشي اُئا نٿه آڀرا ٻاپ ڪن تيڙي ڳئي ان اُئا ڏوشي رو ٻاپ اُئا نٿه پاڙين الاهي ڪش ٿيو. <sup>4</sup> اُئا رٿه هاڻرٿه اُئا نٿه پاسو گهري زاوا نه ڏيڌو. تيام اُئي ترڻ ڏي پيڙو کاڌو پيڌو ان اُئڻه ربا.

<sup>5</sup> چارمٽه ڏي زئيون اُو زايا هارو هوار رو ويلو اُنيو تون اُئا ڏوشي رٿه ٻاپ آڀرا زمائي نٿه ڪيڌو: ”روئي ڪائين ٿوڙيڪ ڌير آروم ڪرو! پسٽه پلٽه زايا پرا!“ <sup>6</sup> تئيون اُو ٻي ئي ٻيهي ربا ان پيڙو کاڌو پيڌو. پسٽه اُئا رٿه هاڻرٿه اُئا نٿه ڪيڌو: ”آز رات ترسي پڙ ان موج ڪر!“ <sup>7</sup> پسٽه اُو منڪ زايا هارو اُنيو پڻ اُئا ري ڏوشي رٿه ٻاپ اُئا نٿه ترسيا هارو مڃپور ڪريو، تيام اُو هائي رات پڻ ٽڪي ريو.

<sup>8</sup> پونسمنٽه ڏي زئيون اُو زايا هارو هوار رو ويلو اُنيو تئيون اُئا ري ڏوشي رٿه ٻاپ ڪيڌو: ”ڏي نميا هُوڏي آروم ڪر!“ تئيون ٻي زئي پيڙي روئي کاڌي.

<sup>9</sup> پسٽه زئيون اُو لاوي را ڦيلا واڙو ان اُئا رئي ڏوشي ان اُئا رو شيواڌاري زاوا مڏيا تون اُئا ڏوشي رٿه ٻاپ آڀرا زمائي نٿه ڪيڌو: ”زوءُ، هوءَ تون ڏي نمي ڳيوه ان رات ٿيا واڙي سٺه. تيام مارئي وات مونو! رات ٽڪي ريو ان موج ڪرو! پسٽه هوار را ويلا آڀري گهري رونا ٿي زايا!“

<sup>10</sup> پڻ اُو لاوي ڦيلا واڙو رات ربا هارو راڄي نه ٿيو ان اُنيون رُونو ٿيو ان يوس مطلب يروشلم ڏوڪڙو پُڳيو. هلاڙل ٻي ڳڏيڙا ان اُئا رئي ڏوشي جئي ٻونئي هتئي اُو پڻ پيڙي هتئي. <sup>11</sup> زئيون اُو يوس ڪن پُڳيا تون ڏي آتيا واڙو هتو. تئيون شيواڌاري آڀرا مالڪ نٿه ڪيڌو: ”آبي يوسي قوم را ايٺا شهر ۾ هالون ان رات اُئڻه ريون.“

<sup>12</sup> اُئا رٿه مالڪ اُئا نٿه ڪيڌو: ”آبي اسرائيلي قوم را شهر شيوا ڪياڪ ڌاريون را شهر ۾ نئين هالون، آبي جبع شهر هوما هالئون.“ <sup>13</sup> پسٽه اُئڻه آڀرا شيواڌاري نٿه ڪيڌو: ”هالو آبي جبع ڪا رامه ۾ هالين رات ڪتون.“ <sup>14</sup> زئيون اُو ويتا ويتا بنيامين را علاقا ۾

جبع شهر دُوکٽڙا پوگيا وارا هتا، تئيون ڏي آڏمي ڳيو. <sup>15</sup> پسنه اُو جبع شهر هوما وڙيا زم اُو اُوڻه زائين رات رته. تيام اُو شهر را وس ۾ چوڪ مانھ ٻھي ربا پڻ اُوڻه ڪوئي آڏمي اُوڻون ننه آپري گھري نه ٿيڙي ڳيو.

<sup>16</sup> تنه توڻه هونز رو هيڪ گھريو آڏمي آپرو ڪوم ڪرين ڪيتر ٿي پاسو آوتو تو. اي گھريو آڏمي افرائيم را قبيلا را ڏونگرارا علاقا رو هتو ان جبع شهر ۾ آوين ربوا مڏيو پڻ هائي علاقا بنيامين را قبيلا وازون رو هتو. <sup>17</sup> اُوڻه آپ هومو زوبو، تون هیکا واناڙو ننه پاڙيو جيو شهر را چونڪ ۾ هتو. تئيون گھريه آڏمي ڪيدو: ”تون ڪيئون آيوھ ان ڪيئنه زائھ ربو؟“

<sup>18</sup> اُوڻه گھريدا ننه ڪيدو: ”امي يهوداه را بيت لحم ٿي افرائيم ري ڏونگرارا علاقا رته پرلنه پاهنه زائونه ربا. هون اوت رو سون ان يهوداه را بيت لحم ڳيو تو. هوه مارنه پرميشور ري گھري زاو پڻ ايئنه ڪوئي مون ننه آپري گھري نٿي ٿيڙي زاتو. <sup>19</sup> امون ڪن امارون ڳڏيڙون هارو پوه ان سارو سئ ايئا شيوا تمارا شيواڌاري ڪن آپ هارو، آپري بوني هارو ان آپرا شيواڌاري هارو پڻ روئيي ان انگور رو رس سئ. امون ننه ڪيا شينه رئي ڪاپئي نٿي.“

<sup>20</sup> گھريه آڏمي ڪيدو: ”تون ڦڪر مت ڪر! تاري ٻڌي ضرورتون هون پوري ڪريه. پڻ تون ايئا چونڪ ۾ رات مت ٿڪ!“ <sup>21</sup> اُو اُوڻا ننه آپري گھري ٿيڙي ڳيو ان اُوڻا رون ڳڏيڙون ننه سارو نوڪيو. پسنه اُوئي آپرا هات پڳ ڏويا ان روئيي ڪاڏئي.

### جبع شهر وازون رو ڏوه

<sup>22</sup> زئيون اُو آيت ۾ ڪچاري ڪرتا تا، تئيون اُوڻا شهر ري پونڌي منڪي اُوڻا گھر ننه گھيري ليدو ان زور زور ٿي ڌر وڳاڙوا مڏيا ان اُوڻا گھريدا آڏمي ٿي جيا رو گھر هتو ڪيو

مڏيا: ”اَٺا آڏمي نٿه جيو ٿارا گهر ۾ آڻل سٺه ٻارو ڪاڍي آ، تون امي اَٺا ٿي پُونڌو ڪوم ڪرون.“

<sup>23</sup> اَٺا آڏمي جيو گهر رو ڏي هتو ٻارو زائين اَٺون منڪون نٿه ڪيا مڏيو: ”مارون پايون، ايوو پُونڌو ڪوم مت ڪرو! ڪم تون اي آڏمي مارو ميمون سٺه، تيام ايوو نيچ ڪوم مت ڪرو! <sup>24</sup> زوئو! مارئي ڪُونٿاري ڏيڪري سٺه ان اَٺا آڏمي رئي ڏوشي جي بونئي سٺه، ايٿه سٺه. هُون اَٺون نٿه ٻاري لي آون، پسٺه زم تمون نٿه وٺه هم ڪرو! پڻ ايٿا آڏمي ٿي ايوو پُونڌو ڪوم مت ڪرو!“ <sup>25</sup> پڻ اَٺي منڪي ڪوئي وات نه هومپري. تيام اَٺه لاوي آڀري ڏوشي نٿه جي بونئي هتي اَٺا نٿه زهالين اَٺون ڪن ٻارو لي ڳيو، تون اَٺي اَٺا ٿي پُونڌو ڪوم ڪريو ان ٻڌي رات هوار هُڏي اَٺا رئي پيعزتي ڪرتا ربا ان زئون ڏي اُڳيا واڙو هتو تيون اَٺا نٿه ساڏي ڏيڏي.

<sup>26</sup> زئون هوار ٿيا واڙو هتو، تيون اَٺ ڏوشي آئي ان اَٺا آڏمي را گهر را موها ڪن پڙي نئي، جيٿه اَٺا رو ڏي هتو، ان هوزاڪو تيتون هُڏي اَٺه پڙي رئي. <sup>27</sup> اَٺا رٿه ڏي هوار رو اَٺين گهر رو ڌر ڪوليو ان آڀري گهري زايا هارو ٻارو نڪريو، تون زوئو! اَٺ ڏوشي جي اَٺا رئي بونئي هتي گهر را موها مانه هات سڌا ڪرين پڙي تي. <sup>28</sup> اَٺه ڏوشي نٿه ڪيڏو: ”اُٺ! آڀي هالون.“ پڻ اَٺه ڪوئي جواپ نه ڏيڏو. تيون اَٺا رٿه مالڪ اَٺا را لاش نٿه ڳڏيڙا مانه نوڪي ان آڀرا گهر هومو ڳيو پرو. <sup>29</sup> گهري پوڳين اَٺه سري ليڏي ان آڀري ڏوشي را لاش نٿه واڍين ٻارٿه ٽڪرا ڪرين اسرائيلي قوم را هر قبلا را علاقا ۾ ڏي ميليا زم ٻڌي قوم نٿه ايٿا وات رئي ڪپر پڙه. <sup>30</sup> ان زتي اي پاڙيو اَٺي ڪيڏو: ”جيا ڏي ٿي آڀي اسرائيلي قوم را منڪ مصر مُلڪ ٿي نيهرين آيا، اَٺا ڏي ٿي آڙ هُڏي ايوو ظلم نه ڪيڏي ٿيوه نه ڪيڏي پاڙيوه. تيام ايٿا مانه ويچار ڪرين صلاح ڏيو!“

إِسْرَائِيلِي قَوْمَ بَنِيَامِينَ رَا قَبِيلَا وَازُون نَئِه سَزَا دَئِه

20

تَتِيُون اوتراڌليا شهر دان ٿي لين ڏکڻاڌليا شهر بيرسبع هُودِي ان اڳوڻيئِه پاهڻه جلعاد را علاقا ٿي اسرائيلي قوم را ٻڌائي منڪ نيهر يا. اُو ٻڌئي منڌڙي پرميشور هومئي هيڪ من ٿين مصفاه شهر ۾ پيڙئي ٿئي. <sup>2</sup> ان ٻڌئي قوم مطلب اسرائيلون رون ٻڌون قپيلون را آڳوون ايشور رون منڪون رئي منڌڙي هوما اُپيا مطلب اُونون چار لڪ منڪون هوما جيا ترؤنار هاڪليا را ماهر هتا.

<sup>3</sup> تڻه توتڻه بنيامين را قبيل واري هومپڙو جي اسرائيلي قوم را منڪ مصفاه ۾ آيا. ان اسرائيلي قوم را منڪ ام پونسوا مڌيا: ”همپڙاوو تو سئي! اي پوندو کوم ڪم ٿيو؟“ <sup>4</sup> تتيون لاري را قبيل واريه جيا رئي ڏوشي مرئي ڳئي ٿئي، اُوڻه ام جواپ ڏيتو: ”هُون آپري ڏوشي پيڙو بنيامين قبيل وازون را شهر جبع ۾ تڪيا هارو ڳيو تو. <sup>5</sup> ان رات رڻه توتڻه جبع شهر ۾ ريا واڙا منڪي مون مانھ حملو ڪريا هارو آيا ان گهر نڻه چارون پاهون ٿي گهيري ليدو. اُو ماروا تون مون نڻه آيا تا، پڻ اُوئي ماري ڏوشي رئي پيعزتئي ڪري ان اُو مري ڳئي. <sup>6</sup> تتيون هُون آپري ڏوشي را لاش نڻه لي ڳيو ان اُون را ٽڪرا ڪريا پرا. پسڻه اُونون ٽڪرون نڻه اسرائيلي قوم ري وراست رون ٻڌون علاقون ۾ ڏي ميليا، ڪم تون آڻي اسرائيلي قوم ۾ اُوئي هيوو پوندو ان نيچ ڪوم ڪريو تو. <sup>7</sup> او اسرائيلون، هونڻه تمي ٻڌا زوڻو ان ويچار ڪرين ڪئينڪ صلاح ڏيو!“

<sup>8</sup> تتيون ٻڌا منڪ هيڪ ٿين ڪيو مڌيا: ”آپون موئين ٿي ڪوئي آپرون تنهون ۾ پاسو نئين زانه ان نڪو آپون موئين ٿي ڪوئي آپري گهري پاسو زاشي. <sup>9</sup> تيام هونڻه آبي ام ڪرشن جي مڪ پوزاري ڪن پويتر پکا نڪاوين سونيشون جي ڪيو قپيلو مور ۾ زاشي ان پسڻه جبع شهر مانھ حملو ڪرشن. <sup>10</sup> ان آبي اسرائيلي قوم رون ٻڌون قپيلون موئين ٿي هو لار ڏه، هزار لار هو ان ڏه هزار لار هيڪ هزار آدمي کاڌا پيدا ري شينهنون لي آيا

هارو ڌار ڪرڻون. زئيون قوج را منڪ بنيامين را قبيلا وازون را شهر گيع ۾ پوگشي، تون جيوو نيچ ڪوم اوئي اسرائيلي قوم ۾ ڪريو ايوو اوئون ٿي پڌلو ليون. ”<sup>11</sup> هم اسرائيلي قوم را ٻڌائي آڌمي هيڪ ٿين اوئا شهر رئه ڪلاڦ پيرا ٿيا.

<sup>12</sup> هوئه اسرائيلي قوم ري قبيلي بنيامين را قبيلا را ٻڌا علاقا ۾ منڪون نئه ام ڪي ميليو: ”تمون وسا ايوو پونڌو ڪوم ڪم ٿيو؟ <sup>13</sup> تيام هوئه اوئون پونڌون منڪون نئه جيا جيع ۾ سئه امارئه حوالئه ڪرو، تون امي اوئون نئه مارين اسرائيلي قوم موئين ٿي پونڌائي ڪتم ڪرون.“ پڻ بنيامين ري منڪي آپرون اسرائيلي پايون رو ڪيدو نه مونيو. <sup>14</sup> هوئه بنيامين را منڪ آپرون شهرن ٿي جيع شهر ڪن پيرا ٿيا زم اسرائيلي قوم رون پيزون قبيلون رون منڪون ٿي جنگ ڪرئه. <sup>15</sup> بنيامين را منڪ جيا شهرن ٿي اوئه ٿوئيه پيرا ٿيا او گڻپ ۾ چويه هزار هئا ان او تروٿار هاڪليا را ڪاريگر هئا. اوئا شيوا جيع ۾ پڻ هات هو سونڊل جوڻ هئا. <sup>16</sup> هايون ٻڌون منڪون موئين ٿي هات هو سونڊل جوڻ جيا ڏاوڙي هئا او ايوو چٽوڙي هئا جي ڳوٺن ٿي مٿوٿار نئه پڻ نه چوڪتا. <sup>17</sup> اسرائيلي قوم را منڪ بنيامين را قبيلا وازون شيوا چار لک هئا جيا تروٿار هاڪليا را ڪاريگر هئا. اي ٻڌا ٻڙوڪا جوڌا هئا.

### اسرائيليون رئي بنيامين را قبيلا وازون ٿي جنگ

<sup>18</sup> هوئه اسرائيلي قوم را منڪ اوئين بيت ايل شهر هوما مڪ پوزاري ڪن گيا ان اوئا ڪن پويتر پکا نڪاوين ايشور ٿي اي پونسيسو: ”بنيامين را قبيلا رون منڪون ٿي جنگ ڪريا هارو امون موئين ٿي پيرهين ڪوڻ زائه؟“

پرميشور پويتر پڪون ٿي وڙندئي ڏيڏئي: ”يهوداه رو قبيلو پيرهين زائه!“

<sup>19</sup> تئيون اسرائيلي هوار را ويدا اوئا ان جيع هوما تنبو هئا. <sup>20</sup> پسئه اسرائيلي بنيامين را قبيلا وازون ٿي جنگ ڪريا هارو نيهر يا ان جيع شهر ڪن اوئون ٿي ويدا هارو آپرنه

آپڙه ماڳ تيار ٿين اُپي ڳيا. <sup>21</sup> تئيون بنيامين را ڦيلا واڙا جيع شهر ٿي ٺهريا ان اُوه ڏي ٻاويه هزار اسرائيليون ننه تروٿار ٿي ماري نوڪيا. <sup>22</sup> پڙه ڏي وڙي اسرائيلي هيئت ڪرين اُوتا ئي ماڳ تيار ٿين اُپي ريا جيتته پيرھين ڏي اُوپا تا. <sup>23</sup> اسرائيلي هونز هُودِي پرميشور آڳڙ روتا ريا ان اُوتي پرميشور ٿي اي پُونسيو: ”امي آپرون پايون، بنيامين ڦيلا رون منڪون ٿي وڙي وڊيا هارو زائون ڪا ربوا ڏيون؟“

پرميشور ڪيڏو: ”هوئه، اُوتون ٿي وڊوا زائو!“

<sup>24</sup> تئيون اسرائيلي وڙي پڙه ڏي بنيامين رون منڪون ٿي وڊيا هارو ڏوڪڙا ڳيا. <sup>25</sup> ان اُوه ڏي بنيامين را منڪ اُوتون ٿي وڊيا هارو جيع ٿي ٺهريا ان اداره هزار اسرائيليون ننه ماري پرا جيا تروٿار هاڪليا را ڪاريگر هئا. <sup>26</sup> تئيون ٻڌائي اسرائيلي اُونيا ان بيت ايل ۾ آيا ان اُوتته پرميشور هوما روبا. ان اُوه ڏي هونز هُودِي ورت راڪي ان پرميشور را نوم مانھ هازا مال را ڏونپ سڙايا ان هڪ شونتي هارو مال را ڏونپ سڙايا. <sup>27</sup> ان اسرائيلي پرميشور ٿي پُونسيو جي ڪرو؟

اُوتون ڏيئون ۾ پرميشور را وسن رئي پيتي بيت ايل شهر ۾ هتي <sup>28</sup> ان هارون را ڏيڪرا اليعزر رو ڏيڪرو فيحاس اُوتا آڳڙ اُوپين پوزاري رو ڪوم ڪرتو.

اسرائيلي ايشور ٿي پُونسيو: ”امي آپرون پايون، بنيامين ڦيلا رون منڪون ٿي هيڪ وار وڙي وڊوا زائون ڪا ربوا ڏيون؟“

پرميشور ڪيڏو: ”زائو! هاري هون اُوتون ننه تمارون هاتون موئين ڏيه را.“

<sup>29</sup> تئيون اسرائيلي قوم واڙي جيع شهر ري چاري پاھي آپرون منڪون ننه هتائين پيھاريا نا. <sup>30</sup> ان اسرائيل را منڪ ترئمته ڏي بنيامين رون منڪون مانھ حملو ڪروا ڳيا ان پيرھين را زم جيع هوما ترتيب ٿي اُوپا. <sup>31</sup> تئيون بنيامين را منڪ اُوتون ٿي مقابلو ڪريا هارو ٺهريا ان شهر ٿي شيتته ٿيٿا ٿيٿا ميڏون هوما پوڳيا جيئون هيڪ مارڳ بيت ايل هومو ان

پيزو جيع هومو زاتو. اُوئي پيرهيڻ را زم اسرائيل رن منكون نئه ماروا شروع ڪريا ان لڳ ڀڳ اُوئون را تيه آڌمي ماري نوڪيا. <sup>32</sup> تئيون بنيامين ري منڪي ڪيڏو: ”او پيرهيڻ را زم آڀون ٿي هارئو ريا.“

پڻ اسرائيليئي ڪيڏو: ”ليو آڀي ڀاڳون! ان ايئون نئه شهر ٿي شيتئه موتون مارڳون هُوڏي لي زائون.“ <sup>33</sup> تئيون ٻڌا اسرائيلي آڌمي آڀرا آڀرا ماڳ ٿي اُونيا ان بعل تمر شهر ڪن تيار ٿين اُوڀي ريا. اُوئه توتئه او اسرائيلي جيا گبع شهر رئه آهئه ڀاهئه ميدون ۾ هتال هئا، او آڀرا آڀرا ماڳ ٿي نيهريا. <sup>34</sup> تيا مانه اسرائيليون موئين ٿي سونڊل ڏه هزار آڌمي جيع شهر هوما آيا ان لڙائي وڌئي گئي. پڻ بنيامين رن منڪون نئه ڪبر نتئي جي اُوئون مانه موتئي آقت آيا واڙي سئ. <sup>35</sup> پرميشور بنيامين را قبيلا واڙون نئه اسرائيليون هوما ماريو. اُوئه ڏي اسرائيل ري منڪي بنيامين را پنجويه هزار هيڪ هو آڌمي ماري نوڪيا جيا تروٿار هاڪليا را ڪاريگر هئا. <sup>36</sup> تئيون بنيامين رن منڪون نئه ڪبر پڙئي جي او هاري ڳيا.

ٻڌي وات ام ٿئي، جي اسرائيليئي آڀرون اُوئون منڪون مانه ڀروسو ڪريو تو جيون نئه اُوئي جيع شهر ڪن هتازين ٻيهاريا تا. تيام اسرائيليئي بنيامين را قبيلا واڙون آڳو ڀاڳيا رو نمونو ڪريو تو. <sup>37</sup> تئيون اُوئي منڪي جيا هتال هئا، اوچتو جيع شهر مانه حملو ڪريو ان اُوئي آڳو وڌين شهر رن ٻڌون منڪون نئه تروٿار ٿي ماريو پرا. <sup>38</sup> مور ٿي اسرائيلي منڪي ان اُوئون هتال منڪي اي نشون راکيو تو جي او شهر ۾ الهائي ڏونهو ڪرشي، <sup>39</sup> تون پسئ اسرائيل آڌمي پاسا هتشي. زئيون بنيامين واڙي اُوئون موئين ٿي تيهڪ آڌمي ماريو پريا، تون ام ڪيو مڏيا: ”هاس ۾ او آڀون ٿي هارئو ريا زم پيرهيڻ هاريا تا.“ <sup>40</sup> پڻ زئيون اوٿا شهر ٿي ڏونهو رو ڳوتو واڙا را زم آڪاش هومو اُونيو، تئيون بنيامين را قبيلا واڙا پاسا وڙين زوئو تون ٻڌا شهر ٿي ڏونهو آڪاش هُوڏي پوڳئو ريو. <sup>41</sup> پسئ تون اسرائيلي منڪ

حملو ڪريا هارو پاسا وڙيا ان بنيامين رن منڪون را هوش اُوڌي ڳيا، ڪم تون اُوئي پاڙيو جي اُوئون مانھ آقت آوي پڙيھ۔<sup>42</sup> تتيون اُو اسرائيلي آدميون نئ پُٺ ڏين رڻ وڳڙا هوما پاڳيا پڻ قوج اُوئون وونھڙ تئي ان پيزي اسرائيلي منڪي پڻ آھا پاھا رن شھرون تئي نيھرين اُوئون نئ وس موئين ماري نوڪيا۔<sup>43</sup> ام اُوئي بنيامين رن منڪون نئ گھيرو ڪرين اُوئون وونھڙ تيا ان اڳوڻليا پاهئ جبع شھر نئ هوما آروم ڪريا واڙا ماڳ ۾ اُوئون نئ هراوين گھڻون منڪون نئ ماري پرا۔<sup>44</sup> اُوئ ماڳ بنيامين را قبيل را اڍارئ هزار آدمي مرئي ڳيا۔ اُو ٻڌائي تروٿار هاڪليا را ڪاريگر هتا۔<sup>45</sup> جيا پچي ڳيا، اُو وڙين رڻ وڳڙا هوما رمون ري تيڪري هوما پاڳي ڳيا پڻ اسرائيلي موتون مارڳون مانھ ايل اول ڳوتي ڳوتين اُوئون را پونس هزار آدمي ماري۔ پسئ جڊوم شھر هُوڌي وونھڙ تين اُوئون موئين تئي پيزا ٻي هزار آدمي ماري نوڪيا۔<sup>46</sup> اُوئ ڏي بنيامين را قبيل موئين تئي پنجويه هزار منڪ مروٿا۔ اُو ٻڌائي پڙوڪا جوڌا هتا ان تروٿار هاڪليا را ڪاريگر هتا۔

<sup>47</sup> پڻ سو هو آدمي وڙين رڻ وڳڙا هوما رمون تيڪري هوما پاڳي ڳيا ان اُوئ چار مئينا ربا۔<sup>48</sup> تيا ڪيڙ اسرائيلي آدمي وڙين بنيامين را قبيل واڙون را هر شھر مانھ ٽوتي پڙيا ان ٻڌون نئ، مال ان هر جيوتي شينھ نئ تروٿار تئي ماري پري۔ اُوئون ٻڌون شھرون نئ پاهي ڏين ٻاڙيا پرا۔

### بنيامين رو وستار وبتو راڪوو

**21** اسرائيلي مصفاه شھر ۾ ام هون ڪائين ڪيڏو تو: ”آپون موئين تئي ڪوئي پڻ آبرئي ڏيڪري بنيامين رن منڪون نئ نه ڏئ۔“<sup>2</sup> پسئ اُو منڪ بيت ايل موئين آيا ان هونز هُوڌي اُوئ ايشور هوما اونسا هاڏ تئي الهائي روتا ربا۔<sup>3</sup> ان اُوئي ڪيڏو: ”او پرميشور اسرائيلي قوم را ايشور، امري اسرائيلي قوم ۾ آڙ ام ڪم ٿيوھ؟ اسرائيليون موئين تئي هُوئ هيك قبيلو گھت ٿي ڳيوھ۔“

<sup>4</sup> ٻيڙئ ڏي اُو منڪ ويلا اُونيا ان اوتئ هڪ پرميشور را نوم مانھ مال ساڙيا رئي ويدئي ناون ھازا مال را ڏونپ سڙيا ان هڪ شونتي هارو پڻ مال را ڏونپ سڙيا. <sup>5</sup> تيا ڪيڙ اسرائيلي پونسو: ”اسرائيلي قوم رون قبيلون موئين ٿي اُو ڪوڻ سئ جيا پرميشور هوما منڌري پيرا نتي ٿيا؟“ ڪم تون اوتئي هون ڪائين وائيدو ڪريو تو جي جيو پرميشور هومو مصفاھ شهر ۾ حاضر نئين تئ اُو ضرور ماريو زاشي. <sup>6</sup> هوتئ اسرائيلي قوم رون منڪون تئ اپرون پايون، بنيامين را قبيلو وازون رو ڏڪ ٿيو ان ام ڪياو ربا: ”آز اسرائيلي قوم رون قبيلون موئين ٿي هڪ قبيلو ڪتائي گيوھ. <sup>7</sup> ان اوتا قبيلو موئين جيا منڪ پچياھ، آبي اوئون هارو ڏوشي ڪيئون لي آون؟ ڪم تون آبي تون پرميشور ٿي هون ڪاڌو تو جي آبي آبي ڏيڪري اوئون تئ نئين پرتاون.“

<sup>8</sup> زئون اوتئي ڪيدو: ”اسرائيلي قوم رون قبيلون موئين ٿي ڪوڻ مصفاھ ۾ پرميشور هومو حاضر نه ٿيو؟“ تيون اوتئي زيوو جي منڌري ۾ پيرا ٿيا هارو بيس جلعاد شهر ٿي ڪوئي نه آيوھ. <sup>9</sup> ڪم تون زئون منڪون تئ گنيا تيون بيس جلعاد را ربا وازون موئين ٿي اوتئ ڪوئي نتو. <sup>10</sup> تيون منڌري ٻارئ هزار ٻڙوڪا جوڌا رونا ڪريا ان اوئون تئ اي حڪم ڏيدو: ”زائين بيس جلعاد رون ربا وازون تئ ڏوشيون ان ٻازون هوڌا تروار ٿي ماري نوکو. <sup>11</sup> ان تمي ام ڪريا جي ٻڌون آدميون ان پرتاول ڏوشيون تئ ماريو پري.“ <sup>12</sup> پسئ بيس جلعاد شهر ۾ زائين اوت رون ربا وازون موئين ٿي چار هو ڪوناري سوڪري زڙي ان اوئون تئ ڪنعان ملڪ ۾ سيلا شهر ڪن تنئون ۾ لي آيا.

<sup>13</sup> تيون ٻڌي منڌري بنيامين را قبيلو وازون تئ، جيا رمون ري ٿيڪري ڪن ريتا، اوئون تئ ٺاھ ڪريا هارو نياپو مليو. <sup>14</sup> تيون بنيامين را منڪ پاسا آيا ان اوتئي بيس جلعاد شهر ري اُو سوڪري جيون تئ اوتئي نتي ماري اوئون تئ پرتيا هارو ڏيڌي. پڻ اُو اوئون هارو گهٽ هتي.

<sup>15</sup> هوئە منكون نئە بنيامين را قبيلا وازون رو دُك تيو كم تون پرميشور اسرائيلي قوم رون قبيلون موئين ٿي هيڪ قبيلو كتم كريوت پرو. <sup>16</sup> تئيون منڌري ري موتي ڪيدو: ”جيا پچي گياھ، اُونون ھارو ڏوشي ڪيئون لي آون؟ ڪم تون بنيامين قبيلا ري ٻڌي ڏوشي مرائي گيھ.“ <sup>17</sup> تيام اُوئي ڪيدو: ”بنيامين رون پچل منكون ھارو وستار ضروري سئە زم اسرائيلي قوم موئين ٿي هيڪ قبيلو كتم نہ ٿي زائە.“ <sup>18</sup> پڻ توئي آبي آبي سوڪري اُونون نئە پرتاوي نٿي هيڪتا.“ ڪم تون اسرائيلي اي ڪين ھون کاڌو تو: ”جيو ڪوئي بنيامين را قبيلا وازون نئە سوڪري ڏيشي او پتل ھوشي.“

<sup>19</sup> پسئە اُوئي ڪيدو: ”زوئو، سيللا شھر ۾ ھر سال پرميشور رو ميرو لاگئھ جيو بيت ايل ٿي سڪم ھومو زيا وازا موتا مارگ رتھ ڏڪاڌائھ پاهئە سئە. سيللا بيت ايل شھر ٿي اوتر ھومو سئە ان لئون شھر ٿي ڏڪاڌائھ پاهئە سئە.“ <sup>20</sup> تئيون اُوئي بنيامين را قبيلا وازون نئە حڪم ڏيدو: ”زائو ان انڱورون ري واڙيون ۾ ھٽائين بيھي ريو.“ <sup>21</sup> ان زوتا ريا جي زئيون سيللا شھر ري سوڪري رموا نيھرئە، تئيون تمي واڙيون موئين ٿي نيھرين سيللا ري سوڪريون موئين ٿي آپ ھارو هيڪ هيڪ سوڪري ويوا ڪريا ھارو زھالي ليا ان آڀرا علاقا ۾ زيا پرا! <sup>22</sup> ان زئيون اُونون را باپ ڪا پائي امون ٿي ڳلا ڪرو آوشي تئيون امي اُونون نئە ڪيشون پرو جي، ’ميريوني ڪرين امارئي مدت ڪرو ان ھائي سوڪري اُونون نئە ڏيو پري، ڪم تون اوئا جنڳ ۾ امي ايئون ٻڌون ھارو سوڪري نٿا لي آوي هيڪيا. تمي اُونون نئە آڀري مرضي ٿي نٿي ڏيڌي، تيام ايئا ۾ تمارو ڪوئي ڏوھ نٿي.“

<sup>23</sup> تئيون بنيامين ري منڪي ھمروم ڪريو ان آڀري ڳٽپ پرموئئە اُونون سوڪريون موئين ٿي جي رمتي تي هيڪ هيڪ سوڪري زھالين آڀري وراست ۾ پاسا گيا پرا ان اوئئە شھر وڙي نيا ان اُونون موئين ريو مڌيا. <sup>24</sup> ان اسرائيلي قوم وازا اُونون آڀرا قبيلا ان ڪٽمون ۾ گيا پرا ان آڀري وراست ۾ پاسا وڙيا.

<sup>25</sup>اُوئون دِيعون مِ اسرائِيلي قُوم مِ ڪوئي پاڌشا نتو ان جيا نئه زم نِيڪ لاڳتو هم

ڪرتو۔